

不稱職京師寢廢長安市偷盜尤多百賈苦之敞既  
視事求問長安偷盜首長數人居皆溫厚出從僮僕  
閭里以爲長者敞皆召既見責問因貸其罪乃署吏  
令致諸偷以自贖爲置酒小偷皆來賀之飲醉偷長  
陰以赭汗其衣裾吏坐門閱赭汗者輒收之一日捕  
得數百人由是抱鼓希鳴市無偷盜又曰王駿爲京  
兆尹成帝欲大用之故試以政事先是京兆有趙廣  
漢張敞王遵王章王駿皆有名京師稱曰前有趙張  
後有二王

碑後漢蔡邕京兆尹樊陵碑曰於顯哲尹誕德孔彰

膺帝休命謂篤不忘爰納忠式規悟聖皇欽崇園邑  
大孝允光九命車服昭示采章軒輅四牡承祀蒸嘗  
多士時貢繇役永息進路孔夷民清險棘同體諸舊  
兆萌蒙福惠垂無疆守以罔極

### 宣城郡

陶氏家傳云陶汪晉咸康中爲宣城内史君從父猷  
先爲之君到郡乃招隱逸廣開學舍以此教民民有  
向方者則辟爲掾吏百姓歌之曰人當勤學得王簿  
誰使爲之陶明府

晉中興書曰桓彝少孤家貧而性度高豁不以簞瓢

屑意年在弱冠便有知人之鑒爲宣城太守百姓懷之

沈約宋書曰羊玄保爲黃門郎善奕碁碁品第三太祖亦好奕數蒙引見嘉其溫謹與太祖賭郡戲勝以補宣城太守

詩齊謝朓始之宣城郡詩曰簪髮逢嘉惠教義承君子心跡若未并憂歡將十祀幸霑雲雨慶方轡參多士振鷺徒追飛羣龍難隸齒烹鮮止貪競共理屬廉恥伊余昧損益何用祇千里解劔北宮朝息駕南川涖寧希廣平詠聊慕華陰市又宣城郡內登望詩曰

借問下車日匪直望舒圓寒城一以眺平楚正蒼然山積陵陽阻溪流春穀泉威紆距遙甸巉岬帶遠天切切陰風暮桑柘起寒烟悵望心已極恟况竟屢遷結髮倦爲侶平生早事邊誰規鼎食盛寧要狐白鮮方棄汝南詔言稅遼東田

### 會稽郡

司馬彪續漢書曰任延拜會稽南部都尉時年十九迎吏見其少皆驚會稽多名士延到官皆聘請高行俊又警待師友之禮及掾吏貧之輒分俸祿以賑給之

晉中興書曰諸葛恢爲會稽太守臨行上爲置酒謂之曰會稽晉之關中足食足兵在於太守以君有蒞任之方是以相屈四方分崩當匡振否運治之所先君爲言之恢陳謝因對曰今天下喪亂之餘風俗凌遲宜尊五美屏四惡進忠實之士退浮華之黨中宗深納之又曰王彪之爲鎮軍將軍會稽內史加散騎常侍居郡八年豪強斂跡亡戶出者三萬餘口又曰王述作會稽太守外白請諱答曰惟祖惟考四海所知過此無所復諱

啓齊謝朓爲王敬則謝會稽太守啓曰臣本布衣不謀遠大折衝之勤不舉燮理之義何階常恐覆餗是貽咎徵斯應陛下繼曆勝統日月重光得以桓珪袞服拜奉歲時視濯獻牲鞠躬郊廟而鴻恩妄假復授龜符玉節邁於雙璜表東侔於四履臨邊三事既謝張溫潁川再撫亦慙黃霸

藝文類聚

卷之六

三

藝文類聚卷之六



國家圖書館, NATIONAL CENTRAL LIBRARY, TAIWAN, R.O.C.

藝文類聚卷第七

唐太子率更令弘文館學士歐陽詢撰

明 秣 陵 王元貞校

山部上

<small>總載山</small>	<small>崑崙山</small>	<small>嵩高山</small>	<small>華山</small>
<small>衡山</small>	<small>廬山</small>	<small>太行山</small>	<small>荆山</small>
<small>鍾山</small>	<small>北芒山</small>	<small>天台山</small>	<small>首陽山</small>
<small>燕然山</small>	<small>羅浮山</small>	<small>九疑山</small>	

總載山

春秋說題辭曰山之為言宣也含澤布氣調五神也

國語曰禹封九山山者土之聚也

論語曰仁者樂山

春秋元命苞曰山者氣之包含所含精藏雲故觸石



布山

爾雅曰山西曰夕陽山東曰朝陽又曰山大而高曰崧山小而高曰岑多草木曰岷無草木曰岵石戴土謂之崔嵬土戴石爲砠

禮記曰夫山一拳石之多及其廣大草木生之禽獸居之寶藏興焉

史記曰黃帝東至于海登九山西至于崆峒登雞頭南至熊湘北逐獯鬻合符釜山

蜀王本紀曰天爲蜀王生五丁力士能獻山秦王獻美女與蜀王蜀王遣五丁迎女見一大蛇入山穴中

五丁并引蛇山崩秦五女皆上山化爲石

河圖曰武關山爲地門上爲天高星主因圍岐山在崑崙東南爲地乳上爲天糜星汶山之地爲井洛帝以會昌神以建福上爲天井

呂氏春秋曰何謂九山會稽太山王屋首陽山太華岐山太行羊腸孟門

漢名臣奏曰漢得陰山匈奴長老過之未嘗不哭地鏡曰入名山必先齋五十日牽白犬抱白雞以鹽一勝山神大喜芝草異藥寶玉爲出未到山百步呼曰林林央央此山王名知之却百邪

素山松宜都記曰郡西北陸行四十里有丹山山間  
時有赤氣籠蓋林嶺如丹色因以名山又曰自西陵  
東北陸行百二十里有方山其嶺四方素崖如壁天  
晴朗時有黃影似人像山上有神祠場特生一竹茂  
好其標垂場中場中有塵埃則風起動此竹拂去如  
灑掃者

盛弘之荊州記曰宜都西南峽中有黃牛山江湍紆  
迴途經信宿猶望見之行者語曰朝發黃牛暮宿黃  
牛三日三暮黃牛如故又曰桂陽郡西南五十里有  
萬歲山有石室鍾乳山上悉生靈壽木又曰武陵舞

陽縣有淳于白雉二山在寧州武陵二界畔絕壑之  
半有一石雉遠望首尾可長二丈伸足翔翼若虛中  
翻飛頭綴著石又曰衡山有三峯極秀一峯名紫蓋  
又曰宜都夷道縣西南九十里有望州山四面壁立  
登此見一州內東有涌泉欲雨輒有赤氣故名丹水  
又曰宜都宜昌縣三峽七百里兩岸達山略無絕處  
漁者歌曰巴東三峽巫峽長

荆南圖制曰宜都夷陵縣東六十里南岸有荆門山  
北有虎牙二山相對虎牙有石壁其文黃赤又似虎  
牙形荆門山上合下空有若門象又曰鄧城西七里

有作樂山諸葛亮常登此山爲梁甫吟又曰襄陽郡中廬縣西百三十里有馬穴山傍有一地道云漢時有馬出其中又曰宜都夷陵縣西八十里有高筐山古老相傳堯時大水此山不沒如筐筐因以爲名又曰巴東昆陽縣東南十里有栢枝山有石泉口方數丈中有魚又曰宜都夷道縣北有女觀山昔有思婦登山絕望懷思而死葬之山頂山遂枯悴因以名山名庾仲雍湘中記曰桂陽郴縣東北五里有馬嶺山高六百餘丈蘇耽所栖遊處因而得仙後有見耽乘白馬還此山中世因名爲馬嶺

晏子春秋曰齊景公召羣臣問曰天不雨久矣民有饑色吾卜祟在高山廣澤寡人欲祠靈山可乎晏子曰夫靈山因以石爲身以草木爲毛髮天久不雨髮將焦身將熱獨不欲雨乎祠之何益

淮南子曰牛蹄之涔無尺之鯉頽府之山無丈之材所以然者何也皆其營守狹小而不能容巨大韓詩外傳曰仁者何以樂山山者萬物之所瞻仰也草木生焉萬物殖焉飛鳥集焉走獸休焉吐生萬物而不私焉出雲導風天地以成國家以寧此仁者所以樂山



張璠漢記曰梁冀聚土築山十里九坂以象二嶠窮極工巧積金玉明珠克物其中

相家書曰青烏子稱山望之如却月形或如覆舟葬之出富貴山望之如雞栖葬之滅門山有重疊望之如鼓吹樓葬之連州二千石

遊名山志曰玉溜山一名地肺山一名浮山

魏志曰明帝鑿太行山之石英採穀城之文石起景陽山於芳林園

王韶之始興記曰郡東有玉山草木滋茂泉石

澄潤

鄧德明南康記曰平固縣覆笥山上有笥貯玉牒記

故山因笥爲名焉

詩晉庾闡登楚山詩曰拂駕升西嶺寓目臨浚波想望七德耀詠此九功歌龍駟釋陽林朝服集三河迴首盼宇宙一無濟邦家

晉王凝之妻謝氏詩曰峩峩東嶽高秀極冲清天巖中間虛宇寂漠幽以玄非工復非匠雲構發自然器象爾何物遂令我屢遷逝將宅斯宇可以盡天年

宋孝武遊覆舟山詩曰束髮好怡衍弱冠頗流薄素想終勿傾聿來果丘壑層峯亘天維曠渚綿地絡逢臯列神苑遭壇樹仙閣松燈含青暉荷源煜彤爍川

界泳遊鱗巖庭響鳴鶴又登作樂山詩曰修路軫孤  
轡竦石頓飛轅遂登千尋首表裏望丘原屯煙擾風  
穴積水溺雲根漢潦吐新波楚山帶舊苑壤草凌故  
國拱水秀顏垣目極情無屆客思空已繁又登魯山  
詩曰解帆憩通渚息徒憑樹丘粵值風景和升高從  
遠眸紀鄧窮西路湘夢極南流杳哉漢陰水浩焉江  
界修

宋謝靈運往北山經湖中詩曰石橫水分流林密蹊  
絕蹤初篁苞綠籜新蒲合紫茸海鷗戲春岸天雞弄  
和風

宋宗炳登白鳥山詩曰我徂白鳥山因名感昔擬仰  
升數百仞俯覽眇千里杲杲羣木分岌岌衆巒起又  
登半石山詩曰清晨陟阻崖氣志洞蕭灑嶰谷崩地  
幽窮石凌天委長松列竦肅萬樹巉巖詭上施神農  
蘿下疑堯時髓

齊謝朓和王著作登八公山詩曰東限瑯琊臺西距  
孟諸陸阡眠起雜樹壇欒陰修竹日隱瀾疑空雲聚  
岫如複出沒眺樓雉遠近送春目又遊敬亭山詩曰  
茲山亘百里合杳與雲齊上千蔽白日下屬帶迴溪  
交藤荒且蔓樛枝聳復低獨鶴方朝唳饑鼯此夜啼

世雲已漫漫多雨亦淒淒

梁沈約遊金華山詩曰遠策追夙心靈山協久要天  
倪臨紫闕地道通丹竅未乘琴高鯉且縱嚴陵釣若  
蒙羽駕迎得奉金書召高馳入閭闔方覩靈妃笑  
又留真人東山還詩曰連峯竟無已積翠遠微微寥  
戾野風急芸黃秋草腓我來歲云暮於此悵懷歸霜  
雪方共下寧止露霑衣待余兩岐秀去去掩柴扉

梁范雲登三山詩曰仄徑崩且危叢巖竦復垂石藤  
多卷節水樹饒蟠枝海中昔自重江上今如斯

梁江淹歷山詩曰愁生白露日思起秋風年竊悲杜

衡暮攬涕即空山落葉下楚水別鶴噪吳田嶂氣陰  
不極日色半虧天酒至情蕭瑟憑罇還惘然又遊黃  
檗山詩曰長望竟何極閩雲連越邊南州饒竒怪赤  
縣多靈仙金峯各虧日銅石共臨天陽岫昭鸞采陰  
谿噴龍泉雞鳴丹壁上猿嘯青崖間

梁任昉奉和登影陽山詩曰物色感神遊升高悵有  
閱南望銅駝街北走長楸埒別澗苑滄溟疏山駕瀛  
碣奔鯨吐萃浪司南動輕柅日下重門照雲開九華  
澈觀閭隆舊恩奉圖愧前哲

梁庾肩吾遊甌山詩曰去子平已久餘風今復追未

必遊春草王孫自不歸寒雲間石起秋葉下山飛

周王褒明慶寺石壁詩曰夏水懸臺際秋泉帶雨餘  
石生銘字長山久谷神虛又雲居寺高頂詩曰中峯  
雲已合絕頂日猶晴邑居隨望近風煙對眼生

周庾信陪駕幸終南山詩曰玉山乘四載瑤池宴八  
龍竈橋浮少海鵠蓋上中峯飛狐橫塞路白馬當河  
衝水奠三川后山封五樹松長虹雙瀑布圓闕兩芙  
蓉戍樓鳴夕鼓山寺響晨鐘新蒲節轉促短筍籜猶  
重樹宿含櫻鳥花留釀蜜蜂迎風下列缺醜酒召昌  
容且欣陪北上方欲待東封

陳張正見賦得山卦名詩曰蓬萊遁羽客巖穴轉蒙  
籠雲歸仙井暗霧解石橋通影帶臨峯鶴形隨雜雨  
風尋師不失路咸欲馭飛鴻

賦魏劉楨黎陽山賦曰自魏都而南邁迄洪川以揭  
休想王旅之旌旄望南路之遐修御輕駕而西徂過  
舊塢之高區爾乃踰峻嶺超連罡一登九息遂臻其  
陽南陰黃河左覆金城青壇承祀高碑頌靈珍木駢  
羅奮華揚榮雲興風起蕭瑟清泠延首南望顧瞻舊  
鄉桑梓增敬慘切懷傷河源汨其東遊陽鳥飄而南  
翔觀衆物之集萃退欣欣而樂康

晉潘岳登虎牢山賦曰辭京輦兮遙邁將遠遊兮東  
夏朝發軔兮帝墉夕結軌兮中野憑修坂兮停車臨  
寒泉兮飲馬眷故鄉之遼隔思紆軫以鬱陶步玉趾  
以升降凌汜水而登虎牢覽河洛之二川眺成平之  
雙臯崇嶺巖以崔崒幽谷豁以寥寥路透迤以迫隘  
林廓落以蕭條爾乃仰陰嘉木俯藉芳卉青煙鬱其  
相望棟宇懷以鱗萃彼登山而臨水因先喆之所哀  
矧去鄉而離家邈長辭而遠乖望歸雲以歎息腸一  
日而九迴良勞者之詠事爰寄言以表懷

晉郭璞巫咸山賦曰蓋巫咸者實以鴻術爲帝堯醫  
生爲上公死爲貴神豈封斯山而因以名之乎伊巫  
咸之名山崛孤停而嶒峙體岑峭以隆頽冠崇嶺以  
峻起配華霍以助鎮致靈潤乎百里爾乃寒泉懸涌  
浚湍流帶林薄叢籠幽蔚隱藹八風之所歸起遊鳥  
之所喧會潛瑕石揚蘭茝迴翔鷄集凌鶴鷄翳禽鳥  
栖陽以晨鳴熊虎窟陰而夕嘑

梁江淹江上之山賦曰挂青蘿兮萬仞豎丹石兮百  
重百重兮崑崙如斲兮如削波潮兮吐納嶼岸兮積  
沓見紅草之交生眺碧樹之四合草自然而千華樹  
無情而百色嗟世道之異茲牽憂患而來逼

梁吳筠八公山賦曰峻極之山蓄聖表仙南參差而  
望越北邇迤而懷燕爾其盤栢基固含陽藏霧絕壁  
嶮巖層巖迴互桂皎月而常團雲望空而自布袖以  
華閭帶以潛淮文星亂石藻日流堦若夫神基巨鎮  
而卓犖荆河箕風畢雨育嶺生峩高岑直兮蔽景修  
坂出兮架天以迎雲而就日若從漢而迴山露泫葉  
而原淨花照磯而岫鮮促嶂萬尋平崖億絕上被紫  
而煙生傍帶花而來雪維英王兮好仙會八公兮小  
山駕飛龍兮翩翩高馳翔兮冲天  
陳張正見山賦曰何神山之峻美諒苞結之所成東

垂曰秦南服稱衡西戎所擅北狄標名於是堯值洪  
流滔天襄陵禹敷水土奠高榭木衆川既導羣岳自  
修潛通四瀆鎮壓九州森羅辰象吐吸雲霧深不可  
測遠不可步於廓靈山長爲作固爾其爲狀也則武  
當太和武功太白崑崙五門扶寧三石峯高一萬峭  
峙三百登而眺之則千里無極俯而臨之則萬仞難  
測映白鶴而同高混青天而共色

晉潘尼西道賦曰異山河之阻阨倦關谷之盤紆車  
低徊於潛軌馬侘傺於險塗狗肘還勾羊角互戾薊  
窟連接十數億計石子之澗坎堦之穴支體爲之危

竦形骸爲之疲曳此亦行者之艱難羈旅之困蹙若  
其名坂則羊羹八特成臯黃馬迴波激浪飛沙飄瓦  
馬則頓躓狼傷虺頽玄黃牛則體疲力竭損食喪膚  
履蹄穿嶺摩髓脫軀

吟晉夏侯湛山路吟曰夙駕兮待明陟山路兮遐征  
冒晨朝兮入大谷道逶迤兮嵐氣清攬轡兮抑馬脚  
蹶兮曠野曠野軀兮遼落崇岳兮鬼嶸丘陵兮連離  
卉木兮交錯淥水兮長流驚濤兮拂石

宋謝莊山夜憂曰庭光盡山明歸流風乘軒卷明月  
緣河飛澗鳥鳴兮夜蟬清橘露靡兮蕙煙輕凌別浦

兮值泉躍經喬林兮遇猿驚南臯別鶴佇行漢東鄰  
孤管入青天沉痾白髮共急日朝露過隙詎賒年年  
去兮髮不還金膏玉液豈留顏迴舫拓繩戶收棹掩  
荆關

贊晉庾肅之山贊曰懸巖沓翳神明攸居官府風雲  
懷吐川渠崑閬天竦五岳雲停飛峯紫蔚辰秀

太清

晉戴逵山贊曰蔚矣名山亭亭洪秀並基二儀堯  
雲構差峩積岵寥籠虛岫輕霞下拂神泉芴漱曰仁  
奚樂惟茲比壽

晉郭璞炎山贊曰木含陽氣精構則燃焚之無盡是

生火山理見乎微其妙在傳

**銘**晉張載劔閣銘曰巖巖梁山積石峩峩遠屬荆衡  
近綴岷嶓南通邛棘北達褒斜狹過彭碣高踰嵩華  
惟蜀之門作固作鎮是曰劔閣壁立千仞窮地之險  
極路之峻世濁則逆道清斯順閉由往漢開自有晉  
秦得百二并吞諸侯齊得十二田生獻壽矧茲狹隘  
土之外區一人荷戟萬夫超超形勝之地非親勿居  
昔在武侯中流而喜山河之固見屈吳起興實在德  
險亦難恃洞庭孟門二國不祀自古迄今天命匪易  
憑阻作昏渺不敗績公孫旣滅劉氏銜壁覆車遺軌

罔或重跡勒銘山阿敢告梁益

晉湛方生靈秀山銘曰巖巖靈秀積岨幽重傷嶺關  
岫乘標挺峯桂柏叅幹芝菊亂叢翠雲久映爽氣晨  
蒙籠籠疎林穆穆閑房幽室冬暄清蔭夏涼神木竒  
生靈草真香雲鮮其色風飄其芳可以養性可以栖  
翔長生久視何必仙鄉

梁簡文帝行雨山銘曰巖畔途遠阿曲路深猶云息  
馭尚且抽琴茲峯獨擅欽崎千變却繞畫房前臨寶  
殿玉岫開華紫水迴斜谿間聚葉澗裏縈沙月映成  
水人來當花藤結如帷磧起成基芸香馥逕石鏡臨



嵬又明月山銘曰迢遞峯長威紆岳聚旣正書門兼  
同天柱非競小山寧論大庾豈學土龍詎須石鼓緜  
色斜臨霞文橫豎

元帝東宮後堂仙室山銘曰太華削成本擅竒  
峯如雪委嶺若蓮生雲除紫蓋霞通赤城金壇是  
錄玉記題名鳳依桐樹鶴聽琴聲殿接南箕橋連北  
斗秋河從帶春禽銜綬朱鳥安窓青龍作牖

梁庾肩吾東宮玉帳山銘曰玉帳寥廓崑山抵鵲摠  
葉成帳連枝起幕玉蕊難徙金花不落隱士彈琴仙  
人看博巖留故鼎竈聚新荆煮石初爛燒丹欲成桑

田屢盡海水頻傾長聞鳳笛永聽簫聲

周庾信梁東宮行雨山銘曰山名行雨地異陽臺春  
人無數神女羞來翠幔朝開新粧旦起樹入牀前山  
來鏡裏草色衫同花紅面似開年寒盡正月春遊天  
絲劇藕蝶粉多塵橫藤礙路垂柳係人誰諭洛水一  
箇河神

陳徐陵後堂望美人山銘曰高堂凝雨洛浦無洲何  
處相望山邊一樓峯因五婦石是三侯險逾地肺危  
鄰天柱禁苑斜通春人恒聚樹裏聞歌枝中見舞恰  
對粧臺諸窓併開遙看已識試喚便迴豈如織女非

秋不來

〔碑〕梁簡文帝神山碑銘曰開號天井山稱地雌碧雞金馬越瀆梁池懷靈緼德孕寶含奇此亦仙岫英名遠擣昔有鷲窟不燒淨土邁彼高蹤構茲法宇引葉成帷即樹爲柱石砌危橫崖階斜豎

梁元帝玄圃牛渚磯碑曰竊以增城九重仙林八樹未有船如鴈鶴時度宓妃橋似牽牛能分織女丹鳳爲羣紫柱成迥清風韻響即代歌仙桂影浮池仍爲月浦璧月朝暉金樓啓扉畫船向浦錦纜牽磯花飛拂袖荷香入衣山林朝市併覺忘歸

〔序〕宋謝靈運名山序曰夫衣食人生之所資山水性分之所適世識多云歡足本在華堂枕巖漱流者之於大志故保其枯槁余謂不然君子有愛物之情有救物之能橫流之弊非才不理故時有屈已以濟彼豈以名利之場賢於清曠之域邪語萬乘則鼎湖有縱轡論儲貳則嵩山有絕控又陶朱高揖越相留侯願辭漢傳推此而言可以明矣

〔書〕梁吳筠與施從事書曰故鄣縣東三十五里有青山絕壁于天孤峯入漢緣嶂百重青川萬轉歸飛之鳥千翼競來企水之猿百臂相接秋露爲霜春蘿被

逕風雨如晦雞鳴不已信足蕩累頤物悟裏散賞又  
與朱元思書曰風煙俱淨天山共色從流飄蕩任意  
東西自富陽至桐廬一百許里奇山異水天下獨絕  
水皆漂碧千丈見底游魚細石直視無礙急湍甚箭  
猛浪若奔夾峯高山皆生寒樹負勢競上互相軒邈  
爭高直指千百成峯泉水激石泠泠作響好鳥相鳴  
嚶嚶成韻蟬則千轉不窮猿則百叫無絕鳶飛戾天  
者望峯息心經綸世務者窺谷忘反橫柯上蔽在晝  
猶昏疎條交映有時見日

### 崑崙山

河圖曰崑崙之墟五城十二樓河水出焉  
龍魚河圖曰崑崙山天中柱也

大荒西經曰赤水之後黑水之前有大山名曰崑崙  
之丘有神人面虎身有尾

爾雅曰西北之美者有崑崙之墟璆琳琅玕焉

穆天子傳曰天子遂宿于崑崙之阿赤水之陽吉日  
辛酉天子升于崑崙之丘以觀黃帝之宮

紀年曰周穆王十七年西征至崑崙丘見西王母王  
母止之

神異經曰崑崙有銅柱焉其高入天所謂天柱也圍

三千里圓周如削銅柱下有迴屋焉辟方百丈

史記曰禹本紀言河出崑崙崑崙甚高三千五百餘里日月所相避隱爲光明也其上醴泉華池自張騫使大夏之後窮河源惡覩本紀所謂崑崙者乎

水經曰崑崙墟在西北去嵩高五萬里地之中也其高萬一千里河水出其東北陬

博物志曰崑崙從廣萬一千里神物之所生聖人神仙之所集五色雲氣五色之流水其泉東南流入中國名爲河也

葛仙公傳曰崑崙一曰玄圃一曰積石瑤房一曰閭

風臺一曰華蓋一曰天柱皆仙人所居也

搜神記曰崑崙之山地首也是惟帝之下都故其外絕以弱水之深又環以炎火之山山上有鳥獸草木皆生育滋茂於炎火之中故有火澣布非此山之皮泉則其鳥獸之毛也

贊晉郭璞崑崙丘贊曰崑崙月精水之靈府惟帝下都西羌之字嶮然中峙號曰天柱

### 嵩高山

山海經曰太室之中山其上有木焉葉狀如梨而赤理而名曰指服者不垢

毛詩曰嵩高山惟嶽峻極于天維嶽降神生甫及申

列仙傳曰王子喬周靈王太子晉也好吹笙作鳳鳴遊伊雒間道士浮丘公接上嵩高山

漢武帝內傳曰武帝夜夢與李少君俱上嵩高山上半道有繡衣使者乘龍持節從雲中下言太乙君召覺即告近臣曰如朕夢少君將舍朕去矣

劉根別傳曰根棄世學道入中嶽嵩山石室中崢嶸上東南下五十丈北人冬夏不衣身毛皆長一二尺顏狀如年十五時

仙經云嵩高山東南大巖下石孔方圓一丈西方北

入五六里有太室高三十餘丈周圍三百步自然明燭相見如日月無異中有十六仙人云月光童子常在天台時亦往來此中人非有道不得望見

戴延之西征記曰嵩高山巖中也東謂太室西謂少室相去七十里嵩高總名也

世記曰嵩高山北有大穴莫測其深百姓歲時每遊觀其上晉初嘗有一人誤墮穴中同輩異其儻不死乃投食於穴中墜者得之爲尋穴而行計可十許日忽曠然見明又有草屋中有二人對坐圍碁局下有

一杯白飲墜者告以饑渴碁者曰可飲此墜者飲之

書之類身 山音考之一  
氣力十倍半年許乃出于蜀中歸洛下問張華張華  
曰此仙館大夫所飲者玉漿也

俗說曰傅亮北征在黃河中垂至洛遙見嵩高山于  
時同從客在坐問傅曰潘安仁懷舊賦云前瞻太室  
傍眺嵩丘嵩丘太室故是一山何以言傍眺傅曰有  
嵩丘山去太室七十里此是書寫誤耳

〔贊〕晉郭璞太室山贊曰嵩惟嶽宗華岱恒衡氣通元  
漠神洞幽明嵬然中立衆山之英

### 華山

爾雅曰華山爲西嶽

西山經曰太華之山削成而四方其高五千仞其廣  
十里

晏子曰君子若華山然松柏旣多矣望之盡日不知  
厭

列仙傳曰修陽公者魏人止華陰山石室中中有石  
榻常臥其上石盡陷穿又曰呼子先者漢中關下卜  
師壽百餘歲臨去呼酒家媪令急裝便有仙人持二  
茅狗來至子先將一與酒媪因各騎之乃龍也上華  
陰山常於山大呼言子先酒母在此

華山記曰華山高巖四合重嶺秀起上有石池北有

石鼓父老相傳云嘗有聞其鳴者

述征記曰華山對河東首陽山黃河流于二山之間云本一山巨靈所開今睹手跡於華嶽而腳跡在首陽山下

**贊**晉郭璞華山贊曰華嶽靈峻削成四方爰有神女是挹玉漿其誰遊之龍駕雲裳

**銘**晉傅玄華嶽銘序曰易稱灋象莫大乎天地天以高明崇顯而嶽配焉地以廣厚爲基而嶽體焉若夫太華之爲鎮也五嶽列位而存其首三條分方而處其中故能忝兩儀以比德協和氣之網緼故雲行與

雨施興雷風以動物是以古先歷代聖帝明王莫不燔柴加牲尊而祀焉於虞書則西巡狩至于西嶽而親祭焉於禮則大司馬掌其分域而大宗伯典其禮祀也

**碑**後漢張昶西嶽華山堂闕碑序曰易曰天地定位山澤通氣然山莫尊於嶽澤莫盛於瀆岳有五而華處其一瀆有四而河在其數其靈也至矣人主廢興必有其應故岱山石立中宗繼統太華授璧秦胡絕緒白魚入舟姬武建業寶珪出水子朝喪位布五方則處其西列三條則居其中世宗又經集靈之宮於

其下想松喬之儔是遊是憩郡國方士自遠而至者  
充巖塞崖鄉邑巫覡宗祝乎其中者亦盈谷溢磎成  
有浮飄之志愉悅之色必雲霄之路可外而越果繁  
昌之福可降而致也故殖財之寶黃玉自出令德之  
珍卿相是毓匪惟嵩高降生中甫斯亦有焉

### 衡山

周官曰荊州之鎮山曰衡山

湘中記曰衡山九疑皆有舜廟遙望衡山如陣雲公  
湘千里九向九背乃不復見又曰南陽劉道人嘗遊  
衡山行數十里有絕谷不得前遙望見三石困二困

### 閉一困開

盛弘之荊州記曰衡山有三峯極秀一峯名芙蓉峯  
最爲竦桀自非清霽素朝不可望見峯上有泉飛派  
如一幅絹分映青林直注山下

異苑曰湘東姚祖太元末爲郡吏經衡山望巖下有  
數年少並執筆作書祖謂是行侶休息乃枉道過之  
未至百許步少年相與翻然飛颺

詩晉庾闡詩曰北眺衡山首南睨五嶺未寂坐挹虛  
恬運目情四豁翔亂凌九霄陸鱗困濡沫既體江湖  
悠安識南溟闊



廬山

山海經曰廬山名有二一曰天子都二曰天子鄩  
伏滔遊廬山序曰廬山者江陽之名嶽其大形也背  
岷流面彭蠡蟠根所據亘數百里重嶺桀嶂仰插雲  
日俯瞰川湖之流焉

遠法師廬山記曰東南有香鑪山孤峯秀起遊氣籠  
其上則焚氲若煙

神仙傳曰董奉還豫章廬山下居在山間了不佃作  
爲人治病亦不取錢物使病愈者種杏五株

張野廬山記曰廬山天將雨則有白雲或冠峯巖或

巨中嶺俗謂之山帶不出三日必雨

周景式廬山記曰匡裕周威王時生而神靈廬於此  
山世稱廬君故山取號焉又曰登廬山望九江以觀  
禹之跡其茲峯乎東南隱諸嶺不得駢矚自廬山人  
迹所暨迴望處無復出此者又甚高峻每雨其下成  
潦而上猶皎日峯頭有大盤石可坐數百人

詩宋謝靈運登廬山絕頂望諸嶠詩曰積峽忽復啓  
平塗俄已閉巒隴有合沓往來無蹤轍晝夜蔽日月  
冬夏共霜雪

宋鮑昭登廬山詩曰懸裝亂水區旅薄次山楹千巖

狀岨積萬壑勢迴縈龍從高昔貌紛亂襲前名洞澗  
窺地胤疎樹隱天經松磴上迷密雲竇下縱橫陰冰  
實夏結炎樹信冬榮又登廬山望石門詩曰明發振  
雲冠升瀋遠栖趾高峯隔半天長崖斷千里雞鳴青  
澗中猿嘯白雲裏瑤波逐穴開霞石觸峯起迴互非  
一形參差悉相似

梁江淹登廬山香鑪峯詩曰絳氣下縈薄白雲上杳  
冥中坐瞰蜿虹俛伏視流星日落長沙渚曾陰萬里  
生藉蘭素多意臨風默含情

賦宋支曇諦廬山賦曰昔哉壯麗峻極氤氳包靈竒

以藏器蘊絕峯乎青雲景澄則巖岫開鏡風生則芳  
林流芬嶺竒故神明鱗萃路絕故人跡自分巖清升  
山於玄崖世高垂化於邾亭應真陵雲以踞峯眇忽  
翳景而入冥咸豫聞其清塵妙無得之稱名也若其  
南面巍崑北背道帶懸雷分流以飛湍七嶺重嶮而  
疊勢映以竹柏蔚以檉松榮以三湖帶以九江嗟四  
物之蕭森爽獨秀於玄冬美二流之潺湲津百川之  
所衝峭門百尋峻闕千仞香鑪吐雲以像煙甘泉涌  
雷而先潤

碑梁元帝廬山碑序曰夫日月麗天皇穹所以貞觀

書之類聚 山音卷之十一 三十一  
川嶽帶地后土所以維寧廬山者亦南國之德鎮雖  
林石異勢而雲霞共色長風夜作則萬流俱響晨廳  
曉吟則百嶺齊應東瞻洪井識曳帛之在茲西望石  
梁見指寶之可拾誠後慕類易悲山中難久攀蘿結  
桂多見淹留

太行山

山海經曰太行山其首曰歸山其上有金玉下有碧  
玉

穆天子傳曰天子命駕八駿之乘赤驥之駟南征翔  
行逕絕翟道升于太行南濟于河

墨子曰墨子請耕桂嶺子曰將上太行駕驥與牛子  
將誰驅曰將驅驥以驥足貴也

尸子曰龍門魚之難也太行牛之難也以德報怨人  
之難也

戰國策曰范雎說秦王曰舉兵攻滎陽則成臯之路  
不通北壑太行之道則上黨之兵不下王舉兵而攻  
滎陽則其國斷爲三

神仙傳曰王烈入太行山忽聞山東北雷聲往視見  
山上破數百丈石中有一孔徑尺中有青泥流出烈  
取搏之隨手堅凝氣味如粳米飯

詩晉表宏從征行方山頭詩曰峩峩太行凌虛抗勢  
天嶺交氣窈然無際澄流入神玄谷應契四象悟心  
幽人來憩

### 荆山

山海經曰荆山其陰多鐵其陽多赤金

河圖括地象曰荆山爲地雌上爲軒轅星

韓子曰卞和得玉於楚山中獻厲王王使玉人相之  
曰石也刖其左足和抱其璞哭於荆山之下三日泣  
盡繼之以血

水經曰荆山在南郡臨沮縣東北

詩晉桓玄登荆山詩曰理不孤湛影比有津曾是名  
嶽明秀超鄰器栖荒外命契響神我之懷美巾駕飛  
輪

梁江淹望荆山詩曰奉詔至江漢始知楚塞長南關  
繞桐柏西岳出魯陽寒郊無留影秋日懸清光悲風  
繞重林雲霞肅川漲歲晏君如何零淚霑衣裳

### 鍾山

徐爰釋門略曰建康北十餘里有鍾山舊名金山漢  
末金陵尉蔣子文討賊戰亡靈發於山因立蔣侯祠  
故世號曰蔣山

庚闡揚都賦注曰建康宮北十里有蔣山輿地圖謂之鍾山元皇帝未渡江之年望氣者云蔣山上有紫雲時時晨見

山謙之丹陽記曰京師南北並有連嶺而蔣山獨隆崑峻異其形象龍實揚都之鎮也

孫權葬山南因山爲名號曰蔣陵

沈約宋書曰蕭思話領左衛嘗從太祖登鍾山北嶺石上彈琴因賜以銀酒鍾

詩梁沈約遊鍾山詩曰靈山紀地德地險資岳靈終南表秦館少室邇王城比阜何其峻林薄杳葱青發

地多奇嶺千雲非一狀合沓共隱天參差互相望鬱律構丹巘峻嶒起青嶂卽事旣多美臨眺殊復奇南矚儲胥觀西望昆明池山中咸可悅賞逐四時移春光發隴首秋風生桂枝多值息心侶結架山之足八解鳴澗流四禪隱巖曲

梁虞騫登鍾山下峰望詩曰冠者五六人攜手巖之際散意百仞端極目千里睇疊岫乍昏明浮雲時卷閉遙看野樹短遠望樵人細

### 北印山

魏志曰明帝即位欲平北苾令登臺觀見孟津廷尉

辛毗諫曰天地之性高高下下今而  
加以損費人功民不堪役且若九河  
而丘陵皆夷何以禦之帝乃止

朱超石與兄書曰登北芒遠眺衆美都盡光武墳邊  
杏甚美今奉送核

**詩**魏劉伶北芒客舍詩曰泱泱望舒隱黜躑玄夜陰  
寒雞思天曙擁翅吹長音蚊蚋歸豐草枯葉散蕭林  
陳醴發悴顏色覩暢真心縕被終不曉斯歎信難任  
何以除斯歎付之與瑟琴長笛響中夕聞此消曾矜  
**賦**晉張協登北芒賦曰陟巒丘之灑崦升逶迤之修

岷迴余車於峻嶺聊送目於四遠靈嶽鬱以造天連  
岡巖以蹇產伊洛混而東流帝居赫以崇顯山川汨  
其常兮萬物化而代轉何天地之難窮悼人生之危  
淺歎白日之西頽兮哀世路之多蹇於是徘徊絕嶺  
踟躇步趾前瞻狼山却闕大岨東眺虎牢西睨熊耳  
邪亘天際旁極萬里莽眩眼以茫昧諒羣形之難紀  
臨千仞而俯看似遊身于雲霓撫長風以延佇想凌  
天而舉翮瞻冠蓋之悠悠覩商旅之接軛爾乃地勢  
宏隆丘墟陂陁墳隴嶮疊基布星羅松林慘映以攢  
列玄木搜寥而振柯壯漢氏之所營望五陵之嵬峩

喪亂起而啓壤僮豎登而作歌

### 天台山

各山略記曰天台山在剡縣即是衆聖所降葛仙公山也

異苑曰會稽天台山雖非遐遠自非平生忘形不能躋也

幽明錄曰漢帝永平五年剡縣劉晨阮肇共入天台山度山出一大溪溪邊有二女子資質妙絕遂留半年懷土求歸既出親舊零落邑屋改異無復相識訊問得七世孫

孔靈符會稽記曰赤城山內則有天台靈嶽玉室璿臺

賦晉孫綽遊天台山賦序曰天台山美窮山嶽之神秀者也涉海則有方丈蓬萊登陸則有四明天台皆玄聖之所遊化靈仙之所窟宅夫其峻極之狀嘉祥之美窮山海之瑰富盡人神之壯麗矣所以不列於五嶽闕載於常典者豈不以其所立冥奧其路幽迴或倒景於重溟或匿峯於千嶺始經魑魅之塗卒踐無人之境舉世罕能登陟王者莫由禋祀理無隱而不彰啓二竒以示兆赤城霞起以建標瀑布飛流以

界道

首陽山

毛詩曰采芩采芩首陽之顛

論語曰伯夷叔齊餓于首陽之下

史記曰伯夷叔齊孤竹君之二子讓國逃去隱於首

陽山採薇而食之遂餓死首陽山

詩魏阮籍詩曰步出上東門遙望首陽岑下有採薇

士上有嘉樹林

賦漢杜篤首陽山賦曰嗟首陽之孤嶺形勢窟窟其槃

曲面河源而抗巖隴埽隈而相屬長松落落卉木蒙

蒙青羅落漠而上覆穴溜滴瀝而下通高岫帶平巖

側洞房隱於雲中忽吾覩兮二老時采薇以從容於

是乎乃訊其所求問其所修州域鄉黨親戚疋儔何

務何樂而並茲遊夫其二老乃荅余曰吾殷之遺民

也厥胤孤竹作蕃北湄少名叔齊長曰伯夷聞西伯

昌之善教育年艾於胡耆舉后切遂相攜而隨之冀寄

命乎餘壽而天命之不常伊事變而無方昌伏事而

畢命子忽遘其不祥乃興師於牧野遂干戈以伐商

乃棄之而來遊誓不步於其鄉余閉口而不食並卒

命於山傍



燕然山

漢書匈奴傳曰貳師引兵還至燕然山單于知漢軍勞倦自將五萬騎遮擊貳師軍大亂敗貳師降單于  
銘後漢班固燕然山銘曰勒以八陣蒞以威神玄甲耀日朱旗絳天遂陵高闕下雞鹿經磧鹵絕大漠斬溫禺以釁鼓血尸逐以染鏑然後四校橫徂星流彗掃蕭條萬里野無遺寇於是城滅區殫反旆而旋鑠王師兮征荒裔勦凶虐兮截海外復其邈兮亘地界封神丘兮建隆碣熙帝載兮振萬世

羅浮山

茅君內傳曰太天之內有地中之洞天三十六所羅浮山之洞周迴五百里名曰朱明曜真之天

表彥伯羅浮山疏曰遙望一石樓直上當十餘里許石樓之於山頂十分之一耳去縣三十里便見山基至所登處當百里許山皆平敞極目

羅浮山記曰羅浮者蓋總稱焉羅羅山也浮浮山也二山合體謂之羅浮在增城博羅二縣之境舊說羅浮高三千丈有七十石室七十二長溪神明神禽玉樹朱草

詩宋王叔之遊羅浮山詩曰菴藹靈嶽開景神封綿

界盤趾中天舉峯孤樓側挺增岫迴重風雲秀體卉  
木媚容

**賦**宋謝靈運羅浮山賦曰客夜夢見延陵茅山在京  
之東南明旦得洞經所載羅浮山事云茅山是洞庭  
口南通羅浮正與夢中意相會遂感而作羅浮山賦  
曰若乃茅公之說神化是悉數非億度道單悒悒古  
切洞四有九此惟其七潛夜引輝幽境朗日故曰朱  
明之陽宮耀真之陰室洞穴之寶衢海靈之雲術伊  
離情之易結諒沉念之羅浮發潛夢於永夜若愬波  
而乘桴越扶嶼之細漲上增龍之合流鼓蘭櫓以水

宿杖桂策以山遊

九疑山

山海經曰南方蒼梧之丘蒼梧之川其中有九疑山  
焉舜之所葬在長沙零陵界

楚辭九歌曰九疑紛紛兮並近

淮南子曰九疑之南陸事寡而水事多

漢書曰武帝南巡狩至于盛唐望祀虞舜于九疑

湘中記曰九疑山在營道縣九山相似行者疑惑故  
名九疑


名山略記曰九疑山漢末有張禮正魏時有治明期

古遊九疑禮正服黃精明期服澤瀉柏實後俱適西  
城若受虹景方兼以守一內外洞澈東華迎而乘雲  
升天

**詩**庾闡採藥詩曰採藥靈山嶮結駕登九疑懸巖漏  
石髓芳谷挺丹芝泠泠雲珠落漼漼玉蜜滋解景染  
冰顏妙氣翼冥期

**碑**漢蔡邕九疑山碑曰巖巖九疑峻極于天觸石膚  
合興播建雲時風嘉雨浸潤下民芒芒南土實賴厥  
勛逮于虞舜聖德光明克諧頑傲以孝蒸蒸師錫帝  
世堯而授徵受終文祖璇璣是承泰階以平入以有  
終遂葬九疑解體而升登此崔嵬託靈神仙

藝文類聚卷第七



國家圖書館. NATIONAL CENTRAL LIBRARY. TAIWAN, R.O.C.

藝文類聚卷第八

唐太子率更令弘文館學士歐陽詢撰

明 秣 陵 王元貞校

山部下

虎丘山 石門山 交廣諸山

蒜山 太平山


石帆山 岷山

石鼓山 會稽諸山

虎丘山

虎丘山銘曰晉司徒東亭獻公王珣撰云武丘山先  
名海涌山

吳越春秋曰闔廬死葬於國西北名虎丘穿土為川  
積壤為丘發五都之士十萬人共治千里使象撻土



家池四周水深丈餘，擲三重，傾水銀爲池，池廣六十步，黃金珠玉爲鳧鴈，扁諸之劍，魚腸三千在焉，葬之已三日，金精上陽爲白虎據墳，故曰虎丘。

王珣虎丘記曰：山大勢四面，周嶺南則是山，逕兩面壁立交林上，合蹊路下通，升降窈窕，亦不卒至。

詩：張正見從永陽王遊虎丘山，詩曰：滄波壯鬱鳥洛邑，鎮崇芒未若茲山，麗昭曉擅水鄉地，靈侔少室塗，艱像太行重巖標，虎據九曲峻，羊腸溜深澗，無底風幽谷，自涼寶沈餘，玉氣劍隱絕，星光白雲多，異影丹桂有藜香，遙看銀臺竦，洞塔耀山莊，瑞草生金地，天

### 花照石梁

序：晉顧愷之虎丘山序曰：吳城西北有虎丘山者，含真藏古體，虛窮玄隱，嶙嶷堆之中，望形不出，常阜至乃品，巖絕於華峯。

陳顧野王虎丘山序曰：夫少室作鎮以峻極而標奇，太華神掌以削成而稱貴，若茲山者，高不概雲，深無藏影，卑非培塿，淺異棘林，秀壁數尋，被杜蘭與苔蘚，椿枝十仞，挂藤葛與懸蘿，曲澗潺湲，浚修篁，蔭映路若絕而復通，石將頽而更綴，抑巨麗之名山，信大吳之勝壤，若乃九功六義之興，依依永和聲之製，志由興作。

情以詞宣形言詣於韶夏成文暢於鐘律由來尚矣  
未有登高能賦而韜斐麗之章入谷忘歸而忽鏗鏘  
之節故總轡齊鑣競雕蟲於山水雲合霧集爭歌頌  
於林泉于時風清邃谷景麗修巒蘭佩堪紉胡繩可  
索林花翻灑乍颺颺於蘭皋山禽轉響時弄聲於喬  
木班草班荆坐蟠石之上濯纓濯足就滄浪之水傾  
縹窵而酌旨酒剪綠葉而賦新詩肅爾若與三逕齊  
蹤鎗然似共九成借韻盛矣哉聊述時事寄之翰墨  
書陳張種與沈炯書曰虎丘山者吳岳之神秀者也  
雖復峻極異於九天隱磷殊於太一衿帶城傍獨超

衆嶺控繞川澤頤絕羣岑若具峯崖刻削窮造化之  
瑰詭絕澗杳冥若鬼神之髣髴珍木靈草茂瓊枝與  
碧葉飛禽走獸必負義而膺仁是以歷代高賢輕舉  
栖託梵臺雲起寶刹星懸自非玉牒開祥金精蘊耀  
豈其神怪若此者乎

陳沈炯答書曰若乃三江五湖洞庭巨麗寫長洲之  
茂苑登九曲之層臺山高水深雲蒸霧吐其中之秀  
異者實虎丘之靈阜焉冬桂夏柏長蘿修竹靈源秘  
洞轉側超絕遠澗深崖交羅戶穴

蒜山

劉禎京口記曰蒜山無峯嶺北縣臨江中魏文帝南望而致歌

山謙之南徐州記曰蒜山北江中有伏牛山

詩宋顏延之侍遊蒜山詩曰睿思纏故里巡駕匝舊  
堦陟峯騰輦路尋雲抗瑤臺春江壯風濤蘭野茂萸  
英宣遊弘下濟窮遠凝聖情

宋謝莊侍宴蒜山詩曰龍旌拂紆景鳳蓋起流雲轉  
蕙方因委層華正氛氲烟竟山郊遠霧罷江天分調  
石飛延露裁金起承雲

### 石帆山

盛弘之荊州記曰武陵舞陽縣有石帆山若數百  
謝靈運遊名山志曰破石溪南二百餘里又有石帆  
修廣與破石等度質色亦同傳云古有人以破石之  
半爲石帆故名彼爲石帆此名破石

銘宋鮑昭石帆銘曰應龍剖流息石橫波下溲地軸  
上躡星羅牽湘引漢飲蠡吞池西歷岷嶽北寫淮河  
渺淼泓藹積廣連深淪天測際巨海  
風柯不吟崩濤山逐鬱浪雷沉穆我  
徒悲猿鶴空駕滄煙  
陰雲旌未起  
召御不還

### 石鼓山



臨海記曰郡西白鶴山有石鼓石槌世石鼓鳴則土地寇亂隆安初此鼓屢鳴果有孫恩之賊

舊說鄴西北有石鼓懸著山旁鳴則有軍兵動零陵永正鄉有鳴石二所其一狀如鼓俗各石鼓泉陵縣有石鼓舊聞數十里今無聲

王韶之南康記曰寧都溪之西有一山狀如鼓相傳謂之石鼓去縣三里壁立百餘丈赫然似朝霞初暉異於凡石

盛弘之荊州記曰建平郡南陵縣有石鼓南有五龍山山峯巉嶢凌雲濟竦狀若龍形故因爲名

詩晉庾闡觀石鼓詩曰命駕觀竒逸徑鶩造靈山朝濟清溪岸夕憩五龍泉鳴石含潛響雷駭震九天妙化非不有莫知神自然翔霄拂翠嶺緣澗漱巖間手澡春泉潔目翫陽葩鮮

### 石門山

遠瀟師廬山記曰西南有石門山其形似雙闕壁立千餘仞而瀑布流焉

周景式廬山記曰石門山在康皇東北八十餘里是一山之大谷有澗水亦名石門澗吐源渡遠爲衆泉之宗每夏霖秋潦轉石發樹聲動數十里

劉禎京口記曰石門二山頭相對高二十餘丈廣六十餘步謂爲石門行道所經

謝靈運名山志曰石門山兩巖間微有門形故以爲稱瀑布飛瀉丹翠交曜

詩宋謝靈運登石門竄高頂詩曰晨策尋絕壁夕宿在山棲疏峯抗高館對嶺臨迴溪長林羅戶穴積石擁階基連巖覺路塞密竹使逕迷來人忘新術去子惑故蹊聒聒夕流駛噉噉夜猿啼沉冥豈別理守道自不攜心契九秋榦目翫三春萸惜無同懷客共登青雲梯又石門巖上宿詩曰朝攀苑中蘭畏彼霜下

歇暝還雲際宿弄此石上月鳥鳴識夜棲木落知風發異音同致聽殊響俱清越美人竟不來陽阿徒晞髮

書梁吳筠與顧章書曰僕去月謝病還覓薜蘿梅溪之西有石門山者森壁爭霞孤峯限日幽岫含雲深溪蓄翠蟬吟鶴唳水響猿啼英英相雜綿綿成韻旣素重幽居遂葺宇其上幸富菊華偏饒竹實山谷所資於斯已辦仁智所樂豈徒語哉

### 太平山

孔臯會稽記曰餘姚縣南百里有太平山山形似織

四角各生一種木木不雜糅三陽之辰華卉代發  
孔靈符會稽記曰餘姚江源出太平山東至淡江口  
詩齊孔稚珪遊太平山詩曰石險天貌分林交日容  
缺陰澗落春榮寒巖留夏雪

銘晉孫綽太平山銘曰鬼裁太平峻踰華霍秀嶺樊  
縕竒峯挺嶸上于翠霞下籠丹壑有士冥遊默往竒  
託肅形枯林映心幽漠亦旣覲止渙焉融滯懸棟翠  
微飛宇雲際重巒寒產迴溪縈帶被以青松灑以素  
瀨流風佇芳翔雲停藹

### 岷山

尚書禹貢岷山導江東別爲沱

河圖曰岷山之地爲井絡帝以會昌神以建福上爲天井

贊晉郭璞岷山贊曰岷山之精上絡東井始出一勺  
終致森溟作紀南夏天清地靜

### 會稽諸山

吳越春秋曰范蠡作城訖怪山自至怪山者琅邪東  
武海中山也一夕自來百姓怪之故曰怪山

孔子家語曰禹會諸侯於塗山防風氏後至禹戮之  
其骨轉車

越絕書曰雞山豕山者句踐以畜雞豕將伐吳以食

死士孔臯會稽記永興縣東北九十里有余山傳曰是塗山案越書禹娶於塗山塗山去山陰五十里檢其里數似其處也又縣東南十八里有射的山遠望的的如射侯謂之射的射的之西有石室壁方二丈謂之射堂傳云羽客之所遊憩土人常以此古穀食貴賤射的明則米賤闇則貴嗚曰射的白蚪一百射的玄蚪一千又曰縣東北六十里有土城山句踐索美女以獻吳王得諸暨羅山賣薪女西施鄭旦先教習於土城山山邊有石云是西施瀚沙石又曰東有秦望山昔秦始皇登此使李斯勒石其碑見在

孔靈符會稽山記曰會稽山南有宛委山其上有石俗呼石匱壁立于雲有懸度之險升者累梯然後至焉昔禹治洪水厥功未就乃躋於此山發石匱得金簡玉字以知山河體勢於是疏導百川各盡其宜又曰射的山西南水中有白鶴常爲仙人取箭曾刮壤尋索遂成此山也

**詩**晉王彪之登會稽刻石山詩曰隆山差峩崇巒峩崑傷覲滄洲仰拂玄霄文命遠會風淳道遠秦皇遐巡邁茲英豪宅靈基阿銘跡峻嶠青陽曜景時和氣淳修嶺增鮮長松挺新飛鴻振羽騰龍躍鱗

贊晉郭璞會稽山贊曰禹徂會稽爰朝羣臣不虔是  
討乃戮長人玉匱表夏玄石勒秦

交廣諸山

顧微廣州記曰南海增城縣有白水山有瀑布懸注  
百許丈又曰南海始昌縣有一石望之似牛向江名  
曰牛鼻山縣西有夫盧山高入雲霄世傳云上有湖  
水至甲戌日輒聞山上有鼓角笳簫鳴響又曰南海  
四會縣有金岡山行人往往見金人見形岡側又曰  
東莞寶安縣有參里山傳云曾參純孝其所居山林  
後以爲名又曰鬱林郡北有大山其高隱天上有池

有石牛在池下民常祀之歲旱百姓殺牛祈雨以牛  
血和泥厚泥石牛背祠畢天雨洪注洗石牛背泥盡  
而後晴

劉欣期交州記曰浮石山海中而峙高數十丈浮在  
水上又曰有一山神功刻鏤若射棚去石堂口百步  
夜常聞射聲

裴氏廣州記曰蒼梧彰平縣有石膏山望之皎若霜

賦宋謝靈運嶺表賦曰若乃長山款跨外內乖隔下

無伏流上無夷跡麇兔望岡而旋歸鴻雁覩峯而反  
翮旣陟麓而踐坂遂升降於山畔顧後路之傾嶮眺

前磴之絕岸看朝雲之抱岫聽夕流之注澗羅石基  
布怪譎橫越非山非阜如樓如闕斑采類繡明白若  
月蘿蔓絕攀苔衣流滑

水部上

總載水

海水

河水

江水

淮水

洛水

總載水

易說卦曰坎爲水潤萬物者莫潤於水

尚書曰湯湯洪水方割蕩蕩懷山襄陵浩浩滔天

穀梁傳曰水北爲陽水南爲陰

左傳曰汗潦之水可薦於鬼神可羞於王公

左傳曰共工氏以水紀官故爲水師而水名說文浦

水濱也

禮記曰水曰清滌又曰今夫水一勺之多及其不測  
鼃鼃蛟龍魚鼈生焉貨財殖焉

毛詩曰楊之水不流束薪

穆天子傳曰天子飲于溲水之上

尚書大傳曰非水無以准萬里之平非水無以通道  
任重也

韓詩外傳曰夫水者緣理而行不遺小似有智者重  
而下似有禮者蹈深不疑似有勇者鄣防而清似知  
命者歷險致遠似有德者天地以成羣物以生國家

以寧萬事以平此智者所以樂於水也又曰夏不數浴非愛水也冬不數煬非愛火也

論語曰智者樂水又曰子在川上曰逝者如斯夫不舍晝夜

老子曰上善若水水善利萬物而不爭處衆人之所惡故幾於道

文子曰混混之水濁可以濯吾足青青之水清可以濯吾纓又曰水之性欲清沙石穢之人之性欲平嗜欲害之

晏子曰景公問廉政何如對曰其行水也美哉水平

其濁無不塗其清無不灑

墨子曰古語曰君子不鏡於水而鏡於人鏡於水見面之容鏡於人則知吉凶

尸子曰凡水其方折者有玉其圓折者有珠清水有黃金

孟子曰觀於海者難爲水遊於聖人之門者難爲言又曰性猶湍水也決諸東方則東流決諸西方則西流人性之無分於善惡也猶水之無分於東西也

莊子曰水靜則明濁則混水靜猶明而況精神聖人之心靜乎又曰秋水時至百川灌河涘涯之間不辨

牛馬於是河伯欣然自喜以天下之美爲在己又曰夫水積也不厚則負其大舟也無力

淮南子曰往古之時九州裂水浩漾而不息於是女媧積蘆灰以止淫水又曰土地各以類生人是故清水音小濁水音大湍水人輕遲水人重

山海經曰刺山有獸焉名曰合窳見則天下大水其上有水焉甚寒而清帝臺之漿水也

玄中記曰天下之多者水焉浮天載地高下無不至萬物無不潤

博物志曰有八流水出各山渭出鳥鼠漾出嶓冢洛

出熊耳潁出少室汝出燕泉泗出陪尾溜出月台沂出太山

永嘉郡記曰有柘林水有梧桐水有桃支水

湘中記曰湘水至清雖深五六丈見底了了石子如檣蒲矢五色鮮明白沙如霜雪赤岸如朝霞

抱朴子曰左慈以氣禁水水爲逆流一二丈禁水著中庭露之大寒不冰

華陽國志曰朱倉少受學於蜀郡豆屑飲水以諷誦同業等憐其貧給米倉終不受

搜神記曰漢末零陵太守有女悅門下書佐使婢取



盥手水飲之而有娠既而生子至能行太守抱兒使  
求其父兒直上書佐膝書佐推之兒仆地爲水  
車頴秦書曰王猛攻鄴慕容評距猛而恒賣水與軍  
人衆思爲亂猛因得破之

續述征記曰梁鄒城西有籠水云齊孝婦誠感神明  
涌泉發於室內潛以績籠覆之由是無負汲之勞及  
家人疑之時其出而搜其室試發此籠而泉遂潰涌  
流漂居宇故名曰籠水

詩陳祖孫登詠水詩曰龍川紫闕映珠浦碧沙沉岸  
閣蓮香遠流清雲影深風潭如拂鏡山溜似調琴請

君看皎潔知有淡然心

賦魏文帝濟川賦曰臨濟川之魯淮覽洪波之容裔  
漉騰揚以相薄激長風而亟逝滂浩汗而難測眇不  
覩其垠際於是龜龍神嬉鴻鸞羣翔鱗介霍驛載止  
載行俯唼菁藻仰食若芳永號長吟延首相望美玉  
昭晰以曜輝明珠灼灼而流光於是遊覽既賦日亦  
西傾朱旗電曜擊鼓雷鳴長驅風厲悠爾北征思魏  
都以偃息託華屋而遨遊酌玄清于金壘騰羽觴以  
獻酬又臨渦賦曰建安八年經東國遵渦水相伴乎  
樹下駐馬書鞭作臨渦之賦曰蔭高樹兮臨曲渦微

風起兮水增波魚頡頏兮鳥逶迤雌雄鳴兮聲相和  
萍藻生兮散莖柯春水繁兮發丹華

晉應貞臨丹賦曰陟綿岡之迢邈臨窈谷之濬遐覽  
丹源之冽泉眷懸流之清派漱玄瀨而漾沚順黃崖  
而蕩博激重巖之絕根拂崇丘之飛甍然後陰乘洞  
出邊澮旁開條媚高鶩皓瑤長懷盤溢鬱沒雲轉颺  
迴屏側爲之飛隕壁岸爲之陂隤列以青林蔭以綠  
枝檉松蓊茸於其側楊柳婀娜乎其下則高溜承崖  
懸泉屬嶺別流分注冰瑩玉靜清波引鏡形無道影  
晉左九嬪涪漚賦曰覽庶類之肇化何涪漚之獨靈

稟陰精以運景因落雨而結形不係根於獨立故假  
物以資生體珠光之皎皎若凝霜之初成色鮮媚以  
熒熒似融露之將渟亾不長消存不久寄其成不欲  
難其敗亦以易也

贊晉顧愷之水贊曰湛湛若凝開神以質乘風擅瀾  
妙齊得一

晉庾肅之水贊曰湛湛涵淥清瀾澄濬妙質柔明雲  
深夜潤

晉殷仲堪水贊曰大象無形氣以分麓淡淡沖津質  
有雖虛清瀾可瀨明激弗渝孰能懷之汎然靡拘

晉孔寤子水贊曰澄鑒無虛積之成川湍飛瑩谷激石泠然

晉郭璞釋水贊曰川瀆綺錯渙瀾流帶潛潤旁通經管華外殊出同歸混之東會又弱水贊曰弱出崑山鴻毛是沉北淪流沙南映火林惟水之奇莫測其深

### 海水

尚書曰江漢朝宗于海

山海經曰無臯之山南望幼海又曰發鳩之山有鳥名曰精衛是炎帝之女徃遊于東海溺而不反是故精衛常取西山之木石以填東海又曰大荒中有山

名曰天臺海水之入焉

老子曰江海所以能爲百谷王者以其善下故能爲百谷王

淮南子曰海不讓水積以成其大

謝承後漢書曰汝南陳茂嘗爲交趾別駕刺史周敞涉海遇風船欲覆沒茂拔劍呵罵水神風即止息

博物志曰舊說大河與海通近世有居海渚者年年八月有浮楂來過甚大徃反不失期此人乃多齋糧乘楂去忽忽不覺晝夜奄至一處有城郭屋舍望室中多見織婦見一丈夫牽牛渚次飲之此人問此爲

何處答曰問嚴君平此人還問君平君平曰某年某月有客星犯牛斗即此人乎又曰漢使驃騎將軍霍去病北伐單于至瀚海而還

王隱晉書曰慕容晃上言曰臣躬征平郭遠假陛下之威將士竭命精誠感靈海爲結冰凌行海中三百餘里臣自立國及問諸故老初無海水冰凍之歲

神仙傳曰麻姑謂王方平曰自接待以來見東海三爲桑田向到蓬萊水乃淺於往者略半也豈復爲

乎陵

論語曰道不行乘桴浮於海從我者其由也與

莊子曰南海之帝爲倏北海之帝爲忽中央之帝爲

渾沌儵與忽時相與遇於渾沌之地渾沌待之甚厚倏與忽謀報渾沌之德曰人皆有七竅以視聽食息此獨無有常試鑿二竅七日而渾沌死又曰窮髮之北有溟海者天池也有魚名曰鯢化而爲鳥名曰鵬又曰東海之鼈謂埳井之鼃曰夫海千里之遠不足以舉其大千仞之高不足以極其深禹之時十年九潦而水弗加益湯之時八年七旱而涯不減損夫不爲頃久推移不以多少進退者此亦東海之大樂也又曰海水三歲一周流波相薄故地動

韓詩外傳曰成王時有越裳氏重三譯而朝曰吾受

命國之黃髮曰久矣天之不迅風雨海之不波溢也  
三年於茲矣意者中國有聖人乎盍往朝之

十洲記曰扶桑在碧海之中地一面萬里大帝之宮  
太真東王君所治處

玄中記曰天下之強者東海之惡焦焉水灌而不已  
惡焦者山名也在東海南方三萬里海水灌之而即  
消

周景式孝子傳曰管寧避地遼東經海遇風船人危  
懼皆叩頭悔過寧思誓念向曾如廁不冠即便稽首  
風亦尋靜

西域傳曰蒲昌海一名鹽澤

詩宋謝靈運遊赤石進帆海詩曰首夏猶清和芳草  
亦未歇水宿淹晨暮陰霞屢興沒周覽倦瀛壖况乃  
凌窮髮川后時安流天吳靜不發揚帆採石華挂席  
拾海月

齊謝朓望海詩曰滄波不可望望極與天平徃徃孤  
山映處處春雲生差池遠雁沒颺脊羣鳧驚

梁劉孝標登郁洲山望海詩曰滄溟聯霄岫曾嶺鬱  
憤唼下盤鹽海底上轉靈鳥翼溟渤非可辯鴻濛信  
難測輕塵久弭飛驚浪終不息雲錦曜石嶼羅綾文

水色

北齊祖孝徵望海詩曰登高臨巨壑不知千萬里雲  
島相接連風潮無極已時看遠鴻度乍見驚鷗起無  
待送將歸自然傷客子

賦後漢班叔皮覽海賦曰余有事於淮浦覽滄海之  
茫茫悟仲尼之乘桴聊從容而遂行馳鴻瀨以縹鷺  
翼飛風而迴翔顧百川之分流煥爛熳以成章風波  
薄其裊裊邈浩浩以湯湯指日月以爲表索方瀛與  
壺梁曜金瓊以爲闕次玉石而爲堂萸芝列於階路  
涌醴漸於中唐朱紫彩爛明珠夜光松喬坐於東序

王母處於西箱命輯衆與岐伯講神篇而校靈章願  
結旅而自託因離世而高遊騁飛龍之駿駕歷八極  
而迴周遂竦節而響應忽輕舉以神浮遵霓霧之掩  
蕩登雲塗以凌厲乘虛風而體景超太清以增逝麾  
天閣以啓路闢閭闔而望余通王謁於紫宮拜太一  
而受符

魏王粲遊海賦曰乘菌桂之芳舟浮大江而遙逝翼  
驚風而長驅集會稽而一睨登陰隅以東望覽滄海  
之體勢吐星出日天與水際其深不測其廣無臬章  
亥所不極盧敖所不屆懷珍藏寶神隱怪匿或無氣

而能行或含血而不食或有葉而無根或能飛而無翼鳥則爰居孔鵠翡翠鸕鶿續紛往來沉浮翺翔魚則橫尾曲頭方目偃頤大者若山陵小者重鈞石乃有賁蛟大貝明月夜光螭鼈瑇瑁金質黑章若夫長洲別島旗布星峙高或萬尋近或千里桂林聚乎其  
上珊瑚周乎其趾羣犀代角巨象解齒黃金碧玉各不可紀

魏文帝滄海賦曰美百川之獨宗壯滄海之威神經扶桑而遐逝跨天崖而託身驚濤暴駭騰踊澎湃鏗訇隱隣涌沸凌邁於是鼉鼉漸離泛濫淫遊鴻鸞孔

鵠哀鳴相求揚鱗濯翼載沉載浮仰喙芳芝俛漱清流巨魚橫奔厥勢吞舟爾乃鈞大貝採明珠蹇懸黎收武夫窺大麓之潛林覩搖木之羅生上塞產以交錯下來風之泠泠振綠葉以葳蕤吐芬葩而揚榮晉木玄虛海賦曰昔在帝媯臣唐之世洪濤瀾汗萬里無際江河既導萬穴俱流倚拔五嶽竭涸九州於廓靈海長爲委輸去聲其爲怪則乃泔澗音亦漱灑浮天無岸波如連山乍合乍散嗟吸百川洗滌淮漢若乃霾曠潛消莫振莫竦輕塵不飛纖羅不動猶尚呀呷餘波獨涌若乃邊荒速告王命急宣飛迅鼓檝浮海

凌山於是候勁風揭百尺維長梢挂帆席望濤遠決  
罔然鳥逝一越三千不終朝而濟所屆若乃負穢隘  
深虛誓愆祈則有海童邀路馬銜當蹊天吳乍見而  
髣髴蝸像暫曉而閃屍爾其大量也則南澗朱崖北  
洗天墟東演析木西薄青徐經綸溲溲萬萬有餘吐  
雲霓含龍魚隱鯤鱗潛雲居其垠則有天琛水怪鮫  
人之室瑕石詭暉鱗甲異質繁綵揚華萬色隱鮮陽  
冰不治陰火潛燃其魚則橫海之鯨突杙孤遊茹鱗  
甲吞龍舟若其毛翼產殼剖卵成禽鳧雛離襍鶴子  
淋滲羣飛侶浴戲廣浮深且其爲器也苞乾之奧括

坤之區唯神是宅亦祇是廬何竒不有何怪不儲茫  
茫積流含形內虛曠哉坎德卑以自居

晉潘岳滄海賦曰徒觀其狀也則湯湯蕩蕩瀾漫形  
沉流沫千里懸水萬丈測之莫量其深望之不見其  
廣無遠不集靡幽不通羣溪俱息萬流來同含三河  
而納四瀆朝五湖而夕九江陰霖則興雲降雨陽霽  
則吐霞曜日煮水而鹽成剖蚌而珠出其中有蓬萊  
名嶽青丘竒山阜陵別島嶼環其間其山則嶮崔嵬  
崒差峩降屈披滄流以特起擢崇基而秀出其魚則  
有吞舟鯨鯢鰓龍鬚蜂目豺口狸斑雉軀怪體異



名不可勝圖其虫獸則素蛟丹虬元龜靈鼉修鼉巨  
鼈紫貝騰虵玄螭蚘虺赤龍焚蘊遷體改角推舊納  
新舉扶搖以抗翼泛陽侯以濯鱗其禽鳥則鷗鴻鷗  
鷗鷗鷗鷗鷗朱背煒燁縹翠葱青詳察浪波之來往  
遍聽奔激之音響力勢之所迴薄潤澤之所彌廣普  
天之極大橫率土而莫兩

晉庾闡海賦曰昔禹啓龍門羣山旣鑿高明澄氣而  
清浮厚載勢廣而盤礴灌注百川控清引濁始乎濫  
觴委輸大壑若夫長風鼓怒涌浪碎盪颺波於萬里  
之間漂沫於扶桑之外於是百川輻湊四瀆橫通迴

颺泱泱聳散穹隆映曉雲而色暗照落景而俱紅驚  
浪蕘蕘眇漫澗汨瀟漭漭潺湲浮天沃日鯨鯢蘊而乍  
見虬螭涌而競遊靈鼉朱鼈出沒爭浮騰龍掣水巨  
鱗吞舟

晉孫綽望海賦曰五湖同浸九江叢漑抱河含濟吞  
淮納泗南控沅湘西引涇渭洲渚迢迢以疏屬島嶼  
綿邈以牢羅殖嵬崔之碣石構穹隆之牂柯玄奧之  
府重刃之房鱗彙萬殊甲產無方包隨珠銜夜光璣  
瑁熠爍以泓游蠃螭煥爛以映漲虛貝含素而表紫  
螺螺絡丹而帶紺青甲芬飈以微扇玄木杳眇以舒

芳其卉木則綠苔石髮蔓以流綿紫莖萑綜解以被  
渚華組依波而錦披翠綸扇風而繡舉長鯨嶽立以  
截浪劔鯨揚鬣以排流巨鼈鼉負以冠山鳥鰲呼翕  
以吞舟鷁爲羽桀鯢稱介豪翼遮半天背負重霄舉  
翰則宇宙生風抗鱗則四瀆起濤考萬川以周覽亮  
天池之綜緯彌綸八荒巨帶九地昏明注之而不溢  
尾閭洩之而不匱

齊張融海賦曰爾其海之狀也則窮區沒渚萬里藏  
岸控會河濟朝總江漢湍轉則日月似驚浪動則星  
河如覆展轉從橫揚珠起玉峯勢崇高岫形參錯或

如前而未進乍非遷而已却却瞻無後向望何前長  
尋高眺唯水與天若乃山橫盛浪風倒摧波磊若驚  
山碣嶺以竦石鬱若飛烟奔雲以振柯連瑤光而交  
彩接玉繩以通華爾其奇名出錄詭物無書高岸乳  
鳥橫關產魚蠙螭瑋綺貝繡螺玄珠牙采綠紫相  
華

### 河水

山海經曰崑崙山河水出焉又曰陽紆之山河出其  
中陵門之山河出其中

毛詩曰新臺刺衛宣公也納伋之妻作新臺于河上

而要之國人惡之而作是詩也新臺有泚河水瀰瀰  
又曰誰謂河廣一葦航之誰謂宋遠跂予望之  
左傳曰周詩有之曰俟河之清人壽幾何又曰楚昭  
王有疾卜河爲祟大夫請祭王曰江漢沮漳楚之望  
也河非所獲罪遂弗祭

穀梁傳曰梁山崩壅遏河三日不流晉君召伯尊伯  
尊過遇輦者問焉輦者曰君親素縞帥羣臣哭之既  
而祠焉伯尊至君問之伯尊如其言而河流矣

孝經援神契曰河者水之伯上應天漢

呂氏春秋曰古龍門未開呂梁未發河出孟門大溢

逆流名曰洪水禹乃決流疏河爲彭澧之漳所活者  
千八百國此禹之功也

史記曰元光中河決於瓠子於是天子已用事萬里  
沙則還臨決河沉白馬玉璧於河令羣臣從官自將  
軍以下皆負薪填決河而取淇園之竹以爲撻天子  
旣臨河決悼功之不成乃作瓠子之歌又曰秦滅六  
國自以獲水德之瑞更名河曰德水

韓詩外傳曰申徒狄非其世將自投於河崔嘉聞而  
止之曰聖仁之人民之父母也今爲濡足不救溺人  
可乎申徒曰昔桀殺龍逢紂殺比干而亾天下吳殺

子胥陳殺泄冶而滅其國非無聖智不用故也遂負石而沉於河

淮南子曰河以透虵故能遠又曰河水九折注海而流不絕者有崑崙之輸也

物理論曰河色黃赤衆川之流蓋濁之也百里一小曲千里一大曲一直

爾雅曰水自河出爲雍河出崑崙墟色白

山海經曰積石之山其下有石門河水冑以西

南流

莊子曰河潤九里澤及三族

楚辭曰與汝遊兮九河衝風起兮水揚波

**詩**梁范雲度黃河詩曰河流迅且濁湯湯不可凌檜

檝難爲榜松舟纔自勝空亭偃舊木荒疇餘故塋王

親行人跡但見狐兔興寄言河上老此水何當澄

**賦**晉成公綏大河賦曰覽百川之弘壯莫尚美於黃

河發崑崙之峻極出積石之差峩

魏應瑒靈河賦曰咨靈川之遐原于崑崙之神丘衝

積石之重險披山麓而溢浮涉津路之峻泉播九道

乎中州汾鴻踊而騰驚恒疊疊而徂征肇乘高而迅

逝陽侯沛而振驚有漢中葉金隄隕而瓠子傾興萬

乘而親務董羣后而來營下淇園之豐篠投玉璧而

沉星若夫長杉峻檟茂括芬樞扶流灌列映水陰防  
隆條動而暢清風白日顯而曜殊光

**頌**宋鮑昭河清頌曰夫四皇六帝樹聲長世大寶也  
澤浸羣生國富刑清鴻德也制禮裁樂淳風遷俗文  
教也誅筆羯黠束頽象闕武功也鳴鳥躍魚滌穢河  
渠至祥也大寶鴻德文教武功其崇如此幽明同贊  
神祇與能厥應如彼唯天爲太堯實則之抑又聞之  
勢之所覃者淺則美之所傳者近道之所感者深則  
慶之所流者遠聖命誰謚皇歷攸歸謀從筮協神與  
民推黃旗西映紫蓋東暉納瑞璃玉升政衡璣注彼

四瀆媚此雙川伏靈遙紀閱貺遐年澄波崑丘鏡流  
葱山

**銘**後漢李尤河銘曰洋洋河水赴宗于海經自中州  
龍圖所在昔周武諸侯會于孟津魚入王舟乃往剋  
殷大漢承緒懷附遐鄰邦事來濟各貢厥珍

江水

尚書禹貢岷山導江東別爲沱又曰三江旣入震澤  
底定

春秋元命苞曰牛女爲江潮江潮者所以開神潤化  
故其氣湍急

孫卿子曰子路盛服見孔子孔子曰由是襜褕者何  
也在昔江出於汶山其始出源可以濫觴及其至江  
之津也不方舟不避風不可涉也非唯下流水邪今  
汝衣服既盛顏色充盈天下且孰肯諫汝乎  
列女傳曰楚昭王貞姜齊女也昭王出遊留夫人漸  
臺江水大至使使者迎夫人忘持符夫人不肯出使  
者還取符未及臺已壞流水而死又曰廣漢姜詩妻  
事姑至孝姑好飲江水水去家七里妻常雞鳴泝流  
而汲而阻風雪不時得水詩責遣之妻寄隣家紡績  
給與詩聞追還舍側立有涌泉出味如江水

謝承後漢書曰吳郡王闔渡錢塘江遭風船欲覆闔  
拔劍斫水罵伍子胥水息得濟

吳志曰魏文帝出廣陵望大江曰彼有人焉未可圖  
也乃還

吳錄曰書云三江既入震澤底定震澤吳西南太湖  
也又曰步騭表言此降人說北多作布囊欲以盛沙  
塞大江吳主見呂岱說騭言北欲以沙囊塞江每讀  
其表輒獨失笑此江自開闢以來寧可以囊塞之乎

詩梁沈約泛永康江詩曰長枝萌紫葉清源泛綠苔  
山光浮水至春色犯寒來臨睨信永矣望美曖悠哉

寄言幽閨妾羅袖勿空裁又渡新安江貽京邑遊好  
詩曰眷言訪舟客茲川信可珍洞澈隨深淺皎鏡無  
冬春千仞寫高樹百丈見遊鱗紛吾隔躑躅寧可濯  
衣巾願以潺湲水霑君纓上塵

梁任昉濟浙江詩曰昧旦乘輕風江湖忽來往或與  
歸波送乍逐翻流上近岸無暇目遠峯更興想綠樹  
懸宿根丹崖頽久壞又嚴陵瀨詩曰羣峯此峻極參  
差百重嶂清淺旣漣漪激石復奔壯神物徒有造終  
然莫能狀

梁劉孝綽和太子落日望水詩曰川平落日迴落照

滿川漲復此淪波地派引別沮漳耿耿流長脉熠熠  
動輕光臨泛自多美况乃還故鄉榜人夜理檝棹女  
閨成粧欲待春江曙爭塗向洛陽

梁王臺卿臨滄波詩曰高軒臨不測清江窮廣深天  
邊生岸影水上結雲陰風來白華起潮滿黃沙沉又  
泛江詩曰春江下白帝盡舸向黃牛錦纜迴沙磧蘭  
橈避荻洲濕花隨水泛空巢逐樹流岸社多喬木山  
城足迴樓

陳陰鏗晚出新亭詩曰大江一浩蕩離悲足幾重潮  
落猶如蓋雲昏不作峯遠戍唯聞鼓寒山但見松九

十方稱半歸途詎有蹤

賦東晉郭璞江賦曰咨五才之並用寔水德之靈長  
惟岷山之導江初發源於濫觴總括漢泗兼包淮湘  
并吞沅澧汲引沮漳源二分於岨崧流九派乎潯陽  
鼓洪濤於赤岸淪餘波於柴桑注五湖以漫漭灌三  
江而溯沛漉汗六州之域經營炎景之外呼吸萬里  
吐納靈潮自然往復或夕或朝若乃巴東之峽夏后  
䟽鑿絕岸萬丈壁立霞駁碧沙遺迤而往來巨石磳  
砢以前却魚則江豚海豨叔鮪王鱣鰐鯨鱗鮪鮫鯨  
鱗鯁爾其水物怪錯則有王珧海月土肉石華瑣蚌

腹蟹水母目蝦紫蚌如渠洪蚶專車瓊蚌晞曜以瑩  
珠石蚌應節而揚葩若乃龍鯉一角竒鶻九頭有鼈  
三足有龜六眸頰蟹肺躍而吐璣文魷磬鳴以孕瑇  
駢馬騰波以噓蹠水兕雷咆乎陽侯霄布餘糧星離  
沙鏡青綸競紉縟組爭映石帆蒙籠以蓋嶼萍實時  
出而漂泳其下則金礦丹礫雲精燭銀鳴石列乎陽  
渚浮磬肆乎陰濱其羽族則有晨鵠天雞鴈鷺鷗駮  
千類萬聲自相誼聒繁蔚芳籬隱謁水松涯灌芊蕞  
潛蒼葱龍爰有包山洞庭巴陵地道潛達傍通幽岫  
窈窕金精玉英瑱其裏瑤珠怪石絳其表海童之所



巡遊琴高之所靈矯冰夷倚浪以傲睨江妃含嘖而  
聯聒若乃宇宙澄寂八風不翔舟子於是搦櫂涉人  
於是櫂檣漂飛雲運舩艗舳相屬萬里連檣汧洄  
汧流或漁或商長風颺以增扇廣莫颺音麗而氣整徐  
而不颺疾而不猛鼓帆迅越趨漲截澗倏忽數百千  
里俄頃於是蘆人漁子擯落江山衣則羽褐食惟蔬  
鱸或揮輪於懸碕或中瀨而橫旋忽忘夕而宵歸訊  
采凌以叩舷及其謫變儵悅符祥非一動應無方感  
事而出經紀天地錯綜人術妙不可盡之於言事不  
可窮之於筆

晉庾闡涉江賦曰發中州之曲洑昔石頭之岩咀溯  
晨風而遙邁乘濤波而容與於是時也夕日將昏天  
吳駭奔陽侯漂海若泛江豚爾乃雲霧勃起風流溷  
淆排岩拒瀨觸石興濤澎湃洗溷鬱怒咆哮連波  
以岳墜壑后土而川窅總百川之殊勢集朝宗乎滄  
浪注天波於析木歛東極乎扶桑體含弘而彌泰道  
謙尊而逾光齊山海以比量冠百谷而稱王此則水  
之勢也且夫山川環怪水物含靈鱗千其族羽萬其  
名毛羣詭觀倮類殊形明月晞光以夕耀金沙逐波  
而吐瑛撫檝中流汨徂西土過乎歷陽之津迄乎橫

江之浦若乃越三江之下口聊濡須以逕渡邈天險  
之遐勢歷習坎之重固川瀆泓澄以含景山水泮滌  
而鱗布

晉曹毗涉江賦曰迄趙屯歷彭川修岸靡靡莞葦芊  
芊紫蓮被翠波而抗英碧楫乘天岸而星懸百籟夕  
奏山精夜燃狂飈蕭瑟以洞駭洪濤突兀而橫峙爾  
乃江狶彭瀛夜火輝煥凌錯吐飈駭鯨噴瀾采蜂於  
是汎波文魚於是登岸

歌晉夏侯湛江上泛歌曰悠悠兮遠征條條兮暨南  
荆南荆兮臨長江臨江河兮討不庭江水兮浩浩長

流兮萬里洪浪兮雲轉陽侯兮奔起驚翼兮垂天鯨  
魚兮岳峙靡蕪紛兮被臯陸修竹鬱兮翳崖趾望江  
之南兮遨目桂林桂林蓊鬱兮鷓鴣揚音凌波兮願  
濟舟楫不具兮江水深沉嗟迴盼於北夏何歸軫之  
難尋

### 淮水

尚書禹貢曰道淮自桐柏

毛詩曰率彼淮浦省此徐土

水經曰淮水出南陽平氏縣昭稽山東北過桐柏

山海經曰淮水出餘山山在朝陽義鄉西入海

賦魏文帝浮淮賦曰建安十四年師自譙東征大興本軍泛舟萬艘雖孝武舳艫千里殆不過也沂淮水而南邁泛洪潭之皇波仰岩岡之隆阻經東山之曲阿於是驚風泛涌波駭衆帆張群權起爭先逐進莫過適相待

魏王粲浮淮賦曰從王師以南征浮淮水而遐逝背渦浦之曲流望馬丘之高濞於是迅風興濤波動長瀨潭浪湧沛涵溶

漢水

山海經曰蟠冢之山漢水出焉東南流注於江

尚書禹貢曰嶓冢道漾東流爲漢

毛詩曰漢廣德廣所及也文王之化被乎南國美化行於江漢之域漢有游女不可求思

左氏傳曰屈完謂齊桓公曰楚國方城以爲城漢水以爲池

詩梁簡文帝玩漢水詩曰雜色崑崙水泓澄龍首渠豈若茲川麗清流疾且徐離離細磧淨藹藹樹陰疏石衣隨溜卷水芝扶浪舒連翩寫去檝鏡澈倒遙墟聊持點纓上於是察川魚

賦後漢蔡邕漢津賦曰夫何大川之浩浩披厚土以

載形納陽谷之所吐兼漢沔之殊名總畎澮之群液  
演西土之陰精過曼山以左迴遊襄陽而南縈於是  
遊目騁觀南援三州北集京都上控隴坻下接江湖  
導財運貨懋遷有無既乃風焱簫瑟勃焉並興陽侯  
沛以奔驚洪濤涌以沸騰願乘流以上下窮滄浪乎  
三滋觀固宗之形兆看洞庭之交會

洛水

山海經曰洛水出洛西山東北注河入成臯之西  
易曰河出圖洛出書聖人則之  
尚書曰道洛自熊耳東北會於澗瀍

國語曰靈王二十二年穀洛龍鬪將毀宮室王欲壅  
之太子晉曰夫山土之聚也藪物之歸也川氣之導  
也澤水之鍾也夫水聚於高歸於下今吾執政無乃  
實所僻而禍夫二川之神王卒壅之王室大亂  
淮南子曰雒水輕利宜禾  
謝承後漢書曰沛國陳宣建武十年雒水出造天津  
城門或欲築塞之宣諫曰昔王尊正身金堤水退況  
聖人邪言未絕而水去  
漢官典職曰德陽殿周遊容萬人自偃師去宮四十  
五里激洛水於殿下

詩太宗皇帝臨洛水詩曰春蒐馳駿骨揔轡俯長河  
霞處流縈錦風前澆卷羅水花翻照樹隄蘭倒插波  
豈必汾陰曲秋雲發棹歌

蘇味道和受圖溫洛詩曰綠綺應河檢青壇俯洛濱  
天旋俄制蹕孝享屬嚴禋陟配光三祖懷柔洎百神  
霧開中道日雪斂屬車塵預奉咸英奏長歌億萬

李嶠和拜洛詩曰七萃鑿輿動千年瑞檢開文如龜  
貝出圖似鳳銜來殷薦三神享明祠萬國陪周旗黃  
鳥集漢幄紫雲迴日暮鈎陳轉清歌上帝臺

牛鳳及和受圖溫洛詩曰八神承玉輦六羽驚瑤溪

戒道伊川北通旌澗水西御圖開洛匱刻石與天齊  
瑞日波中上仙禽霧裏低微臣矯弱翮抃舞接鸞鷲

賦魏曹子建洛神賦曰余從京城言歸東藩背伊闕  
越轅轅經通谷凌景山容與乎陽林流眄乎洛川覩  
一麗人于巖之畔乃援御者而告之曰彼何人斯若  
此之艷也御者對曰臣聞河洛之神名曰宓妃君王  
所見無乃是乎余告曰其形也翩若驚鴻婉若游龍  
鬋鬢兮若輕雲之蔽月飄颻兮若流風之迴雪於是  
忽焉縱體以游以嬉左倚采旄右蔭桂旗攘皓腕於  
神許採湍瀨之玄芝收和顏而靜志兮申禮防以自

持爾乃衆靈雜選命儔嘯侶或戲清流或翔神渚或  
采明珠或拾翠羽從南湘之二妃攜漢濱之游女體  
迅飛鳧飄忽若神凌波微步羅襪生塵於是屏翳收  
風川后靜波馮夷鳴鼓女媧清歌騰文魚以警乘鳴  
玉鑿以偕逝六龍儼其齊首載雲車之容裔

藝文類聚卷之八

藝文類聚卷第九

唐太子率更令弘文館學士歐陽詢撰

明

秣

陵

王元貞校

水部下

壑

四瀆

瀟

泉

湖

陂

池


溪

壑

山海經曰東海之外有大壑

列子曰渤海之東不知幾億萬里有大壑實惟無底之谷

莊子曰諄芒東之大壑遇苑風於東海濱苑風曰子將之大壑奚為夫壑之為物注焉而不滿取焉而不



竭又曰藏舟於壑藏山於澤謂之固矣然而夜半有力者負之而走昧者不知也

離騷曰降望大壑

賦梁簡文帝大壑賦曰渤海之東不知幾億大壑在焉其深無極悠悠既湊滔滔不息觀其浸受壯其吞匿歷詳衆水異導殊名江出濯錦漢吐珠瑛海逢時而不通河遇聖而知清嗟乎使夫懷山之水積天漢之流駛彭濟與渭濕俱臻四瀆與九河同至余乃知巨壑之難滿尾閭之爲異

#### 四瀆

爾雅曰江河淮濟爲四瀆四瀆者發源注海者也  
桓譚新論曰四瀆之源最高而長從高注下其流激浚故爲平地災害

博物志曰四瀆濟出王屋山其江河淮所出已具別卷

碑周王褒四瀆祠碑銘曰靈祠岳立貝關雲浮寂寥詭怪髣髴神遊姬嬴分國河渭合流桃花春水靈草孤洲潼鄉河曲汾陰睽壤亂流不度龍門難上河魚送迎江妃來往水開通跡山臨高掌智以藏往神以知來榮光離合雲氣徘徊水仙遺操津吏餘杯波息



川后浪靖瞻臺

濤

廣雅曰陽侯濤大波也

吳越春秋曰吳王賜子胥劍遂伏劍而死吳王乃取子胥之尸盛以鴟夷之器投之江海子胥因隨流揚波成濤激岸隨潮來往

論衡曰儒書言吳王夫差殺伍子胥煮之於鑊盛以囊投之於江子胥恚恨臨水爲濤溺殺人夫言吳王殺伍子胥投之於江實也言其恨恚臨水爲濤者虛也衛菑子路而漢烹彭越子胥勇猛不過子路彭越

然二士不能發怒於鼎鑊之中子胥亦然首先入鼎鑊後乃入江在鑊之時其神豈怯而勇於江水哉何其怒氣前後不相副也

博物志曰東海中有牛魚其形如牛剝其皮懸之潮水至則毛起潮去則伏

詩晉蘇彥於西陵觀濤詩曰洪濤奔逸勢駭浪駕丘山句隱振宇宙滿磕津雲連

梁徐昉賦得觀濤詩曰雲容雜浪起楚水漫吳流漸看遙樹沒稍見遠天浮漁人迷舊浦海鳥失前洲不測滄溟曠輕鱗幸自游

賦晉顧愷之觀濤賦曰臨浙江以北眷壯滄海之宏  
流水無涯而合岸山孤映而若浮既藏珍而納景且  
激波而揚濤其中則有珊瑚明月石帆瑤瑛彫鱗采  
介特種竒名崩巒填壑傾堆漸隅岑有積螺嶺有懸  
魚謨茲濤之爲體亦崇廣而宏浚形無常而叅神斯  
必來以知信勢剛凌以周威質柔弱以協順  
晉曹毗觀濤賦曰伊山水之遠廻何秋月之淒清瞻  
滄津之騰起觀雲濤之來征爾其勢也發源溟池廻  
衝天井灑拂滄漢遙櫟星景伍子結誓於陰府洪湍  
應期而來騁汨如八風俱臻隗若崑崙抗嶺

晉伏滔望濤賦曰若夫金祗理纈素月吉望宏濤於  
是鬱起重流於是電驤起沙渟而迅邁觸橫門而剋  
壯灌江津而砰磕鼓赤岸而激揚鬱律煙騰隗兀連  
罡重疊巘而天竦洄湍澗而起漲

### 泉

爾雅曰泉一見一否爲濺濫泉正出正出涌出也沃  
泉懸出懸下出也汎泉仄出仄出旁出也  
論語撰考識曰水名盜泉仲尼不嗽

呂氏春秋曰太公釣於滋泉

淮南子曰崑崙四水者帝之神泉以和百藥以潤萬

物

東觀漢記曰耿恭爲校尉居疎勒匈奴來攻城中穿井十五丈無水恭曰聞二師將軍拔佩刀刺山而飛泉出今漢德神靈豈有窮乎乃正衣冠向井拜爲吏請禱有頃井泉噴出

應邵漢官儀曰酒泉城下有金泉泉味如酒故曰酒泉

吳郡錄曰始興有始興山山出溫泉

天門零縣有溫泉丹陽江乘縣有湯山出溫泉二所可以淪雞

廣志曰溫泉西者在新豐北者在廣平有美泉出漑種出穀香美在汲郡

新成縣有冷泉水冷如冰在湖縣有鹽泉煮則爲鹽有醴泉用之愈疾

晉安帝紀曰吳隱之性廉操爲廣州刺史界有一水謂之貪泉古老云飲此水者廉士皆貪隱之始踐境先至水所酌而飲之因賦詩以言志若使夷齊飲終當不易心清操逾厲

宣城記曰臨城縣南四十里有蓋山百許步有姑舒泉昔有舒女與其父析薪於此泉女因坐牽挽不動

乃還告家比還唯見清泉甚然女母曰吾女好音樂  
乃作絃歌泉涌洄流有朱鯉一雙令人作樂嬉戲泉  
故涌出

漢水記曰漢水有溫泉方圓數十步冬夏常沸涌望  
見白氣衝天能差百病

江乘地記曰東南三十五里有湯泉半冷半温共同  
一壑

盛弘之荊州記曰新陽縣惠澤中有溫泉冬月未至  
數里遙望白氣浮蒸如煙上下采映狀若綺䟽又有  
車輪雙轆形世傳昔有玉女乘車自投此泉今人時

見女子姿儀光麗往來倏忽又曰夷道縣句將山下  
有三泉傳云本無此泉居者皆苦遠汲人人多賣水  
與之有一女子孤貧繼縷無以貿易有一乞人衣麗  
貌醜瘡痍竟體村人見之無不穢惡唯女子獨加哀  
矜割飯飴之乞人食畢曰我感姬行善欲思相報爲  
何所須女荅曰何恩可報且今所須之物非君能得  
因問所須女子曰正願此山下有水可汲乞人乃取  
腰中書刀刺山下三處即飛泉涌出因便辭去忽然  
不見

括地圖曰負丘之山上有赤泉飲之不老神宮有英

泉飲之眠三百歲乃覺不知死

十洲記曰瀛洲有玉膏山出泉如酒味名爲玉酒

**詩**北齊劉逖浴湯泉詩曰驪岫猶懷玉新豐尚有家  
神井堪銷癘溫泉足蕩邪紫苔生石岸黃沫擁金沙  
振衣殊未已翻然停使車

**賦**後漢張衡溫泉賦曰陽春之月百草萋萋余在遠  
行顧望有懷遂適驪山觀溫泉浴神井風中鬘壯厥  
類之獨美思在化之所原覽中域之珍無斯水之神  
靈控湯谷于瀛洲濯日月乎中營陰高山之北延處  
幽屏以閒清於是殊方交涉駿奔來臻士女擘其鱗

萃紛雜選其如綉

晉傅咸神泉賦序曰余所居庭前有涌泉在夏則冷  
涉冬而溫溫則水物冬生冷則冰可以過每夏遊之  
不知歲之有暑耳惟茲神泉厥理難原在冬則溫旣  
夏而寒混混洋洋載清載瀾遂乃壇以文石樹之柳  
杞密葉雲覆重蔭蔽止氣泠泠以含涼風肅肅而恒  
起于時朱明紀運旭日馳光鬱鬱隆暑赫赫太陽盥  
玉體於素波身婁焉而自清不知天時之有暑忽謂  
繁霜之墮庭逮至旻秋旣逝司寒騁節六合蕭條嚴  
風凜冽河洛輟流太陰凝結彼澹澹而含凍此灼灼

而含熱綠竹猗猗荇藻青青是託斯茂是殖斯榮

**碑**周王褒溫湯碑曰原夫二儀開闢雷風以之通響五材運行水火因而並用炎上作苦既麗純陽之德潤下作鹹且協疑陰之度至於遷陵熱溪沉魚涌浪炎洲燒地穴鼠含煙火井飛泉垂天遠扇焦源沸水衝流迸集甘川浴日跳波邁椒丘之野湯谷揚濤激水疾龍門之箭故以地伏流黃神泉愈疾云云其銘曰挺此溫谷驪岳之陰白礬上徹丹沙下沉華清駐老飛流瑩心谷神不死川德愈深

周庾信溫湯碑曰咸池浴日先應綠甲之圖砥柱浮天始受玄夷之命仁則滌蕩埃氛義則激揚清濁勇則負山餘力弱則鴻毛不勝仲春則榆筴同流三月則桃花共下其色變者流爲五雲之漿其味美者結爲三危之露煙青於銅浦色白於鉛溪非神鼎而長沸異龍池而獨涌灑胃前腸興羸起瘠秦皇餘石仍爲鴈齒之階漢武舊陶即用魚鱗之瓦山間湧水實表忠誠室內江流彌彰純孝豈若醴泉消疾聞乎建武之朝神水蠲痾在乎咸康之世嵩山三仙之館不孤擅於天池華陰百丈之泉豈獨高於蓮井

湖

說文曰湖大陂也揚州浸有五湖水澤所仰以溉灌也

越絕書曰太湖周三萬六千頃

神異經曰北方荒外有石湖其水冰

淮南子曰夫歷陽之都一夕反而爲湖歷陽淮南國名昔有老嫗常行仁義有兩書生過之謂曰此國當沒爲湖視東城門閫有血便走上山勿反顧也自爾此嫗數往視門閫吏問之嫗對如其言暮門吏殺雞以血塗門明日嫗早往視門血便走上山國沒爲湖風俗通曰越滅吳范蠡乘舟於五湖

語林曰褚公與孫綽遊曲阿後湖狂風忽起舫欲傾褚公已醉乃曰此舫人皆無可以招天譴者唯有與公多塵滓正當以厭天欲耳便欲捉擲水中孫遽無計唯大啼曰季野卿念我

述異記曰桓冲爲江州刺史乃遣人周行廬山冀覩靈異旣陟崇巘有一湖匝生桑樹有大羣曰鸞湖中有敗艚赤鱗魚

劉道真錢塘記曰明聖湖在縣南去縣三里父老相傳湖有金牛

鄭緝之東陽記曰北山有湖故老相傳云其下有居

民曰徐公者常登嶺至此處見湖水湛然有二人共博於湖間自稱赤松子安期先生有一壺酒因酌以飲徐公徐公醉而寐其側比醒不復見二人而宿草攢蔓其上家人以爲死也喪服三年服竟徐公方反今其處猶爲徐公湖

裴氏廣州記曰廬山頂有湖廣數頃有楊梅山桃止得於上飽噉不得持去

秦州記曰武都山前有湖冬夏無增減義熙初有白龍於此湖升天

鄧德明南康記曰平固縣覆笥山上有太湖周數十

里靈果異物皆不可識又有石鴈浮在湖中每至秋天石鴈飛鳴如候時也

風土記曰陽羨縣東有太湖中有包山山下有洞穴潛行地中云無所不通謂之洞庭地脉也

荆山記曰巴陵南有青草湖周迴百里日月出沒其中湖南有青草山故因爲名

詩晉李顥涉湖詩曰旋經義興境弭棹石蘭渚震澤爲何在今唯太湖浦圓徑縈五百眇目緬無覩高天淼若岸長津雜如縷

宋孝武濟曲阿後湖詩曰宵登毗陵路旦過雲陽郭



平湖曠津濟菰渚迭明蕪和風翼歸采夕氛晦山嶠  
驚瀾翻魚藻頰霞照桑榆

宋謝靈運石壁還湖中作詩曰昏旦變氣候山水含  
清暉清暉能娛人遊子澹忘歸出谷日尚早入舟陽  
已微林壑斂暝色雲霞收夕霏芰荷迭映曖蒲稗相  
因依披拂趨南逕愉悅偃東扉

宋謝惠連汎南湖至石帆詩曰軌息陸塗初柁鼓川  
路始漣漪繁波漾參差層峯峙蕭疎野趣生逶迤白  
雲起登陟苦跋涉瞬眄樂心耳即翫翫有竭在興興  
無已

梁元帝泛蕪湖詩曰桂潭連菊岸桃李映成蹊石文  
如濯錦雲飛似散珪橈度菱根反船去荇枝低颿隨  
迎雨燕鼓逐伺潮雞

梁范雲治西湖詩曰史氏導漳水西門漑河潮圖始  
未能悅克終良可要擁錡勸年首提爵勞春朝平臯  
草色嫩通林鳥聲嬌已集故池鷺行蒔新田苗何吁  
畚築苦方驩魚稻饒

陳陰鏗渡青草湖詩曰洞庭春溜滿平湖錦颿張源  
水桃花色湘流杜若香冗去茅山近江連巫峽長帶  
天澄迥碧映日動浮光行舟逗遠樹渡鳥息危檣滔

滔不可測一葦詎能航

陳劉刪汎官亭湖詩曰迴艫乘派水舉帆逐分風滉  
漾疑無際飄揚似度空檣鳥排鳥路船影沒河宮孤  
石滄波裏匡山苦霧中寄言千金子安知萬里蓬

**賦**吳楊泉五湖賦曰乃天地之玄源陰陽之所徂上  
值箕斗之精與雲漢乎同模受三方之灌溉爲百川  
之巨都居揚州之大澤苞吳越之具區南與長江分  
體東與巨海合流太陰之所苾玄靈之所遊追湖水  
而往還通蓬萊與瀛洲爾乃詳觀其廣深之所極延  
袤之規方遯乎浩浩湯乎洋洋西合乎濛汜東苞乎

扶桑日月於是出入與天漢乎相望左有苞山連以  
醴瀆岸頽崔嵬穹窮紆曲右有平原廣澤萼延芴薄  
原隰陂阪各有條格茹蘆菹藪隱軫有錯衝風之所  
去零雨之所薄

陂

毛詩曰彼澤之陂有蒲與荷

史記曰高祖母曰劉媪常息大澤之陂夢與神遇  
淮南子曰譬若同陂而溉田其愛水均也

續漢書曰郭泰入汝南交黃叔度至南州先過表奉  
高不宿而去從叔度累日或以問泰泰曰表奉高之

器譬諸軌濫雖清而易挹也叔度之器汪汪若萬頃之陂澄之而不清混之而不濁不可量也

魏略曰明帝出次摩陂有龍見於井中帝出觀因改摩陂爲龍陂

漢宮殿疏曰鴈鷺陂蓋地六頃承昆明池下流

抱朴子曰葛仙公每飲酒醉常入家門前陂水中卧竟日乃出

汝南先賢傳曰鄭敬去吏隱居于蟻陂之陽以漁釣自娛彈琴詠詩常方坐於陂側

襄陽耆舊記曰宜城縣東北角有熨斗陂

**詩** 魏文帝於玄武陂作詩曰兄弟共行遊驅車出西城野田廣開闢川渠互相經黍稷何鬱鬱流波激悲聲菱芡覆綠水芙蓉發丹榮柳垂重陰綠向我池邊生乘渚望長洲羣鳥譙譙鳴萍藻泛濫浮澹澹隨風傾

**銘** 晉張載洪池陂銘曰開源東注出自城池魚鼈熾殖水鳥盈涯菱藕狎鴉稭稻連畦漸臺中起列館忝差惟水泱泱厥大難訾

池

毛詩曰東門之池可以漚麻又曰王在靈沼於物魚

躍

六韜曰殷君喜爲酒池迴船糟丘

穆天子傳曰天子西征至于玄池天子三日休于玄池之上乃奏廣樂而歸是曰樂池又曰天子觴西王母于瑤池之上西王母爲天子謠

韓詩外傳曰齊景公出弋昭華之池也

漢書曰賈山奏事吳王曰吳有諸侯之位而實富於天子游曲臺臨上路不如朝夕之池深壁高壘副以闕城不如長江之固江淮之險又曰太液池中有蓬萊方丈瀛洲象神山也

魏志曰黃初三年穿靈芝池

逸士傳曰堯讓天子於許由許由逃巢父聞之而洗耳於池

顧子曰與子華遊東池子華曰水有四德池爲一焉沐浴羣生澤流萬世仁也揚清激濁滌蕩塵穢義也弱而難勝勇也導江疏河變盈流謙智也顧子曰我得女於池上矣

華陽國志曰滇池縣有澤水周迴二百里所出深廣下流淺狹似如倒流故俗曰滇池長老傳言池中有神馬與家馬交則生駿駒世稱滇池駒日行五百里

襄陽記曰峴山南習有大魚池依范蠡養魚法種楸芙蓉菱芡山季倫每臨此池輒大醉而歸恒曰此我高陽池也城中小兒歌之曰山公何所往來至高陽池日夕倒載歸酪酏無所知

王羲之書曰張芝臨池學書池水盡黑寡人耽之若是未必後之

續述征記曰大梁西南七十里尉氏縣有蓬池

梁州記曰明月池南二里有七女池

詩魏文帝芙蓉池詩曰乘輦夜行遊逍遙步西園雙渠相灌溉嘉木繞通川卑枝拂羽蓋修條摩蒼天丹

霞夾明月華星出雲間遨遊快心意保已終百年

魏陳王曹植詩曰逍遙芙蓉池翩翩戲輕舟南陽樓雙鵠北柳有鳴鳩

梁武帝首夏泛天池詩曰薄遊朱明節泛漾天淵池舟楫互容與藻蘋相推移碧沚紅菡萏白沙青漣漪新枝拂舊石殘花落故池葉軟風易出草密路難披

梁簡文帝山池詩曰日暮芙蓉水聊登鳴鶴舟飛鱸飾羽旄長幔覆緹紉停輿依柳息住蓋影空留古樹橫臨沼新藤上挂樓魚游向闈集戲鳥逗楂流

梁庾肩吾山池應令詩曰闈苑秋光暮金塘牧潦清

荷低芝蓋出浪湧燕舟輕逆湍留棹唱帶谷聚笳聲  
野竹交臨浦山桐迥出城水逐雲峯闇寒隨殿影生  
梁王臺卿山池詩曰歷覽周仁智登臨歡豫多穿渠  
引金谷闢道出銅駝長橋時跨水曲閣乍臨波巖風  
生竹樹池香出芰荷石幽銜細草林未度橫柯  
梁鮑至山池詩曰望園光景暮林觀歇霧埃荷疎不  
礙礫石淺好縈苔風光逐榜轉山望向橋開樹交樓  
影沒岸暗水光來

後魏溫子升春日臨池詩曰光風動春樹丹霞起暮  
陰嵯峩映連璧飄颻下散金徒自臨濠渚空復撫鳴

琴莫知流水曲誰辯游魚心

周庾信奉和山池詩曰樂官多暇豫望苑暫迴輿鳴  
笳陵絕浪飛蓋歷通渠桂亭花未落桐門葉半疎荷  
風驚浴鳥橋影聚行魚日落含山氣雲歸帶雨餘又  
晚讌昆明池詩曰春餘足光景趙李舊經過上林柳  
鬢細新豐酒泛多小船行釣鯉新盤待摘荷蘭臯徒  
稅駕何處有凌波又奉和初濬池成清晨臨泛詩曰  
千金高堰合百頃浚源開翻逢積草浪更識昆明灰  
虎嘯風還急鷄鳴潮即來時看青雀舫遙逐桂舟迴  
周王褒玄圃濬池詩曰長洲春水滿臨汎廣川中石

壁如明鏡飛橋類飲虹垂楊夾浦綠新桃綠逕紅對樓還泊岸迎波暫守風漁舟釣欲滿蓮房採半空於茲臨北闕非復坐墻東又山池落照詩曰竹館掩荆扉池光晦晚暉孤舟隱荷出輕棹染苔歸浴禽時侶竄驚羽忽單飛

徐陵山池應令詩曰畫舸圖仙獸飛艫挂采旂榜人事金槩釣女飾銀鈎細萍時帶機低荷乍入舟後啼知谷晚蟬噎覺山秋又奉和山池詩曰羅浮無定所鬱島屢遷移不覺因風雨何時入後池樓臺非一勢臨翫自多竒雲生對戶石叢挂入欄枝

陳陰鏗經豐城劔池詩曰清池自湛淡神劔久遷移無復連星氣空餘似月池夾篠澄深淥含風結細滴唯有蓮華萼還想匣中雌

陳江總秋日昆明池詩曰玄沼蕭條望遊人意緒多終南雲影落渭北雨聲過蟬噪金堤柳鷺飲石鯨波珠來照似月織處寫成河詎知臨水歎非復採蓮歌隋薛道衡遊昆明池詩曰霸陵因靜退靈沼暫徘徊新船木蘭檝舊宇豫章材荷心宜露泫竹徑重風來魚潛疑刻石沙闇似沉灰

賦晉張載濛汜池賦曰麗華池之湛淡開重壤以停

源激通渠於千金承漑洛之長川挹洪流之汪濊包  
素瀨之寒泉既乃北通醴泉東入紫宮左面九市右  
帶閭風周墉建乎其表洋波廻乎其中幽瀆傷集潛  
流獨注仰承河漢吐納雲霧緣以采石殖以嘉樹水  
禽育而萬品珍魚產而無數蒼苔汎濫修條垂幹綠  
葉覆水玄蔭珍岸紅蓮煒而秀出繁葩艷以煥爛遊  
龍躍翼而上征翔鳳因儀而下觀想白日之納光觀  
洪暉之皓盱於是天子乘玉輦時遨遊排金門出千  
秋造綠池鏡清流翳華蓋以逍遙攬魚釣之所收纖  
緒挂而鱸鮪來芳餌沉而鯁鯉浮豐夥踰於巨壑信

可樂以忘憂

晉郭璞鹽池賦曰水潤下以作鹹莫斯鹽之最靈傷  
峻岳以發源池茫爾而海滄嗟玄液之潛洞羗莫知  
其所生狀委虵其若漢流漫漫以漭漭吁鑿鑿以粲  
粲色皜然而雪朗揚赤波之煥爛光盱盱以晃晃隆  
陽映而不焦洪涔沃而不長磊崔崒確鏗剡碁方玉  
潤膏津雪白凌岡粲如散璽煥若布璋爛然漢明晃  
爾霞赤望之絳承即之雪積翠塗內映頰液外羃動  
而愈生損而滋益若乃煎海鑠泉或凍或漉所瞻不  
過一鄉所營不過鍾斛飴戎見軫於西隣火井擅竒



乎巴濮豈若茲池之所產帶神邑之名嶽吸靈潤於  
河汾揔膏液乎滄涼

宋謝莊悅曲池賦曰北山兮黛柏南谿兮頽石頽岸  
兮若虹黛樹兮如畫暮雲兮十里朝霞兮千尺步東  
池兮夜未久卧西窓兮月向山引一息於寃內擾百  
緒於眼前

銘陳江總芳林園天淵池銘曰歲次執徐月維大呂  
爰命梓匠廣修畚鍤標置舊趾開浚昔基東西彌望  
雲霧之所澄蕩南北紆縈虹霓之所引曜曉川漾壁  
似日御之在河宿夜浪浮金疑月輪之馳水府前瞰

萬雉列榭叅差却拒三襲危巒聳峭瓌鳥異禽自學  
歌舞神木靈卉不知搖落但叔皮覽海序螭蛟之泛  
濫吉甫臨舟美檉松之蒼茸尚復著在吟詠緘彼緹  
緗况我君門盛事未紀謬頒待詔謹製銘云石溝溜  
密蘭渚潮平九華閣道百丈層盈液搖殿色殿寫波  
明

表晉江道諫鑿北池表曰伏承當鑿北池及立閣道  
雖湫阨陋小用功甚微又後不擾民賦不及外至簡  
至約誠不可加然於愚懷實有眷眷

谿

爾雅曰水注川曰谿山瀆無所通曰谿

管子曰桓公北征孤竹至卑耳之谿

俗說曰郝僧施青溪中汎到一曲之處輒作詩一篇  
謝益壽見詩笑曰青溪之曲復何窮盡

武昌記曰樊山東有小谿夏時懷袖恒有寒氣故謂  
之寒谿

裴氏廣州記曰管谿周圍丈餘水極沸涌如猛火煎  
油聲

荊州記曰酈縣北五十里有菊谿源出縣西北五十  
里石澗山東南流會專水兩岸多甘菊

盛弘之荊州記曰桂陽郡西南宿山水出注大谿號  
曰橫谿水甚深冬夏不乾俗謂之貪泉飲者輒冒於  
財賄

詩梁任昉泛長谿詩曰徇祿聚歸糧依隱謝鞞勒絕  
物甘離群長懷忽去國長谿永東舍震區窮水域道  
遇垂綸叟聊訪問津惑弭檝申九言無爲累牽纒長  
汎滄浪水平明至曛黑又落日汎舟東谿詩曰黝黝  
桑柘繁芑芑麻麥盛交柯谿易陰反景澄餘映吾生  
雖有待樂天庶知命不學梁甫吟唯識滄浪詠田荒  
我有役秩滿余謝病

賦宋謝靈運長谿賦曰潭結綠而澄清瀨揚白而戴華飛急聲之瑟洎散輕文之漣羅始鏡底以如玉終積岸而成沙

谷

爾雅曰水注谿曰谷

毛詩曰葛之覃兮施于中谷維葉萋萋又曰伐木丁丁鳥鳴嚶嚶出自幽谷遷于喬木又曰皎皎白駒在彼空谷

老子曰谷得一以盈谷無以盈將恐竭

韓子曰昔齊桓公入山問父老此爲何谷荅曰臣舊

畜牛生犢以子買駒少年謂牛不生駒遂持而去傷鄰謂臣愚遂名爲愚公谷

韓詩外傳曰孔子南遊適楚至於阿谷之隧有處子佩璜而浣者孔子抽觴以授子貢曰以觀其辭

劉向別錄曰方士傳言鄒衍在燕燕有谷地美而寒不生五穀鄒子居之吹律而溫氣至而穀生今名黍谷

漢武故事曰上微時行至柏谷舍於逆旅逆旅翁罵之因從乞漿翁曰止有溺無漿也

博物志曰夏桀之時爲長夜宮於深谷之中男女雜

處三旬不出聽政其後大風揚沙一夕填此谷

周景式廬山記曰石門是一大谷谷中有修林萬頃  
偉木千尋日月之光罕照焉

戴延之西征記曰梓澤去洛城六十里梓澤金谷也  
中朝賢達所集賦詩猶存是石崇居處

賦晉胡濟瀍谷賦曰嘉高岡之崇峻兮臨玄谷以遠  
覽仰高丘之崔嵬兮望清川之澹澹爾乃涉重險陟  
榛薄倚春木臨幽壑深谷豁以窈窕高峯鬱而崖巒

澗

釋名曰澗間也言在兩山間也

說文曰澗山夾水也從水間聲

爾雅曰山夾水曰澗

韓宣子曰董安于爲趙上地守行石阜山見深澗峭  
如墻深百仞問其鄉左右曰人嘗有入此乎曰無有  
有嬰兒狂聾人入此乎曰無有有牛馬犬入此乎曰  
無有安于歎曰吾能治矣使吾法之無改猶入澗之  
必死則民莫之犯也

漢書曰沛公與項籍臨廣武澗而語數籍以十罪

石崇金谷序曰余有別廬在河南界金谷澗中或高  
或下有清泉茂樹衆果竹木草藥之屬

異苑曰苻堅爲慕容冲所襲堅馳騶馬惶而落澗追兵幾及計無由出馬即踟蹰臨澗垂控與堅堅不能及馬又跪而授焉堅援之得登岸而走

詩梁劉孝威賦得曲澗詩曰澗流急易轉溪竹闇難開近樓俄已失前州忽復迴石岸生寒蘚沉根漬水苔菱舟失道去歸鳧迷逕來

宋徐諼華林北澗詩曰摠長潭兮括遠源下沉溜兮起輕泉迴溪浚兮曲沼阻衝波激兮瀨淺淺貫九谷兮積靈芝飛清濤兮潔澄連

浦

說文曰浦水濱也

風土記曰大水小口別通爲浦

楚辭曰出澗浦而澶迴又曰望美人兮南浦

述征記曰興浦舊魏步道吳揭水灌之今絕道爲浦

顧微廣州記曰溪浦口有蒲母養龍裂斷其尾因呼龍掘人時見之則土境大豐而利涉也

劉禎京口記曰縣城東南大路過長堽五里得屠兒浦者昔諸屠兒居此小浦因以爲名也

伏滔北征記曰廣陵西一里水名公路浦表術自九江東奔表譚於下邳由此浦渡因名也

詩梁簡文帝入溲浦詩曰泛水入迴塘空枝度日光  
竹垂懸掃浪鳧疑遠避檣

梁丘遲旦發魚浦潭詩曰魚潭霧未開赤亭風已颺  
擢歌發中流鳴鞞響杳嶂村童忽相聚野老時一望  
詭怪石異象危絕峯殊狀森森荒樹齊泝泝寒沙漲  
藤垂島異陟崖傾嶼難傍

表宋王弘廣陵前浦開表曰伏聞廣陵前浦榛蕪歷  
久近復開除清源虛遠含明內鑒瑞以數致象以類  
應夫如是者鸞響鳳儀可停屬而須矣

渠

史記曰韓聞秦之好興事欲罷之無令東伐乃使水  
工鄭國間說秦令鑿涇水自中山西抵瓠口爲渠並  
比山東注路三百里欲以溉田中作而覺欲殺鄭國  
鄭國曰始臣爲間然渠成亦秦之利也卒使就渠渠  
就而用注四萬餘頃收皆畝一鍾於是關中爲沃野  
秦以富強因命曰鄭國渠  
漢書曰張掖郡有千金渠  
地理書曰滎陽有浪蕩渠

頌後漢蔡邕京兆樊惠渠頌曰洪範八政一曰食周  
禮十職一曰農生民之本於是乎出豐殖財用於是

乎在陽陵縣東厥地汙泥嘉穀不殖光和五年京兆尹樊君勤恤民隱乃命立新渠曩之毒田化爲甘壤相與謳談斐然成章謂之樊惠渠其歌曰我有長流莫或闕之我有溝澮莫有達之田疇斥鹵莫修莫治飢饉困瘁莫恤莫思

井

盛弘之荊州記曰隨郡北界有九井相傳神農旣育九井自穿又云浚一井則衆井水皆動又曰江陵縣東北十里天井臺東臨天井井周迴二里許中有潛室人時見之輒有兵寇

戴延之西征記曰太極殿上有金井金博山鹿盧交龍負山於井上有金師子在龍下

潯陽記曰盆城灌嬰所築孫權經此城自標井地令人掘之正得故井銘曰穎陰侯所開云三百年當塞塞後不滿百年當爲應運者所開權忻悅以爲已瑞井甚深大江中風浪此井輒動常當之

嵩高山記曰少室山有雲母井

異物志曰廬陵城中有一井中有二色水半青半黃黃者灰汁取作糜粥皆作金色土人名灰汁爲金因名爲金井

異苑曰句容縣有延陵季子廟廟前井及瀆恒自涌  
沸故曰沸井于今猶然又曰臨邛有火井漢室之隆  
則炎赫彌熾暨桓靈之際火勢漸微諸葛亮一瞰而  
更盛

詩梁范雲詠井詩曰乃鑿長林曲有浚廣庭前即源  
以爲浪因方自成圓兼冬積溫水疊暑泌寒泉不甘  
未應竭旣涸斷來翔又悲故井詩曰因舊未嘗改緣  
甘故先竭歷稔久無禽一朝見開溲泌泉既斯涌短  
綆將安設已獲丁氏利方見管公綵

賦晉郭璞井賦曰益作井龍登天鑿后土洞黃泉潛

源存溱澗澗洎爾乃冠玉檻鬣鱗錯鼓鹿盧揮勁  
索飛輕祛之繽紛手爭鶩而牙弱長縲委虵以曾縈  
瑤甕龍騰而灑激乃回澄以靜映狀罔然而鏡灼挹  
之不損停之不溢莫察其源動而愈出信潤下而德  
施壯邑移以不改獨星陳於丘墟兮越百伐而猶在  
守虛靜以玄澹兮不東流而注海

晉孫楚井賦曰若行潦之滓濁靡清流以自娛乃喟  
爾而有感率隣左之數夫脉厥土以興作登甘醴於  
玄虛渴人來翔行旅是賴轍耕息肩不期而會沉黃  
李浮朱柰雜狸首之班如飛清塵以洮汰枕玄石以



盥嗽喜邀怡以緩帶

晉江適井賦曰穿重壤之十仞兮構玉甃之百節管之不日既汲既渫潛流炤炤寒泉冽冽挹之不損瀆之不充納而不處其有興而不匱其豐先王借象以辨義君子擬淡以自綏神龍來蟠以育鱗列仙一嗽而雲飛

贊晉卞敬宗溝井贊曰爰有邃井冽彼下泉引流重壤合耀青天蘊甘澄潔湛爾終年圖象懷惻寄旨嘉荃

銘後漢李尤井銘曰井之所尚寒泉冽清法律取象

不槩自平多取不損少汲不盈執憲若斯何有邪傾  
冰

易坤卦曰初六履霜堅冰至象曰履霜堅冰至陰始凝也

毛詩曰誕寘之寒冰鳥覆翼之又曰二之日鑿冰冲冲三之日納于陵陰二日夏之十二月三日夏之正月鑿取冰冲冲聲貌陵陰冰室也

漢書曰晁錯上書曰夫胡貉之地積陰之處也木皮三寸冰厚六尺

孫盛雜語曰王祥字休徵性至孝後母苛虐欲危害

祥祥色養無怠盛寒之月後母曰吾思生魚祥脫衣  
將剖冰求之有少處冰解下有魚出因以奉養

楚辭曰魂兮歸來北方不可以止增冰峩峩飛雪千  
里

鄧析書曰明君之御民若乘奔而無繮履冰而負重  
也

孫卿子曰冰生於水而寒於水

淮南子曰見一葉之落知歲之將暮睹瓶中之冰而  
知天下之寒以近諭遠也

左傳曰古者日在北陸而藏冰西陸朝覲而出之其

藏冰也深山窮谷固陰沍寒於是乎取之

老子曰渙若冰將釋

史記曰周紀曰姜嫄爲帝嚳元妃出里見巨人跡而  
履之身動如孕暮而生子以爲不祥棄於冰之上鳥  
以翼覆薦之

論衡曰夫爨一炬火爨一鑊水終日不熱也倚一尺  
冰置庖厨中終夜不寒也何則微小之感不能動大  
也今鄒衍之歎不過如一炬尺冰而皇天巨大不徒  
鑊冰庖厨也一夫仰歎天爲降霜何天之易感霜之  
易降也

吳越春秋曰越王念吳欲復怨非一日也苦思勞心  
夜以接日冬寒則抱冰夏熱則握火愁心苦志懸膽  
於戶出入嘗之不絕於口

魏子曰危殆之國治不益之民是猶薄冰當白日聚  
毛過猛火也

博物志曰削冰令圓舉以向日以艾承其影則有火  
出束皙集曰君聞薄冰凝池非登廟之寶零露垂林  
非綴冕之飾必將採素壁於層山探圓珠於重泉也  
賦晉顧愷之冰賦曰激厲風而貞質仰和景而融暉  
清流離之光徹邈雲英之巍巍爾乃連綿絡幕乍結

乍無義剛有拆照壺則虛託形超象比朗玄珠若乃  
上結薄映下鏡長泉靈葩隨流含馨揚鮮

晉庾倏冰井賦曰嘉陰陽之博施美天地之廣宣萬  
物雜而無越不易類以相干或專陽負暑或固陰沍  
寒塗雖殊而同歸信協德而俱延於是孟冬之月羣  
陰畢升霜雪紛其交淪流波結而成凌啓南墉之重  
隩將却熱以藏冰納遠宮之遠宇靜幽淡以清徵抱  
堅精之玄素發川靈而長凝於是寒往暑來四時代  
序帝將攘患災災是禦爾乃攜我同類援我蒸徒將  
涉寒數害氣是除攀靈艦而增舉爰自託於城隅仰

瞻重構俯臨陰穴淒清驚冷感發栗烈餘寒嚴悴凄若霜雪

啓梁沈約謝勅賜冰啓曰竊惟司寒輒響恥自前代凌室曠官歷茲永久聖功闡物逸典備甄窮深旣採園池靡用有籍羔秬無災霜雹

### 津

說文曰津水渡也濮小津也

論語曰長沮桀溺耦而耕孔子過之使子路問津焉長沮曰夫執輿者爲誰子路曰孔丘曰是知津矣列女傳曰趙簡子南擊楚津吏醉卧不能渡簡子召

欲殺之津吏女子持楫而前曰妾父聞君東渡不測之水恐風波之起故禱九江三淮之神不勝巫祝杯酌餘瀝醉至於此妾願以鄙軀易父之死簡子將渡少一人乃備負持楫遂與渡中流發激棹之歌簡子悅以爲夫人

續漢志曰河東大陽縣有茅津北屈縣有採桑津

銘後漢李尤孟津銘曰洋洋河水赴宗於海經自中州龍圖所在黃函白神赤符以信昔有周武集會孟津魚入王舟乃往克殷

### 橋

說文曰橋水橋也東楚謂橋爲圮

紀年曰周穆王三十七年伐楚大起九師至於九江比鼃鼃爲梁

燕丹子曰燕太子丹質於秦秦王遇之無禮乃求歸秦王爲機發之橋故以陷丹丹過之無虞

戰國策曰豫讓欲爲智伯報讎趙襄子當出伏於橋下至橋馬驚曰必是豫讓也求之果是

史記曰秦昭王四十九年初作河橋又曰文帝行出中渭有一人從橋下走出乘輿馬驚使騎捕之屬廷尉廷尉張釋之治問曰縣人來聞蹕匿橋下見車騎

即走耳張廷尉奏一人犯蹕當罰金

黃圖曰秦始皇兼天下都咸陽端門四達以則紫宮渭水貫都以象天漢橫橋南渡以法牽牛

論衡曰高麗國有侍婢自云有氣如雞子來下我故有身後生子曰東明東明善射王恐害其國欲殺之東明走至掩水以弓擊水魚鱉浮而爲橋梁

蘇子曰微生與婦人期不來水至抱梁柱而死

王隱晉書曰杜豫啓建河橋宇富平津衆論以爲周所都經聖賢而不作者必不可作故也豫曰昔造舟爲梁則河橋之謂也遂作橋成上從百官臨會舉杯

勸豫曰非君橋不立也豫谷詔曰非陛下之明臣亦不獲奉成聖制也衆咸稱善

詩梁簡文帝賦得橋詩曰浮梁旣衝嶮通波信可陵  
乘空寫渭石跨岸擬河冰斜闌隱濁霧布影入清澗  
方知歌綠水無待榜蒼鷹又詠壞橋詩曰虹飛巨林  
際星渡斷山隅斜梁懸水跡畫柱脫輕朱又石橋詩  
曰惠子臨濠上秦王見海神寫虹便欲飲圖星逼似  
真

梁蕭若靜石橋詩曰連延過絕澗迢遞跨長津已數  
逢仙客兼曾度獵人

梁徐摛壞橋詩曰匝欄生閭蘚覆版沒魚衣岸曲斜  
梁岨何時香步歸

周庾信看治渭橋詩曰大夫叅下位司職渭之陽富  
平移鐵鑲甘泉運石梁跨虹連絕岸浮龜續斷航春  
洲鸚鵡色流水桃花香

周王褒和治渭橋詩曰東流仰天漢南度似牽牛長  
堤通角道飛梁跨造舟使者開金堰太守擁河流廣  
陵侯濤水荆峽望陽侯波生從故舶沙漲涌新洲天  
星識辯對檢玉應沉鈎

陳陰鏗賦得渡岸橋詩曰畫橋長且曲傍嶮復憑流

寫虹晴尚飲圖星晝不收跨波連斷岸接路上危樓

欄高荷不及池清影自浮何必橫南渡方復似牽

太宗文皇帝賦得浮橋詩曰曲岸非千里橋斜異七

星暫低逢輦度還高值浪驚水搖文鷁動纜轉錦花

榮遠近隨輪影輕重應人行

梁庾肩吾石橋詩曰秦王金作柱漢帝玉爲欄仙人

飛徃易道士出歸難

張文琮賦橋詩曰造舟浮渭日鞭石表秦初星文遙

瀉漢虹勢尚凌虛已授文成履空題武騎書別有臨

濠上棲偃獨觀魚

後周宗羈登渭橋詩曰仲山朝飲馬還坐渭橋中南  
瞻臨別館北望盡離宮四面衣裾合三條冠蓋通蘭  
香想和季雲起憶成公圯上相知早雞鳴幸共同

藝文類聚

卷第九

三

藝文類聚卷第九



國家圖書館, NATIONAL CENTRAL LIBRARY, TAIWAN, R.O.C.



藝文類聚卷第十

唐太子率更令弘文館學士歐陽詢撰

明 秣 陵 王元貞校

符命部

符命

春秋潛潭巴曰里社鳴此里有聖人其响則百姓歸

之社里之君也鳴則教令行唯聖人能之响鳴之怒也

春秋合誠圖曰堯母慶都出觀三河奄然陰風赤龍與慶都合生堯

河圖曰湯母扶都見白氣貫月意感而生湯

春秋元命苞曰殷紂之時五星聚於房房者蒼神之

精周據而興

周起於房而五星聚之得天下之祥

尚書中候曰季秋赤雀銜丹書入艷止于昌戶昌拜

稽首受最

最要者也

曰姬昌蒼帝子又曰呂尚釣磻谿得

玉璜刻曰姬受命呂佐旌

旌理也

又曰武王發渡于孟

津中流白魚躍入王船王俯取魚長三尺有文

王字

呂氏春秋曰周文王時見大赤鳥銜書集于周社文

王曰火氣勝故其色上赤

史記曰帝嚳少妃有娥氏女簡狄以春分玄鳥至之

日祀于高禘有玄鳥遺其卵簡狄吞之孕生契爲殷

始祖又曰帝高陽氏元妃姜嫄見大人之跡履之欣  
然若感而生后稷棄之寒冰之上鳥翼覆之又棄之  
隘巷羊牛乳之又棄之平林之上人收養之爲周始  
祖又曰高祖母媪嘗息大澤之陂夢與神遇時雷電  
晦冥父太公往視見交龍於上巳而有娠遂生高祖  
又曰高祖被酒夜經艷西澤中令一人行前行前者  
還報曰前有大蛇當徑高祖乃前拔劍斬蛇蛇分爲  
兩道開後人來至蛇所有一老嫗夜哭問之嫗曰吾  
子白帝子化爲蛇當道今爲赤帝子斬之因忽  
不見  
漢書曰高祖元年冬十月五星聚于東井從歲星也

東井秦分野漢以義取天下之應也又曰孝昭帝時太山萊蕪山南洶

洶有數千人聲民視之有大石自立高丈五尺大三十八圍入地深八尺三石爲足石立後有白鳥數千集其旁宣帝中興之瑞也又曰昭帝時上林柳樹斷卧地一朝起立生枝葉有蟲食其葉成文字曰公孫病已立又曰昌邑王問社有枯樹復生枝葉畦孟以爲木下民象當有廢改之象公孫氏從民間受命爲天子者後宣帝立帝本名病已

隋巢子曰昔三苗大亂天命夏屬於玄宮有大神人面鳥身降而福之司祿益富而國家實司命益年而

民不夭四方歸之屬乃克三苗而神民不違

墨子曰夏桀時天乃命湯於驪宮有神來告曰夏德大亂往攻之予必使汝大戡之又商王紂時周武王見三神曰予既沉瀆殷紂于酒德矣汝往攻之予必使汝大戡之

東觀漢記曰光武帝夜生時有赤光室中盡明皇考異之使卜者王長卜之長曰此善事不可言是歲有嘉禾生一莖九穗長大於凡禾縣界大豐熟因名上曰秀又曰光武從邯鄲避王郎兵至呼沱河導吏還言河水流澌無船不可濟左右皆惶畏爲王郎所及

上命王霸前往視之實然霸念還言驚衆雖不可渡且臨水正尚可爲阻即白曰冰堅可渡士衆大喜上大笑曰果妄言也叱至河流漸冰合可履彊以囊盛沙布冰上乃渡渡未畢數車而冰陷也

琴操曰魯哀公十四年西狩新者獲麟擊之傷其左足將以示孔子孔子道與相逢見俛而泣抱麟曰爾孰爲來哉孰爲來哉反袂拭面仰視其人龍顏日角夫子奉麟之口須臾吐三卷圖一爲赤伏劉季興爲王二爲周滅夫子將終三爲漢制造作考經夫子還謂子夏曰新主將起其人如得麟者

帝王世紀曰燧人之世有大迹出雷澤華胥履之生庖犧氏於成紀也又曰神龍感女登於常羊生炎帝又曰電光繞北斗樞星照郊野感附寶孕二十月生黃帝於壽丘又曰黃帝時有大星如虹下流華渚女節夢接之意感生少昊又曰陶唐之世握登見大虹意感生舜於姚墟又曰修巳山行見流星貫昂意感慄然又吞神珠薏苡留圻而生禹又曰漢昭靈后名含始遊浴池有玉雞銜赤珠出刻曰玉英吞此者王含始吞之生高祖

魏氏春秋曰明帝青龍三年張掖郡刪丹縣金山玄

川溢涌寶石負圖狀象靈龜立于川西有石馬七其一仙人騎之其一羈絆之其五有形而不善成有玉匣開蓋於前上有玉字玉珎二玉璜一又有麒麟在東鳳皇在南白虎在西犧牛在北馬自中布列南方有字曰大紂曹金但取之此司馬氏革運之徵  
魏志曰桓帝時有黃星見於楚宋之分遼東殷植善天文言後五十歲當有真人起於梁沛之間其鋒不可當至是凡五十年而太祖破袁紹天下莫敵矣  
吳錄曰孫堅墓上數有光如雲氣五色上屬天下蔓延數里父老相謂曰此非凡氣孫氏其興乎

吳書曰孫堅母懷妊夢腸繞吳閭門孫策母懷策夢月入懷懷孫權夢日入懷

晉中興書曰中宗元皇帝初誕有神光之異一室盡明所藉藁如始刈

豫章記曰松陽門內有大梓樹大四十五圍舉樹盡枯死永嘉中一旦忽更榮茂太興中元皇帝果繼大業

庾仲初楊都賦所云槐木蒼于豫章

郭璞南郊賦云弊梓擢秀于祖邑也宣帝祖爲豫章太守故云祖邑也

臧榮緒晉書曰王廙爲鄱陽太守有枯樟樹更生王敦表勸進中宗曰皓獸應瑞而來臻樟樹久枯而更榮

孫盛晉陽秋曰秦始皇時望氣者言五百年後金陵之地有天子氣於是改金陵曰秣陵壑北山以絕其勢券致東遊以厭之後五百二十六年而中宗即位於江南又曰太安中歲鎮辰太白四星聚於牛女之間後中宗即位於揚州也

武昌記曰孫權獵於樊山見一姥問獵何得荅曰止得一豹姥曰何不堅其尾忽然不見因爲立樊姥廟

徐爰宋書曰武帝夜生有神光之異室內盡明是夕甘露降于墓樹又高祖舉目瞻睇常見二龍在焉始尚微小及貴龍形漸長光色轉明左右侍者亦數見徵異高祖既登祚謂羣臣曰朕始望不至此衆人咸撰辭欲盛稱功德王弘率爾對曰所謂天命求之不可得推之不可去衆皆以爲知言

文漢司馬相如封禪文曰伊上古之初肇自昊穹之生民歷選列辟以迄于秦率邇者踵武逖聽者風聲紛綸歲蕤湮滅而不稱者不可勝數也繼昭夏崇號謚略可道者七十有二君書曰元首明哉股肱良哉

因斯以談君莫盛於唐堯臣莫賢於后稷后稷創業於唐堯公劉發跡於西戎文王改制大行越成故軌跡夷易易遵也湛恩龐鴻易豐也憲度著明易則也垂統理順易繼也是以業隆於襁褓而崇冠于二后未有殊尤絕跡可考於今者也然猶躡梁父登泰山建顯號施尊名大漢之德漢音涌源泉沕澗曼羨旁魄四塞雲布霧散上暢九垓下泝八埏昆蟲闔澤廻首面內然後囿騶虞之珍羣徼麋鹿之怪獸尊一莖六穗於庖犧雙貉共舛之獸招翠黃乘龍於沼欽哉符瑞臻茲猶以爲德薄不敢道封禪蓋周躍魚隕航

休之以燎此之爲符也以登介丘不亦憇乎進讓之道何其爽與於是大司馬進曰陛下仁育羣生義征不諛德侔往初功無與二意者泰山梁父設壇場望幸蓋上帝垂恩儲祉將以慶成陛下謙讓而弗發也契三神之歡缺王道之儀羣臣而思焉夫修德以錫符奉符以行事不爲進越也故聖王不替而修禮地祗謁款天神勒功中嶽以章至尊皇皇哉斯事天下之壯觀王者之不業不可貶也願陛下全之俾萬世得激清流揚微波飛英聲騰茂實前聖之所以永保鴻名而常爲稱首者用此宜命掌故悉奏其儀而覽焉

於是天子沛然改容曰俞乎朕其試哉乃遷思迴慮  
摠公卿之儀詢封禪之事詩大澤之博演符瑞之富  
遂作頌曰自我天覆雲之油油甘露時雨厥壤可遊  
滋液滂漉何生不育嘉穀六穗我穡曷蓄匪唯雨之  
又潤澤之匪唯徧之我汜布護之名山顯位望君之  
來君乎君乎侯不邁哉般般之獸樂我君囿白質黑  
章其儀可嘉收收穆穆君子之態蓋聞其聲今親其  
來厥途靡從天瑞之徵茲爾於舜虞氏以興濯濯之  
麟遊彼靈時孟冬十月君徂郊祀馳我君輿帝以享  
祉宛宛黃龍興德而升正陽顯見覺悟黎蒸於傳載

之云受命所乘依類託寓喻以封巒披藝觀之天人  
之際已交上下相發允答聖王之德兢兢翼翼故曰  
於興必慮衰安必思危是以湯武至尊嚴不失肅祇  
舜在假典顧省闕遺此之謂也

**頌**魏傅遘皇初頌云尋盛德以降應著顯符于方臻  
積嘉祚以待期儲鴻施於真人昔九代之革命咸受  
天之休祥匪至德其焉昭匪至仁其焉章懿大魏之  
聖后固上天之所興應靈運以承統排閭闔以龍升  
攄皇象以闡化順帝則以播音遵陽春以行施揆四  
時以立信運聰明以舉善宣柔惠以養人於赫我后



邁德如神化不朞月令不浹辰於是天地休豫靈祇  
歡欣嘉瑞雲集四靈允臻甘露霄零於宮庭醴泉冬  
涌於中原白雉素烏丹芝朱魚鱗集羣萃不可勝書  
信應天之美瑞受命之靈符也然後覽公卿之謹議  
詢百僚之典謨天子乃登彫輦戴羽蓋佩玉鏘鏘銜  
聲噦噦拜上皇告受位兆休祚導神氣於是建皇初  
之上元發曠濫之明詔青災肆赦盪滌瑕穢崇設九  
賓溥延公卿嘉羞千品俎豆充庭金石具懸鍾鼓畢  
作歌九功舞八佾鴻澤普皇恩洽民欲得神望塞

**敘**後漢傅幹王命敘曰昔在唐虞之禪列于帝典殷

周之代敘于詩書天之歷數昭焉著明周篤后稷公  
劉積德行仁至乎文武遂成王業雖五德殊運或禪  
或征其變化應天與時消息共道一也故雖有威力  
非天命不授雖有運命非功烈不章自我高祖襲唐  
之統受命龍興討秦滅項光有萬國世祖攘亂奄復  
帝宇人鬼協謀徵祥煥然皆順乎天而應乎人也然  
則帝王之起必有天命瑞應自然之符明統顯祚豐  
懿之業加以茂德成功賢智之助而後君臨兆民爲  
神明所保佑永世所尊崇未見運敘無紀次勳澤不  
加於民而可力爭覲觀神器者也豪桀見二祖無尺

地之階爲專智力乘釁而起不知天祚聖哲帝王自有真也哀哉非徒闇於將來又不考之於既往矣自開闢已來姦雄妄動不識天命勇如蚩尤強如共工威如夷羿然皆從分橫裂爲天下戒又況淺智小才勇不足畏強不足憚未有成資而敢失順視不軌之事也哉夫行潦之流不致江海之深丘垤之資不成太山之高魚鼈之類不希雲龍之軌一官之守不經天人之變當王莽之末英雄四起而鄧禹耿弇識世祖之福祚羸糧間行進其策謀遂荷肯附之任享佐命之寵張玄慕蘇秦蒯通之業周旋囂述西說竇融

言未及終而梁統已誅之矣禹弇見命祚之兆其福如彼張玄蔽逆順之理其禍如此審斯二事趣舍之分明矣且世祖之興有四一曰帝皇之正統二曰形相多異表三曰體文而知武四曰履信而好士加之以聰明獨斷達於事機發策如神應視遠如見近偏旅首進摧莽軍百萬之衆單師獨征平河北萬里之功識鄧隆之將敗知劉興之必死然猶乾乾日昃博采訓咨拔吳漢於小尹擢馬武於行伍寵功臣以兼國之爵顯卓茂以非次之位言語政事文學之士咸盡其材致之宰相權勇畢力於征伐搢紳悉心於左

右此其所以成大業也高祖方娠有雲龍之表其始入秦五星同軌以旅于東井在天之符也世祖之徵符其詳可聞也其初育則靈光鑒于室隩嘉禾滋于邑壤其望舊廬有火光之異其渡呼沱有河合之應西門君惠光識其諱強華獻符千里同驗劉歆改名而隕其身王長錯卦而見吉兆故王遵謂之天授非人力也覽廢興之運會觀徵瑞之攸祚審天應之萌兆察人物之所附念功成而道退無非次而妄據後之人誠能昭然遠覽曠然深悟收莽述之闇惑忠鄧耿之弘慮好謀而要成臨事而知懼距張玄之邪說

思在三之明數則福祿行於無窮亦世不失其通路矣

文漢楊雄劇秦美新曰上罔顯於義皇中莫盛於唐虞邇靡著於成周仲尼不遭用春秋因斯發言神明所祚兆民所託罔不云道德仁義禮智獨秦崛起西戎因襄文宣靈之僭跡基孝公茂惠文奮昭莊至政破從擅衡并吞六國遂稱乎皇帝盛從鞅儀韋斯之邪政馳驚起翦恬賁之用兵剡滅古文刮語燒書弛禮崩樂塗民耳目遂流唐漂虞滌殷蕩周夔除仲尼之篇籍自勒功業改制度軌量咸稽之於秦紀是以

者儒碩老抱其書而遠遜禮官博士卷其舌而不談  
二世而亾何其劇歟帝王之道競競乎不可離已夫  
能貞而明之者窮祥瑞固而昧之者極妖愆故若古  
者稱堯舜威侮者陷桀紂况盡汛掃前聖數千載功  
業專用已之私而能享祐者哉會漢祖龍騰豐沛奮  
迅宛葉自武關與項戮力咸陽創業蜀漢發跡三秦  
克項山東而帝天下適秦政捺酷尤煩者應時蠲始  
儒林刑辟歷紀圖典之用稍增焉秦餘制度項氏爵  
號雖違古而猶襲之是以帝典闕而不補王綱弛而  
未張逮至大新受命上帝還資后土顧懷玄符靈契

雲動風偃震聲日景炎光飛響盈塞天淵之間乃奉  
若天命窮寵極崇與天剖神符地合靈契創億兆規  
萬世卓哉煌煌真天子之表也若夫白鳩丹鳥素魚  
斷虵方斯蔑矣是以發秘府覽書林遙集乎文雅之  
囿翱翔乎禮樂之場胤殷周之失業紹唐虞之絕風  
懿律嘉量金科玉條煥爛照耀靡不宜臻振鷺之聲  
充庭鴻鸞之黨漸階俾前聖之緒布護流行而不韞  
積郁郁乎煥哉天人之事盛矣鬼神之望允塞紹少  
典之苗著黃虞之裔帝典闕者已補王綱弛者既張  
炳炳煒煒豈不懿哉而述前典巡四民迄四岳增封

太山廣禪梁甫斯受命者之典業也崇嶽浮海通瀆之神咸設壇場望受命之臻焉海外遐方信延頸企踵四面內嚮喁喁如也帝者雖勤讓惡可以已乎宜命賢哲作典引一篇以示來人摛之罔極令萬世常戴巍巍履栗栗嗅馨香含甘實鏡純粹之至精聆清和之正聲則百工伊凝庶績越熙荷天衢提地釐斯天下之上則已庶可試哉

論後漢班彪王命論曰昔在帝堯之禪曰咨爾舜天之歷數在爾躬舜亦以命禹暨于稷契咸佐唐虞光濟四海弈世載德至于湯武而有天下雖其遭遇異

時禪代不同至于應天順民其揆一焉是故劉氏承堯之祚氏族之世著于春秋唐據火德而漢紹之始起沛澤則神母夜號以彰赤帝之符由是言之帝王之祚必有明聖顯懿之德豐功厚利積累之業然後精誠通於神明流澤加於生民故能爲鬼神所福嚮天下所歸徃未見運世無本功德不紀而得崛起在此位者也世俗見高祖興於布衣不達其故以爲適遭暴亂得奮其劔遊說之士至比天下於逐鹿幸捷而得之不知神器有命不可以智力求悲夫此世之所以多亂臣賊子者也若然者豈徒闇於天道哉又

不睹之於人事矣夫餓饉流隸饑寒道路思有短褐  
之襲擔石之蓄所願不過一金終於轉死溝壑何則  
貧窮亦有命也況乎天子之貴四海之富神明之祚  
可得而妄處哉故雖遭罹厄會竊其權柄勇如信布  
強如梁籍成如王莽然卒潤鑊伏鑕烹醢分裂又况  
么麼不及數子而欲闡干天位者乎是故鴛鴦之乘  
不騁千里之塗燕雀之儔不奮六翮之用棗梘之材  
不荷棟梁之任斗筲之子不執帝王之重易曰鼎折  
足覆公餗不勝其任也當秦之末豪傑並起共推陳  
嬰而王之嬰母止之曰自吾爲子家婦而世貧賤今

卒富貴不祥不如以兵屬人事成少受其利不成禍  
有所歸嬰從其言而陳氏以寧王陵爲漢將而母獲  
於楚有漢使來陵母見之謂曰願告吾子漢王長者  
必得天下子謹事之無有二心遂對漢使伏劍而死  
以固勉之夫以足婦之明猶能推事理之致探禍福  
之幾而况大丈夫之事乎是故窮達有命吉凶由人  
嬰母知廢陵母知興此二者帝王之分決矣蓋在高  
祖其興也有五一曰帝堯之苗裔二曰體貌多奇異  
三曰神武有徵應四曰寬明而仁恕五曰知人善任  
使加之以信誠好謀達於聽受見善如不及用人如

用已從諫如順流趨時如響起當食吐哺納子房之策拔足揮洗揖酈生之說悟成卒之言斷懷土之情高四皓之名割肌膚之愛舉韓信於行陣收陳平於亾命英雄陳力羣策畢舉此高祖之大略所以成帝業也若乃靈瑞符應又可略聞矣是以王武感物而折契呂公觀形而進女秦皇東遊以厭其氣呂后望雲而知所處始受命則白蛇分西入關則五星聚故淮陰留侯謂之天授非人力也歷古今之得失驗行事之成敗取舍不狀斯位符瑞不周斯度而苟昧權利越次妄據外不量力內不知命則必喪保家之主

歿天年之壽遇折足之凶伏斧鉞之誅英雄誠知覺寤收陵嬰之明分絕信布之覬覦拒逐鹿之瞽說審神器之有授貪不可冀無爲二母之所笑則福祚流于子孫天祿其永終矣

典引後漢班固典引曰陶唐舍胤而禪有虞亦命夏后稷契熙載越成湯武股肱既周天乃歸功元首將授漢劉俾其承三季之荒末值亢龍之災孽懸象闇而恒文垂彝倫斲而舊章缺高光二聖辰居其域赫赫聖漢巍巍唐基泝測其源乃先孕虞育夏甄殷陶周然後宣二祖之重光襲四宗之緝熙神靈日照光

被六幽仁風翔于海表威靈行乎鬼區盛哉皇家帝  
世德臣刈辟功君百王榮鏡宇宙渙揚寓內是以來  
儀集羽族於觀魏肉角馴毛宗於外圍擾緇文皓質  
於郊升黃輝采鱗於沼甘露宵零於豐草三足騫翥  
於茂樹若乃嘉穀靈草竒獸神禽應圖合諫窮祥極  
瑞者朝夕罔牧日月邦畿卓犖方州羨溢乎要荒昔  
周姬有素雉朱烏玄秬黃蓂音侯之事耳君臣動色左  
右相趨濟濟翼翼我我如也啓恭館之金滕御東序  
之秘寶是時聖上固已垂精游神苞舉藝文屢訪羣  
儒俞咨故老與之斟酌道德之淵源飾覈仁義之林

藪以望元符之臻焉將仵萬嗣揚洪暉奮景炎扇遺  
風播芳烈久而逾新用而不竭汪汪乎丕天之定律  
其疇能亘之哉唐哉皇哉皇哉唐哉

論魏陳王曹植魏德論曰元氣否塞玄黃憤薄星辰  
亂逆陰陽舛錯四海鼎沸蕭條沙漠武皇之興也以  
道凌殘義氣風發神戈退指則妖霧順制靈弧雲舉  
則朝揚播越唯我聖后神武蓋天威光佐掃辰彗北  
彎首尾爭擊氣齊率然乃電北席卷千里隱乎若崩  
嶽肝乎若潰海愠彼蠻夏蠢爾弗恭脂我蕭斧簡武  
鍊鋒星陳而天運振耀乎南封荆人風靡交益影從



軍蘊餘勢襲利乘權蕩鬼區於白水擄矯制乎遐川  
仰屬目十條支晞弱水之潺湲薄張騫於大夏笑驃  
騎於祁連其化之也如神其養之也如春柔遠能邇  
誰敢不賓憲度增飾日耀月光跡存乎建安道隆乎  
延康於是漢氏歸義顧音孔昭顯禪天位希唐放堯  
上猶謙謙弗納也發不世之明詔薄皇居而弗泰蹈  
北人之清節美石戶之高介義貫金石神明以興神  
祇致祥乾靈效祐於是羣公卿士功臣列辟率爾而  
進曰昔文王三分居二以服事殷非能之而弗欲蓋  
欲之而弗能况天網不禁皇綱圮紐侯民非復漢萌

尺土非復漢有故武皇創跡於前陛下光美於後蓋  
所謂勲成於彼位定於此者也將使斯民播秬鬯殖  
靈芝鋤六穉挹醴滋遂乃凱風廻焱甘露匝時農夫  
詠於田壠織婦吟而綜絲黃吻之齟含哺而怡鮐背  
之老擊壤而嬉古雖稱乎赫胥曷若斯之大治乎于  
時上富於春秋聖德汪濊竒志妙思神鑒靈察方將  
審御陰陽增耀日月極禎祥於遐奧飛仁風以樹惠  
既遊精萬幾探幽洞深道遙六藝兼覽儒林抗思乎  
文藻之湯囿容與乎道術之彊畔超天路而高峙階  
清雲以妙觀將忝跡於三皇豈徒論功於大漢天地

位矣九域清矣皇化四達帝猷成矣明哉元首股肱  
貞矣禮樂既作興頌聲矣固將封泰山禪梁甫歷名  
川以祈福周五方之靈宇越八九於往素踵帝皇之  
靈矩流餘祚於黎蒸鍾元吉乎聖主

隋李德林天命論曰有娥玄鳥商以興焉姜嫄巨跡  
周以肆焉邑姜夢帝隋以興焉古今三代靈命如一  
天下之重不可妄據軒初四帝周餘六王藉勢因基  
自取而不得也孟軻稱仲尼之德過於堯舜著述成  
帝者之事弟子備王佐之才墨不代蒼泣麟歎鳳栖  
栖汲汲雖聖達而莫許也蚩尤則黃神抗衡共工則

黑帝就敵項羽誅秦摧漢宰神州角逐爭驅盡威力  
而無就也其餘欵起姦妄何足數者若使四凶執八  
元之誠三監懷九臣之志韓信彭越深明帝子之符  
孫述隗囂妙識真人之出尉迥同謳歌之類王謙比  
獄訟之民福祿蟬聯胡可窮也而違天逆物獲罪人  
神嗚呼此前事之大戒矣誅夷烹醢歷代共尤僭逆  
凶邪時煩獄吏其不戒慎何哉蓋積惡既成心自絕  
於善道物類相感理必至於誅戮天奪其魄鬼惡其  
盈故也六帝聰明羣臣正直耳目監於率土賞罰叅  
於國朝輔助一人覆育兆庶豈有食人之祿受人之

榮苞藏禍心不殲蓋者也必當執法未處其罪司命已除其藉自古明哲慮遠防微位尊而心愈下祿厚而志彌約納寵思之以懼道高守之以恭克念於此則奸回不至謙光滿復義在知幾吉凶由人嫉不自作夙沙則主雖愚蔽民盡知歸有苗則始爲跋扈終而大服漢南諸國見一面以從殷河西將軍率五郡而臣漢故能招信順之助保太山之安也

述魏邯鄲淳上受命述曰伊上天闡載自民主肇建歷聽風聲陶唐爲盛虞夏受終殷周革命有禪而帝有代而王禪代雖殊大小繇同於是以漢歷在魏赤

運歸黃也是故大魏之業皇耀震霆肅清宇內萬邦有截師義翼漢奉禮不越飭躬戮力茂亮弘烈樹深根以厚基播醇澤以釀味含光而弗耀戢翼而弗發將俟聖嗣是遂是達聖嗣承統爰宣重光陳錫裕下民悅無疆三神宜釐四靈順方元龜介玉應龍粹黃若云魏德據茲以昌爾乃鳴玉陟壇三摺以俟既受休命龍旋鳳峙煌煌厭暉穆穆容止臨下有赫允也天子既踐帝位納璽要紱太常司燎升炮告類珪璋我我髮秉嗒嗒聖躬御策以莅巍巍乎崇功顯顯乎德之壯業天休之所鍾也于時天地

咸和口

之夜不作風塵弭清凡在壇場之位

舉目平


不君臣和德咸玉色而金聲屢省萬

機訪謀老成治詠儒墨納策公卿昧旦孜孜夕惕乾  
乾務在諧萬國敘彝倫而折不若懷遠人混六合之  
風納于仁壽之門刑錯靡試偃伯靡軍然後乃勒功  
岱嶽升中上玄斯因我皇之大摹思心之所存也

表魏邲鄆淳上受命述表曰臣聞雅頌作於盛德典  
謨興於茂功德盛功茂傳序弗忘是故竹帛以載之  
金石以聲之垂諸來世萬載彌光陛下以聖德應期  
龍飛在位其有天下也恭已以受天子之籍無爲而

四海順風若乃天地顯應休徵祥瑞以表聖德者不  
可勝載鑠乎煥顯真神明之所以祚命世之令主也  
凡自能言之類莫不謳歎於野執筆之徒咸竭文思  
獻詩上頌臣抱疾伏蓐作書一篇欲謂之頌則不能  
雍容盛懿列伸玄妙欲謂之賦又不能敷演洪烈光  
揚緝熙故思竭愚稱受命述

藝文類聚卷第十



國家圖書館, NATIONAL CENTRAL LIBRARY, TAIWAN, R.O.C.

藝文類聚卷第十一

唐太子率更令弘文館學士歐陽詢撰

明 秣 陵 王元貞校

帝王部一

總裁帝王 天皇氏 地皇氏 人皇氏

帝女嫫氏

有巢氏 燧人氏 太昊庖犧氏

昊金天氏

炎帝神農氏 黃帝軒轅氏 少

堯陶唐氏

顓頊高陽氏 帝嚳高辛氏 帝


帝禹夏后氏

帝舜有虞氏

總裁帝王

尚書刑德攷曰帝者天號也王者人稱也天有五帝以立名 有三王以正度天子爵稱也皇者煌煌也

春秋演孔圖曰正氣為帝間氣為臣秀氣為人



禮斗威儀曰帝者得其根核王者得其英華霸者得其附枝攻帝道不行不能王王道不行不能霸霸道不行不能勻其身

管子曰明一者皇察道者帝通德者王謀得兵勝者霸

呂氏春秋曰始生之者天也養成之者人也能養天之所生而爲天子

春秋考耀文曰王者往也神所輸向人所樂歸

春秋繁露曰德侯天地者稱皇帝天祐而子之號稱天子

董子曰古之人造文字者三畫而連其中謂之王三畫者天地與人也連中者通其道也取天地與人之才而參之非王者其孰能當是故王者必法天以大仁覆育萬物既化而生之又養而成之  
韓詩外傳曰君者何曰羣也敢羣天下萬物而除其害者謂之君

白虎通曰帝王者號也號者功之表也所以表功明德號令臣下者也德合天地者稱帝仁義合者稱王別優劣也又曰接上稱天子者明以爵事天也接下稱帝王者明位號天下至尊之稱

漢雜事曰古者天子稱皇其次稱王秦承百王之末  
爲漢驅除自以德兼三皇五帝故并爲號

帝王世紀曰孔子稱天子之德感天地洞八方是以  
化合神者稱皇德合天地者稱帝仁義合者稱王

蔡邕獨斷曰上者尊位所在也太史令司馬遷記事  
當言帝則依違之但言上不敢泄瀆者尊號言尊尊  
之義也乘輿出於律文曰敢盜乘輿服御物謂天子  
所服食者也天子至尊不敢泄瀆言之故託於乘輿  
也天子以天下爲家不以京師宮室爲常處當乘輿  
以天下故謂之車駕天子自謂行在所今雖在京師

言在行所也巡狩天下所奏事處皆爲宮在長安則  
曰長安宮在泰山則曰泰山宮唯當時所在

禮記曰天子者與天地參德配天地兼利萬物與日  
月並明明照四海而不遺微小其在朝廷則道仁聖  
禮義之序燕處則聽雅頌之音行步則有環珮之聲  
外車則有鸞和之音居處有禮進退有度百官得其  
宜萬事得其序

六韜曰王者之道如龍之首高居遠望深視而審聽  
神其形而散其精若天高而不可極若川深而不可  
測故可怒而不怒臣乃爲虎可殺而不殺大賊乃發



兵勢不行敵國乃強

管子曰黃帝立明堂之議上觀於賢也堯有衢室之問下聽於民也舜有告善之旌而主不蔽也禹立諫鼓於朝而備訊也湯有總街之廷觀民非也武王有靈臺之宮賢者進也此古聖帝明王所以有而勿失得而勿止也

尸子曰孔子曰商汝知君之爲君子夏曰魚失水則死水失魚猶爲水也孔子曰商知之矣

莊子曰赫胥氏之時民居不知所爲行不知所之含哺而熙鼓腹而遊又曰昔容成氏大庭氏栢皇氏軒

轅氏尊盧氏伏羲氏當是時也結繩而用之甘其食美其服樂其俗安其居鄰國相望雞狗之音相聞民至老死不相往來若此時則至治也

孫卿子曰人主者守至約而詳事至狹而切垂衣裳不下簟席之上而海內之民莫不願得以爲帝王  
呂氏春秋曰五帝先道而後德故德莫盛焉三王先德而後事故事莫功焉五霸先事而後兵故兵莫強焉

韓子曰明王制其臣下者二柄而已矣二者刑德也殺戮之謂刑慶賞之謂德

淮南子曰帝者體太一王者法陰陽霸者則四時君者用六律體太一者牢籠天地殫壓山川含吐陰陽申洩四時紕綱八極經緯六合覆露照導普汜而無私翊飛蠕動莫不仰德而生法陰陽承天地之和形萬類之體含氣化物以成形類則四時者春生夏長秋收冬藏取與有節出入有時開闔張歛不失其序喜怒剴柔不雜其理用六律者生之與殺也賞之與罰也予之與奪也非此無道又曰人主者以天下之目視以天下之耳聽以天下之智慮以天下之力動是故號令能下究而臣情得上聞百官修道羣臣輻

湊喜不以賞賜怒不以罪誅

潛夫論曰太古之時兆黎初載未有上下而自順序天未事焉君未設焉末後矯處或相凌虐爲萌巨害於是天命聖人使司牧之勿令失性四海蒙利草木被德恭儉奉戴謂之天子

箴晉潘尼乘輿箴曰皇極肇建兩儀旣分彝倫未序萬邦糾紛國事明主家奉嚴君各有攸尊德用不勤煌煌四海謁謁萬乘匪賢焉倚匪哲焉憑左輔右弼前疑後承一日萬機業業競競夫出其言善則千里是應而莫余違亦喪邦有微辛作璇室而夏興瑤臺

糟丘酒池象箸玉杯叔世道衰末俗化淺耽樂逸遊  
荒淫沈湎不式古訓而好是佞辯不遵正路而覆車  
是踐滅敗之効載在前典匪唯凌夷厥世用殄故曰  
樹君如之何將民是司牧視之猶傷知其寒燠故能  
撫之斯柔而敦之斯睦無遠不懷靡思不服夫豈厭  
縱一人而玩其耳目內迷聲色外荒馳逐不修政事  
而終於顛覆

論漢賈誼過秦論曰秦孝公據崤函之固擁雍州之  
地君臣固守以窺周室有席卷天下包舉宇內囊括  
四海之意并吞八荒之心當是時也商君佐之內立

法度務耕織修守戰之具外連衡而鬪諸侯諸侯恐  
懼會盟而謀弱秦不愛珍器重寶肥饒之地以致天  
下之士合從締交相與爲一當此之時齊有孟嘗趙  
有平原楚有春申魏有信陵此四君者皆明智而忠  
信寬厚而愛人尊賢重士約從離橫兼韓魏燕楚宋  
衛中山之衆嘗以什倍之地百萬之師仰關而攻秦  
秦人開關延敵九國之師遁逃而不敢進秦無亡矢  
遺鏃之費天下諸侯已困矣及至秦始皇奮六世之  
餘烈振長策而御宇內吞二周而亾諸侯履至尊而  
制六合執敲扑以鞭笞天下威振四海南取百越之

地以爲桂林象郡百越之君俛首係頸委命下吏乃使蒙恬北築長城而守藩籬却匈奴七百餘里胡人不敢南下而牧馬士不敢彎弓而報怨然後踐華爲城因河爲池據億丈之城臨不測之谿以爲固良將勁弩守要害之處信臣精卒陳利兵而誰何天下已定始皇自以爲關中之固金城千里子孫帝王萬世之業也始皇旣沒餘威振于殊俗然而陳涉甕牖繩樞之子甿隸之人而遷徙之徒也材能不及中人率罷散之卒將數百之衆轉而攻秦山東豪俊蜂起而亡秦族矣且夫天下非小弱也雍州之地崤函之固

自若也陳涉之位非尊於齊楚燕趙魏宋衛中山之君也鋤耰棘矜非銛於鉤戟長鎗也謫戍之衆非抗於九國之師也深謀遠慮行軍用兵之道非及曩時之士也然而成敗異變功業相反試使山東之國與陳涉度長絜大比權量力則不可同年而語矣然秦以區區之地致萬乘之權招八州而朝同列百有餘年矣然後以六合爲家崤函爲宮一夫作難而七廟隳身歿人手爲天下之笑者何也仁義不施而攻守之勢異也

魏王粲難鍾荀太平論曰聖莫盛於堯而洪水方割

丹朱淫虐四族凶佞矣帝舜因之而三苗畔戾矣禹  
又因而防風爲戮矣此三聖古之所大稱也繼踵相  
承且二百年而刑罰未嘗一世而乏也然則此三聖  
能平三聖能平則何世能致之乎孔子稱曰唯上智  
與下愚不移不移者丹朱四凶三苗之謂也當紂之  
世殷罔不小大好草竊姦究周公遷殷頑民于洛邑  
其下愚之人必有之矣周公之於三聖不能踰也三  
聖有所不化矣有所不移矣周公之不能化殷之頑  
民所可知也苟不可移必或犯罪罪而弗刑是失所  
也犯而刑之刑不可錯矣孟軻有言盡信書不如無

書有大而言之者刑錯之屬也豈億兆之民歷數十  
年而無一人犯罪一物失所哉謂之無者盡信書之  
謂也

魏曹罔六代論曰昔者夏殷周歷世數十而秦二世  
而亡何則三代之君與天下共其民故天下同其憂  
秦王獨制其民故傾危而莫救先王知獨治之不能  
久也故與人共治之知獨守之不能固也故與人共  
守之兼親疎而兩用參同異而竝進是以輕重足以  
相鎮親疎足以相衛兼并路塞逆節不生及其衰也  
桓文率禮包茅不貢齊師伐楚宋不城周晉戮其宰

王綱弛而復張諸侯傲而復肅二霸之後浸以陵遲  
吳楚憑江負固方城雖心希九鼎而畏迫宗姬姦情  
散於胸懷逆謀消於脣吻斯豈非信重親戚任用賢  
能枝葉碩茂本根賴之至於王赧降爲庶人猶枝幹  
相持得居虛位海內無主四十餘年秦據勢勝之地  
騁譎詐之術征伐關東蠶食九國至於始皇乃定天  
位曠日若彼用力若此非深根固蒂不拔之道乎漢  
祖奮三尺之劍騁烏合之衆五年之中而成帝業自  
開闢已來其興功立勳未有若漢之易者也夫伐深  
根者難爲功摧枯朽者易爲力理勢然也漢鑒秦之

失封植子弟及諸呂擅權圖危劉氏而天下所以不  
傾動百姓所以不易心者徒以東牟朱虛受命於內  
齊伐吳楚作衛於外向使高祖踵亡秦之法忽先王  
之制則天下以之劉氏有也大魏之興觀五代之  
存亡而不用其長策覩前車之傾覆而不改其轍跡  
子弟王空虛之地君亡使民之失宗室竄於閭閻不  
聞邦國之政權均足夫勢齊凡庶內無深根不拔之  
固外無盤石宗盟之助非所以安社稷爲萬世之業  
也

晉陸機辨亡論曰昔漢氏失御姦臣竊命禍基京畿

毒徧宇內皇綱弛紊王室遂卑於是羣雄蜂駭義兵  
四合吳武烈皇帝慷慨下國電發荆南權略紛紜忠  
勇伯世威稜則夷羿震盪兵交則醜虜授馘遂掃清  
宗祊蒸禋皇祖于時雲興之將帶州颺起之師跨邑  
雖兵以義合同盟戮力然皆包藏禍心阻兵怙亂或  
師無謀律喪威稔寇忠規武節未有如此其著者也  
武烈既沒長沙桓王逸才命世弱冠秀發招攬遺老  
與之述業神兵東驅奮寡犯衆攻無堅城之將戰無  
交鋒之虜誅叛柔服而江外底定飭法修師則威德  
翕赫將北伐諸華誅鉏于紀旋皇輿於夷庚反帝座

乎紫闥挾天子以令諸侯清天步而歸舊物戎車既  
次羣凶側目大業未就中世而殞用集我大皇帝以  
竒蹤襲於逸軌睿心因乎令圖從政咨於故實播憲  
稽乎遺風而加之以篤固申之以節儉疇咨俊茂好  
謀善斷東帛旅於丘園旌命交乎塗巷故豪彥尋聲  
而嚮臻志士希光而景驚異人輻輳猛士如林謀無  
遺謂舉不失策故遂割據山川跨制荆吳而與天下  
爭衡矣故魏人請好漢氏乞盟遂躋天號鼎峙而立  
於是講八代之禮蒐三皇之樂告類上帝拱揖羣后  
虎臣毅卒循江而守長棘勁鍛望颺而奮庶尹盡規

於上四民展業於下化協殊裔風衍遐圻乃俾一介行人撫巡外域巨象逸駿擾於外閑明珠瑋寶耀於內府珍瑰重跡而至奇玩應響而赴輻軒騁於南荒衝輞息於朔野齊民免干戈之患戎馬無晨服之虞而帝業固矣爰及末葉羣公既喪然後黔首有瓦解之志皇家有土崩之覺歷命應化而微王師躡運而發卒散於陣民奔于邑城池無藩籬之固山川無溝阜之勢軍未浹辰而社稷夷矣雖忠臣發憤烈士死節將奚救哉夫曹劉之將非一世所選向時人之師無曩日之衆戰守之道抑有前符險阻之利俄然未



改而成敗貿理古今詭趣何哉彼此之化殊授任之才異也又辨亾論下曰昔三方之士魏人據中夏漢氏有岷益吳制荆揚而掩交廣曹氏雖功濟諸華虐亦深矣其民怨劉公因險飾智功已薄矣其俗陋夫吳桓王基之以武太祖成之以德聰明睿達懿度深遠矣其求賢如弗及恤民如稚子接士盡盛德之容親仁罄丹府之愛拔呂蒙於戎行擢潘濬於係虜推誠信士不恤人之我欺量能授器不患權之我逼地方幾萬里帶甲將百萬其野沃其民練其器利其財豐東負滄海西阻險塞長江制其區宇峻山帶其封



域國家之利未巨有弘於茲者矣借使中才守之以道善人御之有術敦率遺典勤民謹政循定策守常險則可以長世永年未有危亡之患易曰湯武革命順乎天玄曰亂不極則治不形言帝王之因天時也古人有言曰天時不如地利易曰王侯設險以守其國言爲國之恃險也又曰地利不如人和在德不在險言守險之由人也吳之興也參而由焉孫卿所謂合其參者也及其亾也恃險而已又孫卿所謂捨其參者也夫四州之萌非無衆也大江之南非乏俊也山川之險易守也勁利之器易用也先政之策易循

也功不興而禍遘何哉所以用之者失也故先王達經國之長規審存亡之至數謙已以安百姓敦惠以致人和寬中以誘俊乂之謀慈和以結士民之愛是

以其安也則黎元與之同慶及其危也則兆庶與之共患安與衆同慶則危不可得也危與下共患則其難不足恤也夫然故能保其社稷而固其土宇麥秀無悲殷之思黍離無愍周之感矣

晉于寶晉紀總論曰昔高祖宣皇帝以雄才碩量應運而仕至於百姓與能大象始構矣世宗承基太祖繼業始當非常之禮終受備物之錫至于世祖遂享

皇極正位居體聿修祖宗之志思輯戰國之苦腹心  
不同公卿異議而獨納羊祜之策至于咸寧之末遂  
排羣議而仗王杜之決汎舟三峽介馬桂陽役不二  
時江湖來同掩唐虞之舊域班正朔於八荒太康之  
中天下書同文車同軌牛馬被野餘糧棲畝行旅草  
舍外閭不閉雖太平未洽亦百代一時矣二十餘年  
而河洛爲墟戎羯稱制二帝失尊山陵無所何哉樹  
立失權託付非才四維不張而苟且之政多也夫天  
下者大器也器大者不可以小道理勢重者不可以  
爭競擾古先哲王知其然也是以扞其大患而不有

其功禦其大災而不尸其利是以感而應之悅而歸  
之如晨風之鬱北林魚龍之趨淵澤也然後設禮文  
以理之斷刑罰以威之故衆悅其教而安其俗君子  
勤禮小人盡力廉恥篤於家閭邪僻銷於胸懷又况  
可奮臂大呼聚之以干紀作亂之事乎加之朝寡醇  
德之士鄉之不二之老風俗淫僻趣向失所學者以  
莊老爲宗而黜六經談者以虛薄爲辨而賤名檢當  
官者以望空爲高而笑勤恪劉頌屢言治道傳咸每  
糾邪正皆謂之俗吏若夫文王日昃不暇食仲山甫  
夙夜匪懈者蓋共嗤黜以爲灰塵而相詬病矣由是

毀譽亂於善惡之實情，慝奔於貨欲之塗，選者爲人擇官，官者爲身澤利，其婦女莊櫛織紝，皆取成於婢僕，未嘗知女功絲枲之業，中饋酒食之事也。故皆不恥淫佚之過，不拘妬忌之惡，有殺戮妾媵，有黷亂上下，父兄不之罪，天下莫之非，又况責之聞四教於古，修貞順於今，以輔佐君子者哉？禮法刑政於此大壞，如室之斯構而去其鑿契，如水斯積而決其隄防，如火斯畜而離其薪燎也。國將亾，本必先顛，其此之謂乎

天皇氏

顏峻始學篇曰：天地立有天皇十三頭，號曰天靈治

萬八千歲

洞冥記曰：一姓十三人也

徐整三五曆紀云：歲起攝提元氣，肇有神靈一人，有十三頭，號天皇

春秋緯曰：天皇地皇人皇兄弟九人，分九州長天下也

遁甲開山圖曰：天皇被跡在桂州崑崙山下

地皇氏

顏峻始學篇曰：地皇十一頭，治八千歲

帝系譜曰：地皇治一萬八千歲，以火德王

遁甲開山圖曰地皇興於熊耳龍門山

人皇氏

顏峻始學篇曰人皇九頭兄弟各三百歲依山川土地之勢裁度爲九州各居其一方因是而區別榮氏曰人皇兄弟九人生於刑馬山身九色

有巢氏

顏峻始學篇曰上古皆穴處有聖人教之巢居號大巢氏皇甫謐以爲有巢在女媧之後

遁甲開山圖曰石樓山在琅琊昔有巢氏治此山南燧人氏

尚書太傅曰燧人爲燧皇以火紀官禮合文嘉曰燧人始鑽木取火炮生爲熟令人無腹疾遂天之意故爲燧人

太昊庖犧氏

易曰古者庖犧氏之王天下也仰則觀象於天俯則觀法於地觀鳥獸之文與地之宜近取諸身遠取諸物於是始作八卦以通神明之德以類萬物之情結繩而網罟以畋以漁蓋取諸離

禮合文嘉曰伏羲德洽上下天應以鳥獸文章地應以龜書伏羲乃則象作易

帝王世紀曰太昊帝庖犧氏風姓也虵身人首有聖德都陳作瑟三十六絃

贊魏陳王曹植庖羲贊曰木德風姓八卦創焉龍瑞名官法地象天庖廚祭祀罟網魚畋瑟以像時神德通玄

### 帝女媧氏

淮南子曰往古之時四極廢九州裂天不兼覆地不周載猛獸食精民也精善也鷲鳥攫老弱於是女媧鍊五色石以補蒼天斷鼈足以立四方極鼈大也蒼天神四極正淫水涸冀州平狡蟲殛精民生背方州抱圓天

帝王世紀曰帝女媧氏亦風姓也作笙簧亦虵身人首一曰女希是為女皇其末諸侯共工氏任知刑以強伯而不王

贊魏陳王曹植女媧贊曰古之國君造簧作笙禮物未就軒轅纂成或云二皇人首虵形神化七十何德之靈

### 炎帝神農氏

易曰神農氏作斲木為耜揉木為耒耒耨之利以教天下蓋取諸益日中為市致天下之貨交易而退各得其所蓋取諸噬嗑

周書曰神農之時天雨粟神農耕而種之作陶冶斤

斧爲耜鉏耨以墾草莽然後五穀興以助菓蓂實

春秋命歷序曰有神人名石年蒼色大眉戴玉理

玉理

猶玉英神農也

呂氏春秋曰神農教曰土有當年不耕者則天下或受其饑矣女有當年不績者則天下或受其寒矣故夫親耕妻親績

賈誼書曰神農以爲走禽難以久養民乃求可食之物嘗百草察實鹹苦之味教民食穀

帝王世紀曰炎帝神農氏姜姓也人身牛首長於姜

水有聖德都陳作五絃之琴始教天下種穀故號神農氏諸侯夙沙氏叛不用命箕文諫而殺之炎帝退而修德夙沙之民自攻其君而歸炎帝

贊魏陳王曹植神農贊曰少典之胤火德承木造爲耒耜導民播穀正爲雅琴以暢風俗

### 黃帝軒轅氏

易曰黃帝垂衣裳而天下治蓋取乾坤也

左傳曰剡子曰黃帝以雲紀官故爲雲師而雲名

河圖挺佐輔曰黃帝修德立義天下大治乃召天老而問焉余夢見兩龍挺白圖以授余於河之都天老

曰河出龍圖雒出龜書紀帝錄列聖人之姓號興謀  
治太平然後鳳皇處之今鳳皇以下三百六十日矣  
天其受帝圖乎黃帝乃被齋七日至於翠嬀之川大  
鱸魚折溜而至乃與天老迎之五色畢具魚汎白圖  
蘭葉朱文以授黃帝名曰錄圖

龍魚河圖曰黃帝時有蚩尤兄弟八十一人並獸身  
人語銅頭鐵額食沙石子造立兵杖刀戟大弩威振  
天下誅殺無道不仁慈萬民欲令黃帝行天下事黃  
帝仁義不能禁蚩尤黃帝仰天而嘆天遣玄女下授  
黃帝兵信神符制伏蚩尤帝因使之主兵以制八方

蚩尤沒後天下復擾亂黃帝遂畫蚩尤形像以威天  
下天下咸謂蚩尤不死八方萬邦皆爲弭伏

春秋內事曰軒轅氏以土德王天下始有堂廡高棟  
深宇以避風雨

列子曰黃帝喜天下之戴已也養正命娛耳目乃喟  
然歎曰養一已治萬物其患如此於是放萬機舍宮  
寢退而間居大庭之館齋心服形三月不親政事晝  
寢而夢遊於華胥華胥氏國不知距齊國幾千里

齊蓋非舟車足力之所及神遊而已其國入水不溺  
入火不熱乘空如履實寢虛若處牀黃帝既寤怡然

自得又二十八年天下大治幾若華胥國矣

淮南子曰黃帝治天下而力牧太山稽輔之使強不  
得掩弱衆不得暴寡人民保命而不夭歲時熟而不  
凶百官正而無私輔弼公而不阿道不拾遺市不預  
賈城郭不閉邑無盜賊人相讓以財狗彘吐菽粟於  
道路而無忿爭之心於是日月精明星辰不失其行  
風雨時節五穀登熟虎豹不妄噬鷲鳥不妄搏鳳皇  
翔於庭麒麟遊於郊青龍進駕飛煌伏阜

飛黃出西方其狀如

狐背上有角乘之諸北儋耳之國莫不獻其貢職

極之夷國

史記封禪書曰黃帝得僊上天羣臣葬其衣冠

帝王世紀曰黃帝有熊氏少典之子姬姓也生壽丘  
長于姬水龍顏有聖德受國於有熊居軒轅之丘故  
因以爲號治五氣設五量及神農氏衰黃帝修德撫  
民諸侯咸去神農而歸之黃帝於是乃擾馴猛獸與  
神農氏戰于版泉之野三戰而克之又徵諸侯使力  
牧神農直討蚩尤氏擒之于涿鹿之野使應龍殺之  
于凶黎之丘凡五十二戰而天下大服有妃生二十  
五子黃帝在位百年而崩年百一十歲矣或傳以爲  
仙或言壽三百歲葬于上郡陽周之橋山



抱朴子曰黃帝生而能言役使百靈可謂天授自然體之者猶復不敢端坐而得道故陟王屋而受丹經到鼎湖而飛流珠登崆峒而問廣成之具茨而事大隗適東岱而奉中黃入金谷而諮子心論導養而質玄素二女精推步則訪山稽力牧講占候則詢風后著體詠則受雷岐審攻戰則納五音之策窮神姦則記澤之辭相地理則書青鳥之說救傷殘則綴金冶之術故能畢記秘要窮盡道真遂升龍以高濟與天地乎罔極

**頌**晉牽秀黃帝頌曰邈矣黃軒應天載靈通幽遠覽觀象設形誕敷厥訓彝倫攸經德從風流化與雲征皇猷允塞地平天成爰登方岳封禪勒成紛然鳳舉龍騰太清違茲九土陟彼高冥民斯攸慕涕泗沾纓遐而不墜式頌德聲

**贊**魏陳王曹植黃帝贊曰少典之孫神明聖哲土德承火赤帝是滅服牛乘馬衣裳是制氏雲名官功冠五列又黃帝三鼎贊曰鼎質文精古之神器黃帝是鑄以像太一能輕能重知凶識吉世衰則隱世和則出

晉曹毗黃帝贊曰軒轅應玄期幼能總百神體鍊五

靈妙氣含雲露津摻石曾城岫鑄鼎荆山濱豁焉天扉闢飄然跨騰鱗儀轡灑長風寒裳躡紫宸

周庾信黃帝見廣成畫贊曰治身紫府問政青丘龍湖鼎沒丹竈珠流疎雲即雨落木先秋至道須極長生可求

少昊金天氏

左傳曰郟子曰我高祖少昊摯之立也鳳鳥適至故紀於鳥爲鳥師而鳥名焉

帝王世紀曰少昊帝名摯字青陽姬姓也降居江水有聖德邑于窮桑以登帝位都曲阜故或謂之窮桑

即圖讖所謂白帝朱宣者也故稱少昊號金天氏在位百年而崩

贊陳思王曹植少昊贊曰祖自軒轅青陽之裔金德承土儀鳳帝世官鳥號名殊職別系農正扈氏各有品制

顓頊高陽氏

史記曰帝顓頊高陽者靜深有謀䟽通知事北至幽陵南至交趾西濟流沙東至蟠木動靜之物大小之神日月所照莫不砥屬

帝王世紀曰帝顓頊高陽氏黃帝之孫昌意之子姬

姓也母曰景僕蜀山氏女爲昌意正妃謂之女樞金天氏之末女樞生顓頊於若水首戴干戈有聖德父昌意雖黃帝之嫡以德劣降居若水爲諸侯及顓頊生十年而佐少昊二十而登帝位平九黎之亂以水事紀官南正重司天以屬神北正黎司地以屬民於是民神不雜萬物有序始都窮桑徙商丘命飛龍効八風之音作樂五英以祭上帝世有才子八人號八凱顓頊在位七十八年年九十一歲歲在鶉火而崩葬東郡頓丘廣陽里

贊魏曹植帝顓頊贊曰昌意之子祖自軒轅始誅九

黎水德統天以國爲號風化神宣威暢八極靡不祗虔

### 帝嚳高辛氏

史記曰帝嚳高辛氏者黃帝之曾孫也父曰螭極螭極父曰玄囂玄囂父曰黃帝自玄囂與螭極不得在位帝嚳生而神靈自言其名日月所照風雨所至莫不從助

帝王世紀曰帝嚳高辛氏姬姓也有聖德年十五而佐顓頊四十登位都亳以人事紀官故以勾芒爲木正祝融爲火正蓐收爲金正玄冥爲水正后土爲土

正是五行之官分職而治諸侯於是化被天下遂作樂六莖以康帝位世有材子八人號曰八元亦納四妃卜其子皆有天下元妃有台氏女曰姜嫄生后稷次有娥氏女曰簡翟生高次陳豐氏女曰慶都生放勳次嫫訾氏女曰常儀生摯帝嚳在位七十年年百五歲而崩葬東郡頓丘廣陽里

贊魏陳思王曹植帝嚳贊曰祖自軒轅玄囂之裔生言其名木德帝世撫寧天地神聖靈察教弭四海明並日月

### 帝堯陶唐氏

尚書堯典曰若稽古帝堯曰放勳欽明文思安安允恭克讓光被四表格于上下克明俊德以親九族九族既睦平章百姓百姓昭明協和萬邦黎民於變時雍

論語曰大哉堯之爲君也巍巍乎唯天爲大唯堯則之蕩蕩乎民無能名焉巍巍乎其有成功也煥乎其有文章

春秋元命苞曰堯眉八采是謂通明歷象日月璇璣玉衡

尚書中候曰帝堯即政榮光出河休氣四塞龍馬銜

甲赤文綠色甲似龜背五色有列星之分斗政之度  
帝王錄紀興亡之數

大戴禮曰宰我曰請問帝堯孔子曰其仁如天其智  
如神就之如日望之如雲富而不驕貴而不豫

淮南子曰人之所以樂爲天子者以其窮耳目之欲  
而適躬體之便也今高臺曾榭人之所麗也而堯采  
椽不斲斥題不斲言梁柱相斥珍恠竒味人之所美  
也而堯糲梁之飯藜藿之羹文錦狐白人之所好也  
而堯布衣掩形鹿裘禦寒養生之具厚不加以增之  
以大任重之憂故舉天下而傳之舜若釋負然

帝王世紀曰帝堯陶唐氏祁姓也母慶才孕十四月  
而生堯於丹陵名曰放勛鳥庭河勝或從母姓伊氏  
年十五而佐帝摯受封於唐爲諸侯身長十尺嘗夢  
天而上之故二十而登帝位都平陽置敢諫之鼓命  
羲和四子羲仲羲叔和仲和叔分掌四時方嶽之職  
故名曰四嶽也諸侯有苗氏處南蠻而不服堯征而  
克之于丹水之浦乃以尹壽許由爲師夔放山川谿  
谷之音作樂大章天下大和百姓無事有五十老人  
擊壤於道觀者歎曰大哉帝之德也老人曰吾日出  
而作日入而息鑿井而飲耕田而食帝何力於我哉

於是景星曜於天甘露降於地朱草生於郊鳳皇止於庭嘉禾孳於畝澧泉湧於山焦僥民來貢沒羽厨中自生肉脯其薄如翼形搖鼓自生風使食物寒而不臭名曰翼脯又有草夾階而生隨月生死王者以是占日月之數惟盛德之君應和而生故堯有之名曰蓂莢始封稷契咎繇褒進伯禹納舜于大麓後年二月又率羣臣刻璧爲書東沈洛水言天命當傳舜之意今中候運衡之篇是也凡堯即位九十八年年百一十八歲乃殂百姓如喪考妣三載四海遏密八音葬于濟陰之成陽西北是爲穀林堯取富宜氏女

曰女皇生丹朱又有庶子九人皆不肖故以天下命舜曰咨爾舜天之曆數在爾躬允執其中四海困窮天祿永終及堯三年喪畢舜踐天子位

符子曰堯曰余坐華殿之上森然而松生於棟余立櫺扉之內霏焉而雲生於牖雖面雙闕無異乎崔魏之冠蓬萊雖背墉柳無異乎迴巒之縈崑崙余安知其所以安

贊魏陳王曹植帝堯畫贊曰火德統位父則高辛克平共工萬國同塵調適陰陽其惠如春巍巍成功配天則神

帝舜有虞氏

尚書舜典曰慎徽五典五典克從納于百揆百揆時敘賓于四門四門穆穆納于大麓烈風雷雨弗迷帝曰咨爾舜詢事考言乃言底可績三載汝陟帝位禮記曰子曰舜其大智也與好察邇言隱惡而揚善執其兩端用其中於民其斯以為舜乎又曰昔舜作五絃之琴以歌南風

論語曰無為而治者其舜也與夫何為哉恭己正南面而已矣

孝經援神契曰舜龍顏重瞳大口手握

重瞳象電多精光也

大口象斗屋口也握衰手中有衰字喻從勞苦起受衰飾致大位也

維書靈准聽曰有人方面曰衡重華

日衡衡有骨表如日者也握

石推懷神珠

推讀鍾鑪鍾平輕重者也握石鍾謂知璇璣之道也懷神珠喻有聖智也

舜受終鳳皇儀黃龍感朱草生堯莢孳西王母授益

地圖

西王母得益地之圖來獻

孟子曰雞初鳴而起孳孳為善者舜之徒也雞初鳴而起孳孳為利者蹠之徒也

蹠盜

又曰堯之於舜使其子九男事之妻以二女焉百官牛羊倉廩備以養

舜於畎畝之中而後舉加諸上位又曰舜聞一善言見一善行若決江湖沛然莫之能禦也

尸子曰舜一徙成邑再徙成都三徙成國堯聞其賢  
徵之草茅之中與之語禮樂而不逆與之語政至簡  
而行與之語道廣大而不窮於是妻之以媿媵之以  
娥九子事之而託天下焉

韓子曰歷山農者侵畔舜往耕耨年而耕者讓畔河  
濱漁者爭坵舜往漁耨年而漁者讓長東夷之陶者  
苦窳舜往陶耨年而器以牢

呂氏春秋曰舜有子九人不予其子而授禹至公也  
帝王世紀曰帝有虞氏姚姓也目重瞳故名重華字  
都君有聖德始遷於負夏販於頓丘債於傅虛家本

冀州每徙則百姓歸之堯於是見舜於貳宮設饗禮  
迭爲賓主南面而問政堯乃試以五典遂舉八凱使  
佐后土以揆百事舉八元使布五教于四方舜於是  
有大功二十故夢眉長與髮等堯乃賜舜以昭華之  
玉老而命舜代已攝政舜東巡狩登南山觀河渚受  
圖書褒賜羣臣尊任伯禹稷契臯繇伯益地有苗氏  
負固不服禹請征之舜曰我德不厚而行武非道也  
吾前教由未也乃修教三年執干戚而舞之有苗請  
服立誹謗之木申命九官十二牧三載一考績三載  
黜陟幽明禹爲司空功被天下棄爲后稷播時百穀



契爲司徒敬敷五教皐繇爲士典刑惟明倬爲共工  
莫不致力益爲朕庶物繁植伯夷爲秩宗三禮不  
闕夔爲樂正神人以和龍爲納言出內惟允於是俊  
又在官羣后德讓百僚師師以五采章施于五色爲  
服以六律五聲八音協治治用之和蒸民乃粒萬邦  
作乂庶績咸熙乃作大韶之樂簫韶九成鳳皇來儀  
擊石拊石百獸率舞故孔子稱韶盡美矣又盡善也  
景星曜於房羣瑞畢致地出乘黃舜於是德被天下  
薦於天使禹攝政有苗氏叛南征崩于鳴條殞以瓦  
棺葬于蒼梧九疑山之陽是爲凌零謂之紀市在今

營道下有羣象爲之耕

贊魏陳王曹植帝舜贊曰顓頊氏族重瞳神聖克協  
頑瞽應唐涖政除凶舉俊以齊七政應曆受禪顯天  
之命

晉夏侯湛虞舜贊曰有虞悒悒揖讓鼓琴垂拱臨民  
詠彼南音世澄道玄天下混心思民王度如玉如金  
晉庾闡虞舜像贊并序曰夫至道玄妙非器象所載  
靈化潛融非軌迹所傳故道資冲樸則謂之三皇德  
被羣生則號稱舜禹是以先王因其會通制爲准極  
功格於天則配于上帝法施於民則載在祀典然後

名教彰於至治王道煥乎無窮故茲堂之構也有自來矣然樹寢所以栖神而寢非神之所期立像所以表德而像非德之所存若乃廢其軌景洞其玄真雖冥照之鑒獨朗天下惡乎注其耳目哉遂乃顯圖靈像廓其廟壇俾天光焜於宇宙南風散乎五絃豈謂神道之妙可寄之於有涯哉蓋亦暢悠悠者之心也其辭曰玄像焜耀萬物含靈飛龍在天陽德文明神道雖寂務由機生擁琴高詠寄和五聲玄風旣暢妙盡無名民鑒其朗孰測窈冥

周庾信舜干戚畫賛曰平風變律擊石來儀先齊七政夏服三危朱干獨舞玉戚空麾南風一曲恭已無爲

**碑**後魏温子昇舜廟碑曰懷山不已龍門未闢大道御世天下爲公感夢長人明歟久陋釐降二女結友九男執耜歷山耕夫所以讓畔施畧雷澤漁父於是讓川亦旣登庸以之納錄九官咸事百揆時叙有大功於當世集歷數而在躬受文祖之命致昭華之玉班五瑞於羣后禋六宗於上玄舞干戚而遠夷賓棄金璧而幽靈應青雲浮洛榮光塞河符瑞必臻休祥咸萃以君人之大德爲帝王之稱首陟方之駕遂往

蒼梧之窆不歸爰自先民實存舊廟既緝葯房遂鎮  
瑤席龍駕帝服益依稀於慕舜交鼓亘瑟實髣髴於  
聞韶其辭曰虹氣降靈姚墟誕聖樹陰未徙帝圖已  
定乃賓四門以齊七政天眷功高民歸德盛治既蕩  
蕩化亦巍巍南風在詠西環有歸疑山永逝湘水長  
違靈宮肅肅神館微微

文宋顏延之爲湘州祭虞帝文曰惟哲化神繼天作  
聖藏器漁陶致身愛敬是以二妃嬪德九子觀命在  
麓不迷御衡以正唐歷旣終虞道乃光咨堯授禹素  
俎采堂百齡厭世萬里陟方敬詢故老欽咨聖君職  
奉西湘虔屬南雲神之聽之匪酒伊葷

### 帝禹夏后氏

尚書大禹謨曰受命于神宗率百官若帝之初

從舜初授

帝政事奉行之

論語曰子曰禹吾無間然矣菲飲食而致孝乎鬼神  
惡衣服而致美乎黻冕卑宮室而盡力乎溝洫  
禮含文嘉曰禹卑宮室垂意於溝洫百穀用成神龍  
至靈龜服玉女敬養天賜

春秋元命苞曰禹之時民大樂其駢三聖相繼故夏  
者大也

左傳曰禹會諸侯於塗山執玉帛者萬國

尚書中候曰伯禹曰臣觀河伯面長人首魚身出水

曰吾河精也授臣河圖

尚書璇璣鈴曰禹開龍門導積石

玄圭出刻曰延喜玉受德天賜佩禹功既成天出玄圭以賜之占者以

德佩禹有治水功故天佩以玄圭

呂氏春秋曰禹南濟乎江黃龍負舟事具祥瑞部

淮南子曰禹沐淫雨擲疾風決江疏河鑿龍門闢伊

闕乘四載隨山刊木平治水土定七百國又曰禹為

水以身解於陽肝之河解禱也陽肝河在秦

吳越春秋曰禹案黃帝中經見聖人所記曰在九疑

山東南天柱號曰宛委承以文玉覆以盤石其書金

簡青玉為字編以白銀皆瑑其文禹乃東巡登衡山

求之赤繡文衣男子自稱玄夷蒼水使者來候禹令

齋三月更求之禹乃三日齋登宛委山取得書得通

水之理遂周行天下使益疏記之名山海經也

鬻子曰禹飯一饋而七起曰吾不恐四海之士留於

道路也恐其留吾門也是以四海之士皆至禹當朝

廷門可以羅雀

帝王世紀曰伯禹夏后氏姒姓也生於石砌虎鼻大



口兩耳參漏首戴鈎鈐曾玉斗足文履已故名文  
命字高密身長九尺二寸長於西羌西羌夷人也其  
父既放降在疋庶有聖德夢目洗於河西四嶽師舉  
之舜進之堯堯命以爲司空繼鯀治水乃勞身涉勤  
不重徑尺之璧而愛日之寸陰手足胼胝故世傳禹  
病偏枯足不相過至今巫稱禹步是也又納禮賢人  
一沐三握髮一食三起堯美其績乃賜姓姒氏封爲  
夏伯故謂之伯禹天下宗之謂之大禹年百歲崩于  
會稽因葬會稽山陰縣之南今山上有禹冢并祠下  
有羣鳥芸田又曰禹葬衣衾三領桐棺三寸葛以繡

之下不及泉上不通晷既葬收餘壤爲壠若叅耕之  
畝

符子曰禹讓天下於奇子奇子曰君言佐舜勞矣鑿  
山川通河漢首無髮股無毛故舜也以勞報子我生  
而逸不能爲君之勞矣

贊魏陳王曹植夏禹贊曰吁嗟夫子拯世濟民克卑  
宮室致孝鬼神蔬食薄服緋冕乃新厥德不回其誠  
可親疊疊其德温温其仁尼稱無間何德之純又曰  
禹治水贊曰嗟夫夏禹寔勞水功西鑿龍門疏河道  
江梁岐既闢九州以同天賜玄圭奄有萬邦又禹渡

河贊曰禹濟于河黃龍負舩舟人並懼禹歎仰天子  
受大運動功恤民死亡命也龍乃弭身

周庾信渡江贊曰三江初鑿九谷新成風飛鷁涌水  
起龍驚樂天知命無待憂生危舟遂靜亂揖還平

藝文類聚卷第十二

唐太子率更令弘文館學士歐陽詢撰

明 秣 陵 王元貞校

帝王部二

殷成湯 周文王 周武王 周成王  
漢高帝 漢文帝 漢景帝 漢武帝  
漢昭帝 漢宣帝 漢光武帝  
漢明帝

殷成湯

春秋元命苞曰湯臂四肘是謂神肘

尚書璇璣鈴曰湯受金符帝籙白狼銜鉤入殷朝

尚書中候曰天乙在亳諸鄰國襁負歸德東觀乎維

降三分璧黃魚雙躍出濟于壇化為黑玉赤勒曰玄



精天乙受神福伐桀克

尚書湯誓曰伊尹相湯伐桀升自陟遂與桀戰于鳴條之野

春秋元命苞曰湯之時其民大樂其救之於患害故

樂名大護護者救也

云

云

扶都感白氣而生湯

周書曰湯放桀而歸於亳三千諸侯大會湯取天子之璽置之於天子之座左復而再拜從諸侯之位湯曰此天子之位有道者可以處之矣夫天下非一家之有也有道者之有也故天下者唯有道者理之唯有道者宜處之湯以此三讓三千諸侯莫敢即位然

後湯即天子之位

孟子曰湯居亳與葛為鄰葛伯不祀湯使人問何為不祀曰無以供犧牲湯遺之牛羊葛伯得而食之又

不祀湯又問之曰無以供粢盛湯使亳民為之耕老弱饋食葛伯率眾要其酒肉黍稷者遮而奪之不以

饋者則殺之有一童子以黍肉餉殺而奪焉湯乃

與師伐葛伯天下聞之皆曰非富天下也為疋夫疋

婦報讎也

呂氏春秋曰成湯之時有穀生於庭昏生至旦而大合拱史請卜其故湯退卜者曰吾聞祥者福之先也



見祥而爲不善則福不至妖者禍之先也見妖而爲善則禍不至於是早朝晏退問疾弔喪務鎮撫百姓三日而穀亡

尚書太傅曰夏人飲酒醉者持不醉者不醉者持醉者相和而歌曰盍歸于亳盍歸于亳上亳亦大矣故

伊尹退而閑居深聽樂聲思其故也是時伊尹化桀更曰覺兮較

兮吾大命格兮覺兮謂先知者較兮謂直道者也格至也吾語桀也去不善曰

就善何樂兮伊尹入告于桀曰大命之亡有日矣桀啞笑曰天之有日猶吾之有民也日亡吾亦亡矣是以伊尹遂去夏適湯

說苑曰湯欲伐桀伊尹請且乏貢職以觀夏動桀怒起九夷之師伊尹曰未可彼尚能起九夷之師是罪在我也湯乃謝請服入貢職明年又乏貢職桀起九夷之師九夷之師不起伊尹曰可矣湯乃興師伐桀殘之遷於南巢

帝王世紀曰成湯一名帝乙豐下銳上倨身而揚聲長九尺有聖德諸侯有不義者湯從而征之誅其君弔其民天下咸悅故東征則西夷怨南征則北狄怨曰僕爲而後我凡二十七征而德施於諸侯出見羅者方祝曰從天下者從地出者四方來者皆入吾羅

湯曰嘻盡之矣非桀其孰能爲此哉乃命解其三面而置其一而更教之祝曰欲左者左欲右者右欲高者高欲下者下吾取其犯命者漢南諸侯聞之咸曰湯之德至矣澤及禽獸况於人乎一時歸者三十六國及夏桀無道臯諫者湯使人哭之桀囚湯使於夏臺而後釋之諸侯由是咸叛桀附湯同日貢職者五百國三年而天下咸服湯自伐桀後大旱七年殷史卜曰當以人禱湯曰吾所爲請雨者民也若必以人禱吾請自當遂齋戒剪髮斷爪以已爲牲禱於桑林之社言未已而大雨方數千里湯踐天子位十三年

年百歲而崩

**贊**魏陳王曹植殷湯贊曰殷湯伐夏諸侯振仰放桀鳴條南面以王桑林之禱炎災克償伊尹佐治可謂賢相又湯禱桑林贊曰惟殷之世炎旱七年湯禱桑林祈福于天剪髮離爪自以爲牲皇靈感應時雨以周庾信湯解網贊曰連珠雨起合玉雙沉穀爲祥樹桑成樂林三方落網一面驅禽德以行政仁乎用心

周文王

春秋元命苞曰文王四乳是謂含良蓋法酒旗布恩

舒明

酒者乳也能乳天下布恩之謂也

周書曰文王在鎬召太子發曰我身老矣吾語汝我所保與我所守傳之子孫吾厚德而廣惠不爲驕侈不爲泰靡童牛不服童馬不馳土不失其宜萬物不失其性天下不失時以成萬材萬材已成牧以爲人天下利之而勿德是謂大仁

墨子曰赤鳥銜珪降周之岐社日命周文王伐殷韓子曰昔文王請入雖西地赤壤之國方千里以解炮烙之刑天下皆說

仲尼曰大哉文王輕千乘之國而請解炮烙之刑韓詩外傳曰昔周文王寢疾五日而地動東西南北

不出四郊有司請曰臣聞地之動爲人主也今者君王寢疾五日而地動四面不出國郊羣臣皆恐曰請移之文王曰奈何其移之也對曰興事動衆以增國城其可移之文王曰夫天之見妖以伐有罪我必有罪故天以罰我也今又專興事動衆以增國城是重吾罪也不可請改行重善移之其可以免乎於是遂謹其禮秩皮革以交諸侯飾其辭令幣帛以出禮俊士頒其爵列等級田疇以賞羣臣行無幾何而止疾琴操曰受命者謂文王受天命而王文王以紂時爲岐侯躬修道德執行仁義百姓附親是時紂爲無道

剗胎斲涉廢壞仁人天統易運諸侯瓦解皆歸文王  
其後有鳳皇銜書於文王之郊文王曰殷帝無道虐  
亂天下皇命已移不得復久乃作鳳皇之歌其章曰  
翼翼翔翔彼鸞皇兮銜書來遊以命昌兮瞻天案圖  
殷將亡兮蒼蒼昊天始有萌兮神連精合謀於房兮  
又曰文王備修道德百姓親附文王有二子周公武  
王皆聖是時崇侯虎與文王列爲諸侯德不及文王  
常嫉妬之乃譖文王於紂曰西伯昌聖人也長子發  
中子旦皆聖人也三聖合謀君其慮之乃囚文王於  
羑里將欲殺之於是文王四臣散宜生等周流海內

經歷豐土得美女二人水中大貝白馬朱鬣以獻於  
紂陳於中庭紛立出西伯文王在羑里時演易八卦  
以六十四作鬱厄之辭困於石據於蒺藜乃申憤以  
作歌曰殷道溷溷浸濁煩兮朱紫相合不別分兮迷  
亂聲色信讒言兮炎炎之虐使我愆兮幽閉牢窸由  
其言兮遘我四人憂勤勤兮

論衡曰文王飲酒千鍾孔子百觚言聖人能以德持  
酒也如一坐千鍾百觚此酒徒非聖人也

帝王世紀曰文王昌龍顏虎肩身長十尺臂有四乳  
敬老慈幼晏朝不食以延四方之士是以大顛閔天

散宜生南宮适之屬咸至是爲四臣文王雖在諸侯之位襲父爲西伯紂旣囚文王文王之長子曰伯邑考質于殷爲紂御紂烹以爲羹賜文王曰聖人當不食其子羹文王得而食之紂曰誰謂西伯聖者食其子羹尚不知也

贊魏陳王曹植文王贊曰於赫聖德寔惟文王三分有二猶服事商化加虞芮傍暨西方王業克昭武嗣遂光又文王赤雀贊曰西伯積德天命攸顧赤雀銜書爰集昌戶瑞爲天使和氣所致嗟爾後王昌期而至

周庾信文王見呂尚贊曰言歸養老垂釣西川岸止盤石谿唯小船風雨未感意氣怡然有此相望于今幾年

### 周武王

尚書中候曰太子發以紂存三仁雖即位不稱王樂稽耀嘉曰武王承命興師誅于商萬國咸喜軍渡孟津前歌後舞克殷之後民乃大安家給人足酌酒

鬱搖

鬱搖喜貌

史記曰武王修文王業東觀兵孟津爲文王木主載以車中軍自稱太子發言奉文王以伐不敢自尊遂

興師渡于河時諸侯不期而會孟津者八百諸侯皆曰紂可伐武王曰未可也乃還師居二年聞紂昏亂滋甚殺比干囚箕子太師疵少師彊微子抱其祭器而奔周於是武王乃渡孟津伐紂紂師皆倒于戈以戰紂軍潰叛紂死

帝王世紀曰武王見暍人王自左擁而右扇之紂政彌亂殷太史向摯載其圖書而歸周王以告于諸侯四年起師而東至商郊牧野乃作木櫓王韞係解五人御於前莫肯爲王係韞皆曰臣所以事君王非爲係韞也王乃釋旄鉞而係之與紂戰紂師敗績禽費

仲惡來紂赴于京自燔于宣室而死二嬖妾與妲己亦自殺乃以太白髦麾諸侯入殷商都百姓咸待于郊王使告曰上天降休商人皆拜王亦荅拜以兵入造紂及妲己尸王親射之三發然後下軍以劔擊之周公爲司徒使以黃鉞斬紂頭懸于太白之旗召公爲司空又使以玄鉞斬妲己頸懸之小白旗置旌於商容之廬命召公釋箕子之囚賜貝千朋命原公釋百姓之囚歸琬臺之珠玉命南宮适散鹿臺之財發巨橋之粟以賑貧民命南宮伯達史逸遷九鼎于洛邑命閎夭封比干之墓命宗祝饗祀于軍微子膠鬲

皆委質爲臣殷人咸喜曰王之於人也死猶封其墓况其生者乎王之於賢仁也亡者猶表其廬况其存者乎王之於財也聚者猶散之况其復藉者乎王之於色也在者猶歸其父母况復徵之乎

贊魏陳王曹植周武王贊曰桓桓武王繼世滅殷咸在尚父且作商臣功加四海救世濟民天下宗周萬國是賓

### 周成王

春秋元命苞曰文王造之而未遂武王遂之而未成周公旦抱少主而成之故曰成王

賈誼書曰周成王問鬻子曰寡人聞聖人在上位使民富且壽若夫富則可爲也若夫壽則在天乎鬻子對曰夫聖人在上位天下無軍兵之事故諸侯不私相攻而民不私相鬪也則民得盡一生矣聖人在上位則君積於德化而民積於用力故婦人爲其所衣丈夫爲其所食則民無凍餓已得二生矣聖人在上位則君積於仁吏積於愛民積於順則刑罰廢而無天遏之誅則民得三生矣聖人在上位則使人有時而用之有節則民無厲疾民得四生矣

史記曰成王少周公攝行政管叔蔡叔羣弟疑周公

與武庚作亂周公奉成王命誅武庚殺管叔放蔡叔以微子啓代殷後國於宋周公行政七年成王長周公反政成王北面就羣臣之位成王在豐使召公復營洛邑如武王之意卒營築居九鼎焉曰此天下之中四方入貢道理均

帝王世紀曰成王元年周公爲冢宰攝政王生少未能治事故號曰孺子八年春正月朔王始躬政事以周公爲太師封伯禽于魯父子並命周公拜於前魯公拜於後王以周公有勲勞於天下故加魯以四等之上兼二十四附庸地方七百里既營都洛邑復居

鄂鎬淮夷徐戎及奄叛王乃大搜於岐陽東伐淮夷

**贊**魏陳王曹植周成王贊曰成王繼武賢聖保傳年

雖幼稚岐嶷有素初疑周公終焉克寤旦奭佐治遂至刑錯又周公贊曰成王即位年尚幼稚周公居攝四海慕利罰叛柔服祥應仍至誦長反政達天

忠義

周庾信成王刻桐葉封虞叔贊曰虞叔百里居河之汾帝刻桐葉天書掌文禮以成德樂以歌勲天子無戲唐其有君

### 漢高帝

河圖提劉曰帝季日角戴勝斗胃龜背龍股長七尺



八寸明聖寬仁好士王軫

春秋孔演圖曰其人日角龍顏姓如金含仁義

史記曰高祖諱邦字季沛豐邑中陽里人爲人隆準而龍顏美鬚髯左股有七十二黑子寬仁愛人意豁如也爲泗上亭長常從王媪武負貫酒飲醉卧武負王媪見其上常有龍怪之高祖每留飲酒讎數倍吕公者好相人見高祖狀貌因敬重之吕公曰臣少好相人相人多矣無如季相願季自愛臣有息女願爲箕箒妾女即吕后也生孝惠帝魯元公主有一老父過請飲老父相吕后曰夫人天下貴人也令相兩子

見孝惠帝曰夫人所以貴者乃此男魯元公主亦皆貴老父已去高祖從旁舍來吕后具言高祖乃追及老父老父曰向見者夫人兒子皆似君相君相貴不可言及高祖貴遂不知老父去處高祖以亭長爲縣送徒於驪山到豐西澤中亭止飲夜皆解縱所送徒高祖夜經澤中前有大白蛇當徑高祖拔劍斬之秦始皇帝常曰東南有天子氣於是東遊高祖隱於芒碭山澤間吕后與人俱求常得之高祖怪問吕后吕后曰季所在山居常有雲氣故往常得季高祖興諸侯兵共擊項羽項羽敗而走使騎將灌嬰追殺羽東

城正月諸侯尊漢王爲皇帝又曰范增說項羽曰沛公居東貪於財貨好美姬今入關財物無所取婦女無所幸此其志不在小吾令人望氣皆爲龍虎成五采此天子氣也

漢書曰漢承堯運德祚已盛斷蛇著符旗幟尚赤協于火德自然之應得天統矣

論衡曰項羽與高祖俱起威力輕重未有所定高祖誅羽難於斬鐵也武王伐紂易於摧木也然則漢力勝周多矣湯武伐桀紂一敵也高祖誅秦殺項羽兼勝二家力倍湯武五代之起皆有因緣力易爲也高

祖從亭長提三尺劔取天下光武由白水奮威武帝海內無尺土所因一位所乘直奉天命推勳自然此則起高於川汗爲深於丘山也

荀悅漢紀論曰高祖開建大業統畢元功度量規矩不可尚矣天下初定庶事草創故韶夏之音天下未聞焉

帝王世紀曰禮稱至道以王義道以霸觀高祖之取天下也遭秦暴亂不階尺土之資不摧將相之柄發迹泗亭奮其智謀銜勒英雄鞭驅天下或以德致或以義成事以權斷順逆不常霸王之道雜焉是以居

帝王之位而無一定之制三代之美固難及矣

述後漢班固高祖紀述曰皇矣漢祖纂堯之緒實天生德聰明神武秦人不綱網漏于楚爰茲發迹斷蛇奮旅神母告符朱旗乃舉粵蹈秦郊嬰來稽首革命創制三章是紀應天順民五星同啓項氏叛援黜我巴漢西土宅心戰士憤怨乘釁而運席卷三秦割據河山保此懷民股肱簫曹社稷是經爪牙信布腹心良平恭行天罰赫赫明明

贊魏陳王曹植漢高皇帝贊曰屯雲斬蛇靈母告祥朱旗旣抗九野披攘禽嬰克羽掃滅英雄承機帝世

### 功著武湯

晉傅玄漢高祖畫贊曰赫赫漢祖受命龍興五星協象神母告徵討秦滅項如日之升超從側陋光據萬乘

周庾信漢高祖置酒沛宮畫贊曰遊子思舊來歸沛宮還迎故老更召歌童雖欣入沛方念移豐酒酣自舞先歌大風

碑後漢班固高祖泗水亭碑曰皇皇炎漢兆自沛豐乾降著符精感赤龍承魁流裔襲唐末風寸木尺土無埃斯亭建號宣基維以沛公揚威斬蛇金精摧傷

涉關凌灞受爵漢中勒兵陳東剗禽三秦陳張畫策  
蕭勃翼終出爵褒賢列土封功炎火之德彌光以明  
源清流潔本盛末弘序將八十贊述股肱休勲顯祚  
永永無疆於皇舊亭留嗣是承天之福祐萬年是興  
論後漢孔融周武王漢高祖論曰武王從后稷以來  
至其身相承積五十世俱有魚鳥之瑞至高祖一身  
修德瑞有四呂公望形而薦女呂后見雲知其處白  
蛇分神武哭西入關五星聚又武王伐紂斬而刺之  
高祖入秦赦子嬰而遺之是寬裕又不如高祖也  
魏高貴鄉公少康漢高祖論曰上問荀顛等曰有夏

既衰后相殄滅少康收輯夏衆復禹之績高祖拔起  
壟畝芟夷秦項考其功德誰宜爲先顛等曰造之與  
因難易不同少康功德雖美猶爲中興與漢世祖同  
流可也至如高祖臣等以爲優上曰少康生於滅亡  
之後降爲諸侯之隸能布其德而兆有其謀卒滅過  
戈復禹之績祀夏配天不失舊物非至德弘仁豈濟  
斯勲漢祖因土崩之勢收一時之權爲人子則數危  
其親爲人君則因賢祖爲人父則不能衛子身歿之  
後社稷幾傾若與少康易地而處或未能復大禹之  
績也推此言之宜高夏康而下漢祖也

漢文帝

史記曰孝文皇帝初立爲代王都中都高后崩呂產等欲爲亂以危劉氏大臣共誅之使人迎代王代王問左右郎中令張武張武等議願大王稱疾以無往觀其變中尉宋昌進曰羣臣議皆非也今高帝子獨淮南王與大王大王又長賢聖仁孝聞於天下故大臣因天下之心而欲迎立大王大王勿疑也廼命宋昌參乘張武等六人乘傳詣長安馳入代邸代王西鄉讓者再遂即天子位又曰孝文帝即位二十三年宮室苑囿狗馬服御無所增益有不便輒弛以利民

常欲作露臺召匠計之直百金帝曰百金中民十家之產吾奉先帝宮室常恐羞之何以臺爲所幸慎夫人衣不曳地幃帳不得文繡以示敦朴先與匈奴和親匈奴背約入盜然令邊備守不得發兵深入惡煩苦百姓羣臣如袁盎等稱說雖切常假借用之羣臣如張武受賂遺金錢覺上常發御府金錢賜之以愧其心專務以德化民是以海內殷富興於禮義又曰孔子言必世而後仁善人爲邦百年亦可以勝殘去殺矣誠哉是言漢興至孝文四十有餘載德至盛也漢書曰孝文皇帝諱恒高帝中子也母曰薄太后又

曰文帝斷獄四百幾致刑措又曰武帝問東方朔曰  
吾欲化民豈有道乎朔對曰願近述孝文皇帝之時  
當世耆老皆聞見之貴爲天子富有四海身衣弋綈  
足履革舄以韋帶劔莞蒲爲席集上書囊爲殿帷  
述後漢班固文帝述曰太宗穆穆允恭玄默化民以  
躬率下以德農不供貢罪不收帑宮不新館陵不崇  
墓我德如風民應如草國富刑清登我漢道  
贊魏陳王曹植漢文帝贊曰孝文即位愛物檢身驕  
吳撫越匈奴和親納諫赦罪以德讓民殆至刑錯萬  
國化淳

### 漢景帝

史記曰漢興孝文施德天下懷安至孝景不復憂異  
姓而晁錯刻削諸侯遂使七國俱起合從而西鄉以  
諸侯大盛而錯爲之不以漸也及主父偃言之而諸  
侯以弱卒以安漢安危之機豈不以謀哉

漢書曰孝景帝諱啓文帝太子也母曰竇皇后又曰  
孔子稱斯民三代之所以直道而行也信哉周秦之  
弊網密文峻而姦宄不勝漢興掃除煩苛與民休息  
至孝文加之以恭儉孝景遵業五六十載之間至於  
移風易俗黎民醇厚周云成康漢言文景美矣

述後漢班固景帝述曰孝景莅政諸侯方命剋伐七國王室以定非怠非荒務在農桑著于甲令民用寧康

贊魏陳王曹植漢景帝贊曰景帝明德繼文之則肅清王室克滅七國省役薄賦百姓殷昌風移俗易齊美成康

漢武帝

漢書曰孝武皇帝諱徹景帝中子也元封元年行自雲陽北歷上郡西河五原出長城登單于臺臨北河勒兵十八萬騎旌旗十餘里威震匈奴還登封泰山

又自潯陽浮江親射蛟江中獲之舳艫千里又登之

學

東來有之  
學山祠

浮大海山稱萬歲又曰漢承百王之弊

高祖撥亂反正文景務在養民至于稽古禮文之事猶多闕焉孝武初立卓然罷黜百家表章六經遂疇咨海內舉其俊民與之立功興大學修郊祀改正朔定曆數協音律作詩樂建封禪祀百神號令文章煥焉可述後嗣得遵洪業而有三代之風如武帝之雄材大略不改文景之恭儉以濟斯民雖詩書所稱何有加焉

荀悅漢紀曰武皇帝恢萬世業內修文學外耀武威

延天下之士濟濟盈朝興事創制無所不施先王之風粲然存矣然猶好其文未盡其實發其始不克其終奢侈無限窮兵極武百姓空竭萬民罷弊當此之時天下騷然海內無聊而孝文之業衰矣

劉歆七略曰孝武皇帝勅丞相公孫弘廣開獻書之路百年之間書積如丘山故外則有太常太史博士之藏內則有延閣廣內秘室之府

栢子新論曰漢武帝材質高妙有崇先廣統之規故即位而開發大志考合古今模範前聖故事建正朔定制度招選俊傑奮揚威怒武義四加所征者服興

起六藝廣進儒術自開闢以來唯漢家最爲盛焉故顯爲世宗可謂卓爾絕世之主矣然上多過差旣欲斥境廣土又乃貪利爭物之無益者聞西夷大宛國有名馬即大發軍兵攻取歷年士衆多死但得數十疋耳又歌兒衛子夫因幸愛重乃陰求陳皇后過惡而廢退之即立子夫更其男爲太子後聽邪臣之譖衛后以憂死太子出走滅亡不知其處信其巫蠱多徵會邪僻求不急之方大起宮室內竭府庫外罷天下百姓之死亡不可勝數此可謂通而蔽者也

典論曰孝武承四世之遺業遇中國之殷阜府庫餘



金錢倉廩畜腐粟因此有意乎滅匈奴而得清邊境矣故即位之初從王恢之畫設馬邑之謀自元光以迄征和四五十載之間征匈奴四十餘舉盛餘踰廣漢絕梓嶺封狼居禪姑幕梁北河觀兵瀚海刈單于之旗剿闕氏之首探符離之窟掃五王之庭納休屠昆耶之附獲祭天金人之寶斬名王以千數馘首虜以萬計既窮追其散亡又摧破其積聚虜不暇於救死扶傷疲困於孕重墮殞元封初躬執武節告以天子自將懼以兩越之誅彼時號爲威震匈奴矣

**述**後漢班固武帝述曰世宗曄曄思弘祖業疇咨熙

載髦俊並作厥作伊何百蠻是攘恢我疆宇外博四荒武功既抗亦迪斯文憲章六學統一聖真封禪郊祀登秩百神協律改正饗茲永年

**贊**魏陳王曹植漢武帝贊曰世宗光光文武是攘威震百蠻恢拓土疆簡定律曆辨修舊章封天禪土功越百王

周庾信漢武帝聚書贊曰獻書路廣藏書府開秦出儒谷漢簡吹灰芝泥印上玉匣封來坐觀風俗不出蘭臺

### 漢昭帝

漢書曰昭皇帝諱弗武帝子也母曰趙婕妤本以有  
奇異得幸及生帝亦奇異又曰昔周成以孺子繼統  
而有管蔡四國流言之變孝昭幼年即位亦有燕蓋  
上官逆謀之亂成王不疑周公孝昭委任霍光各因  
其時以成名大矣哉承孝武奢侈餘弊師旅之後海  
內虛耗戶口減半知時務之要輕徭薄賦與民休息  
至始元元鳳之間匈奴和親百姓充實舉賢良文學  
問民所疾苦議鹽鐵而罷權酤尊號曰昭不亦宜乎  
**述**後漢班固昭帝述曰孝昭幼冲冢宰推忠燕蓋壽  
張實獻實聰罪人斯得邦家和同

**論**魏文帝周成漢昭論曰或方周成王於漢昭帝僉  
高成而下昭余以爲周成王體上聖之休氣稟賢妣  
之貽誨周召爲保傅呂尚爲太師口能言則行人稱  
辭足能履則相者導儀目厭威容之美耳飽仁義之  
聲所謂沉漬玄流而沐浴清風者矣猶有咎悔聆二  
叔之誨使周公東遷皇天赫怒顯明厥咎猶啓諸金  
滕稽諸國史然後乃悟不亮周公之聖德而信金滕  
之教言豈不暗哉夫孝昭父非武王母非邑姜養惟  
蓋主相則桀光體不承聖化不胎育保無仁孝之質  
佐無隆平之治所謂生於深宮之中長於婦人之手

然而德與性成行與體并年在二七早智夙達發燕  
書之詐亮霍光之誠豈將有啓金滕信國史而後乃  
悟哉使夫昭成均年而立易世而化質臣而治換樂  
而歌則漢不獨少周不獨多也

魏丁儀周成漢昭論曰成王昭帝俱以襁褓之幼託  
於冢宰流言讒興此其艱險相似者也夫以發金滕  
然後垂泣與計日力便覺詐書明之遲速既有差矣  
且叔父兄子非相嫌之處異姓君臣非相信之地霍  
光懼人謫而不出周公賴天變而得入推此數者齊  
本而論未計重而况輕漢昭之優周成甚明者也成

王秀而獲實其美在終昭帝苗而未秀其得在始必  
不得已而論二主余與夫始者

### 漢宣帝

漢書曰孝宣皇帝諱詢字次卿武帝曾孫戾太子孫  
也太子納史良娣生皇孫皇孫納王夫人生皇帝號  
曰皇曾孫生數月遭巫蠱事太子良娣皇孫王夫人  
皆遇害曾孫坐繫郡邸獄邴吉爲廷尉監治巫蠱憐  
曾孫之無辜使女徒乳養私給衣食至後望氣者言  
長安獄有天子氣上遣使皆殺之內者令郭穰夜至  
郡邸獄吉拒閉不得入曾孫賴吉得全因遭赦高才

好學然亦喜遊俠鬪雞走馬具知閭里姦邪吏治得失時會朝請舍長安尚冠里身足下有毛卧居數有光耀昭帝崩無嗣霍光徵昌邑王賀賀淫亂廢光奏遣宗正德至尚冠里舍洗沐賜御府太僕以軫轄車奉迎曾孫就齊宗正府封為陽武侯羣臣上璽綬即皇帝位又曰宣帝始立謁見高廟大將軍光參乘上內嚴憚之若芒刺在背後張安世代光參乘天子從容肆意甚安又曰孝宣之治信賞必罰綜覈名實政事文學法理之士咸精其能至于技巧工匠器械自元成間鮮能及之者亦足以知吏稱其職民安其業

也遭值匈奴乖亂推亡固存信威北夷單于慕義稽首稱蕃功光宗祖業垂後嗣可謂中興侔德殷宗周宣矣

荀悅漢紀曰孝宣任法審刑綜覈各實聽斷精明事業修理下無隱情是以功光前世號為中宗然不甚用儒術是以德化不能純備

述後漢班固宣帝述曰中宗明明寅用刑各時舉博納聽斷惟精柔遠能邇輝耀威靈龍荒漠朔莫不來庭丕顯祖烈尚於有成

### 後漢光武帝

東觀漢記曰世祖光武皇帝高祖九世孫出自長沙  
定王定王生舂陵節侯舂陵本在零陵郡節侯孫孝  
侯以土地下溫元帝時求封南陽蔡陽白水鄉因故  
國名曰舂陵上隆準日角大口美鬚眉身長七尺三  
寸仁智明達多權略樂施愛人在家重慎畏事勤於  
稼穡兄伯升好俠笑上事田作比之高祖兄仲上歸  
舊廬望見廬南有火光以爲人持火呼之光遂赫然  
屬天有頃不見上異之初伯升之起也諸家子弟皆  
亡逃自匿曰伯升殺我及聞上至絳衣大冠乃驚以  
爲獨伯升如此謹厚者亦爲之又曰王莽遣大司徒

王尋大司空王邑將兵來征莽欲盛威武王齊則虎  
豹犀象奇偉猛獸以長人巨無霸爲中壘校尉秦漢  
以來師出未嘗有也時漢兵八九千人二公兵以五  
六十萬到遂環昆陽城作營且圍之數百重有流星  
墜尋營營中正晝有雲氣如壞山直下營而不及地  
尺而散吏士皆厭伏上選精兵三千人與戰大破之  
殺司徒王尋赴水溺死者以萬數澠水爲之不流更  
始以上爲大司馬遣之河北安集百姓破邯鄲誅王  
郎入官收文書尋得吏民謫毀上言可擊者數千章  
上會諸將燒之曰令反側子自安也更始遣使者立

上爲蕭王又擊破銅馬受降適畢賊亦兩心上勅降賊各歸勒兵待上輕騎入按行賊營賊曰蕭王推赤心置人腹中安得不投死由是皆自安又曰諸將請上尊號初王莽時上與伯叔及姊聳鄧晨攘人蔡少公坐語少公道識言劉秀當爲天子或曰是國師劉子駿也上戲曰何由知非僕也坐者皆大笑時傳聞赤伏符不見文章軍中所上未信到鄴上所與長安同舍諸生強華自長安奉赤符詣鄴與上會羣臣復伏固乃命有司設壇鄴之千秋亭六月卽皇帝位表宏漢紀曰南頓令欽生光武皇帝諱秀字文叔

帝王世紀曰春秋興夏少康之起有田一成有衆一旅若漢之策命世祖不階成旅之資平暴反正遂建中興夏少康同美矣

續漢書曰昔羿寒浞篡夏數十年少康生爲牧人能修德復夏厥勲大矣然尚有虞思及靡有鬲内外之助至於光武承王莽之篡起自疋庶一民尺土靡有憑焉發迹於昆陽以數千屠百萬非膽智之至孰能堪之討賊平亂克復漢業號稱中興雖初興者無以加之矣中國既定柔遠以德愛慎人命下及至賤武功旣抗文德聿修勲績弘矣

薛瑩漢紀曰王莽之際天下雲亂英雄並發其跨州  
據郡僭制者多矣人皆有異於非望然考其聰明仁  
勇自無光武儔也加以寬博容納計慮如神是以任  
光竇融望風景附馬援一見覩顏識竒故能以十數  
年間掃除羣凶清復海內豈非天人之所輔贊哉古  
者師不內御而光武命將皆授以方略使奉圖而進  
其有違失無不折傷意豈文史之過乎不然雖聖人  
其猶病諸

袁山松後漢書前漢自成哀已下天地縱橫巨猾竊  
命劉氏舊澤猶存而瞻烏之望殆絕世祖以眇眇之

胤起白水之濱身屈無妄之力位舉羣賢並列于時  
懷璽者十餘建旗者數百高才者居南面疾足者爲  
王公茫茫九州瓜分齟切潛潛蒼生塵消鼎沸我扇  
之以仁風驅之以大威雪霜被而茨棘枯橫網振而  
逆鱗掃羣材畢湊人鬼與能數年之間廓清四海雖  
曰中興與夫始創業者庸有異乎誠哉馬生之言固  
已寥廓大度同符高祖又等太宗之仁兼孝宣之明  
一人之體其始于周故能享有神器據乎萬乘之上  
矣

碑後漢蔡邕光武濟陽宮碑曰王室中微哀平短祚

姦臣王莽偷有神器十有八年罪盈惡熟天人致誅  
帝乃龍見白水淵躍昆泚破前隊之衆殄二公之師  
收兵略地經營河朔於是羣公諸將據河洛之文協  
符瑞之徵僉曰歷數在帝踐祚允宜乃以建武元年  
六月即位于鄗縣之陽五成之陌祀漢配天罔失舊  
物享國三十有三年方內乂安蠻夷率服巡狩太山  
禪梁父皇代之遐迹帝者之上儀罔不畢舉道德餘  
慶延于無窮先民有言曰樂樂其所自生而禮不忘  
其本是以虞稱媯汭姬美周原皇天乃眷神宮實始  
于此厥路藐哉所謂神麗顯融越不可尚小臣河尹

瑋來在濟陽願見神宮追惟桑梓裒述之義用敢作  
頌其辭曰赫赫炎天爰曜其暉篤生聖皇貳漢之微  
稽度虔則誕育靈姿黃孽作慝篡握天機帝赫斯怒  
爰整其師應期潛見扶陽而飛禍亂克定羣凶殄夷  
匡復帝載萬國以綏巡于四岳展義省方登封降禪  
升于中皇爰茲初基天命孔彰子子孫孫保之無疆  
**論**魏陳王曹植漢二祖優劣論曰客有問余曰夫漢  
二帝高祖光武俱爲受命撥亂之君此時事之難易  
論其人之優劣孰者爲先余應之曰昔漢之初興高  
祖因暴秦而起遂誅強楚先有天下功齊湯武業流



後嗣誠帝王之元勳人君之盛事也然而名不繼德  
行不純道身沒之後崩亡之際果令凶婦肆醜酷之  
心嬖妾被人豕之刑亡趙幽囚禍殃骨肉諸呂專權  
社稷幾移凡此諸事豈非高祖寡計淺慮以致然彼  
之雄才大略倣儻之節信當世至豪健壯傑士也又  
其梟將畫臣皆古今之鮮有歷世之希覩彼能任其  
才而用之聽其言而察之故兼天下有帝位流巨勳  
而遺元功也世祖體乾靈之休德稟貞和之純精通  
黃中之妙理韜亞聖之懿才其爲德也聰達而多識  
仁智而明恕重慎而周密樂施而愛人值陽九無妄

之世遭炎光厄會之運殷爾雷發赫然神舉用武略  
以攘暴興義兵以掃殘神光前驅威風先逝軍未出  
於南京莽已斃於西都夫其盪滌凶穢勦除醜類若  
順迅風而縱烈火曬白日而掃朝雲也爾乃廟勝而  
後動衆計定而後行師故攻無不陷之壘戰無奔北  
之卒是以羣下欣欣歸心聖德宣仁以和衆邁德以  
來遠故竇融聞聲而影附馬援一見而歎息股肱有  
濟濟之美元首有穆穆之容敦睦九族有唐虞之稱  
高尚純朴有羲皇之素謙虛納下有吐握之勞留心  
庶事有日昃之勤乃規弘迹而造皇極創帝道而立

德基是以計功而業殊比隆則事異旌德則靡愆言  
行則無穢量力則勢微論輔則力劣卒能握乾圖之  
休徵應五百之顯期立不刊之遐迹建不朽之元功  
金石播其休烈詩書載其勳懿故曰光武其優也

### 漢明帝

東觀漢記曰孝明皇帝世祖中子也母光烈皇后初  
讓尊位爲貴人故帝年十二以皇子立爲東海公三  
歲進爵爲王幼而聰明叡智容貌壯麗世祖異焉數  
問以政議應對敏達謨慮甚深溫恭好學敬愛師傅  
所以承事兄弟親密九族內外周洽世祖愈珍上德

以爲宜承先序詔廢郭皇后立陰貴人以爲皇后上  
以東海王立爲皇太子治尚書備師法兼通四經略  
舉大義博觀羣書以助術學又曰建武四年皇子陽  
生豐下銳上顏赤色有似堯上以赤色名之曰陽年  
十三通春秋上循其頸曰吳季子

袁山松後漢書曰皇帝諱陽一名莊字子麗

華嶠後漢書曰世祖旣以吏事自嬰明帝九任文法  
總攬威柄權不借下值天下初定四民樂業戶口滋  
殖中興以來追蹤宣帝以鍾離意之廉淳諫爭懇懇  
常以寬和爲首以此推之難得而言也

薛瑩漢紀曰明帝自在儲宮而聰允之德著矣及臨  
萬機以身率禮恭奉遺業一以貫之雖夏啓周成繼  
體持統無以加焉是以海內乂安四夷賓服斷獄希  
少有治平之風號曰顯宗不亦宜乎

范曄後漢書曰帝善刑理法令分明日晏坐朝幽枉  
必達外內無倖曲之私在上無矜大之色斷獄得情  
號居前世十二故後之言事者莫不先建武永平之  
政然而鍾離意宋均之徒常以察惠爲言夫豈弘仁  
之度未優乎

**贊**晉傅玄漢明帝贊曰肅矣孝明仗法任刑勤綜萬

機察下以情未弘道治用致太平專信俗儒非禮之  
經

**誄**漢傅毅明帝誄曰惟此永平其德不回恢廓鴻績  
遐方是懷明明肅肅四國順威赫赫盛漢功德巍巍  
躬履聖德以臨萬國仁風弘惠雲布雨集武伏蚩尤  
文騰孔墨下制九州上係皇極豐美中世垂華億載  
冠堯佩舜踐履五代三雍旣洽帝道繼備七經宣暢  
孔業淑著明德慎罰尊上師傅薄刑厚賞惠慈仁恕  
明並日月無有偏照譬如北辰與天同曜發號施令  
萬國震懼庠序設陳禮樂宣布璇璣所建靡不奄有

貢篚納賦如歸父母正朔永昌冠帶僭耳四方共貫  
八極同軌

### 漢和帝

東觀漢記曰孝和皇帝章帝中子也上自岐嶷至於  
總角孝順聰明寬和仁孝帝由是深珍之以爲宜承  
天位年四歲立爲太子初治尚書遂兼覽書傳好古  
樂道無所不照上以五經義異書傳意殊親幸東觀  
覽書林閱篇籍朝無寵族惠澤沾濡外憂庶績內勤  
經藝自左右近臣皆誦詩書德教在寬仁恕並洽是  
以黎元寧康萬國協和符瑞八十餘品帝讓而不宣

### 故靡得而紀

帝王世紀曰孝和之嗣世正身履道以奉大業賓禮  
耆艾動式舊典宮無嬪嬙鄭衛之燕囿無般樂遊畋  
之豫躬履至德虛靜自損是以屢獲豐年遠近承  
范曄後漢書曰自中興以後逮于永元雖頗有施張  
而俱存不擾是以齊民歲增闢土世廣偏師出塞則  
漢北地空都護西指則通驛四萬豈其道遠三代術  
長前世將服叛懷來自有數也

後漢蘇順和帝誄曰天王祖登率土奄傷如何昊  
穹奪我聖皇恩德累代乃作銘章其辭曰恭惟大行

配天建德陶元二化風流萬國立我蒸民宜此儀則  
厥初生民三五作剛載籍之盛著於虞唐恭惟大行  
爰同其光自昔何爲欽明允塞恭惟大行天覆地載  
無爲而治冠斯往代往代崎嶇諸夏擅命爰茲發號  
民樂其政奄有萬國民臣咸秩大孝備矣闕宮有恤  
由昔姜嫄祖妣之室本枝百世神契惟一彌留不豫  
道揚末命勞謙有終實惟其性衣不制新犀玉遠屏  
履和而行威稜上古洪澤湧流茂化沾溥不憇少留  
民斯何怙歔歔成雲泣涕成雨昊天不弔喪我慈  
後漢崔瑗和帝誄曰玄景寢曜雲物見徵馮相考妖

遂當帝躬三載四海遏密八音如喪考妣擗踊號吟  
大隧旣啓乃徂玄宮永背神器升遐皇穹長夜冥冥  
曷云其窮

藝文類聚

卷第十二

藝文類聚卷第十二



國家圖書館, NATIONAL CENTRAL LIBRARY, TAIWAN, R.O.C.

藝文類聚卷第十三

唐太子率更令弘文館學士歐陽詢撰

明

秣

陵

王元貞校

帝王部三

魏武帝

晉元帝

魏文帝

吳大帝

晉簡文帝

晉孝武帝

宋孝武帝

晉穆帝

魏武帝

魏志曰太祖武皇帝沛國譙人諱操字孟德漢相曹叅之後也時曹騰為中常侍大長秋養子嵩嗣父嵩官至太尉太祖少機警有權數而任俠放蕩不治行業故世人未之奇也唯梁國喬玄南陽何顥謂太祖

日天下將亂非命世之才不能濟也能安之者其在  
君乎初桓帝時有黃星見於楚宋之分遼東殷植善  
天文言後五十歲當有真人起於梁沛之間其鋒不  
可當也至是凡五十年而公破袁紹天下莫敵矣  
詠魏陳王曹植武帝詠曰於惟我王承運之衰神武  
震發羣雄殄夷拯民于下登帝太微德美且與功越  
彭韋九德光備萬國作師寢疾不興聖體長歸華夏  
飲淚黎庶含悲神翳功顯身沉名飛敢揚聖德表之  
素旗乃作詠曰於穆我王胄稷胤周賢聖是紹元懿  
允休先矣佐漢實惟平陽功成績著德昭二皇民以

寧一興詠有章我王承統天姿時生年在志學謀過  
老成奮臂舊邦讎身上京表與我王兵交若神張陳  
背誓傲帝虐民擁徒百萬虎視朔濱我王赫怒戎車  
列陳武卒虓闕如雷如震攙捨北掃舉不浹辰紹遂  
奔北河朔是賓振旅京室帝嘉厥庸乃位承相總攝  
三公光受上爵臨君魏邦九錫昭備大路火龍玄監  
靈蔡探幽洞微下無僞情姦不容非敦儉尚古不玩  
珠玉以身先下民以純樸聖性嚴毅平修清一唯善  
是嘉靡䟽靡昵怒過雷霆喜踰春日萬國肅虔望風  
震慄既總庶政兼覽儒林躬著雅頌被之瑟瑟茫茫



四海我王康之微微漢嗣我王匡之羣桀扇動我王  
服之喁喁黎庶我王育之光有天下萬國作君虔奉  
本朝德美周文以寬克衆每征必舉四夷賓服功踰  
聖武翼帝王世神武鷹揚左鉞右旄威凌伊呂年踰  
耳順體愉忠肅乾乾庶事氣過方叔宜並南嶽君國  
無窮如何不弔禍鍾聖躬棄離臣子背世長終兆民  
號咷仰愬上穹旣以約終令節不衰旣卽梓官躬御  
西陵幽閨啓路羣臣奉迎我王安厝窈窕玄宇三光  
不入潛闈一肩尊靈永蟄聖上臨穴哀號靡及羣臣

陪臨佇立以泣去此昭昭於彼冥冥永棄兆民下君  
百靈千代萬乘曷時復形

**策文**魏文帝爲武帝策文曰痛神曜之幽潛哀鼎俎  
之虛置舒皇德而詠思遂膈臆以莅事矧乃小子夙  
遭不造煢煢在疚嗚呼皇考產我曷晚棄我曷早羣  
臣子輔奪我哀願猥抑奔墓俯就權變卜葬旣從大  
隧旣通漫漫長夜窈窕玄宮有晦無明曷有所窮鹵  
簿旣整三官駢羅前驅建旗方相執戈棄此宮庭陟  
彼山阿

魏文帝

魏志曰文皇帝諱丕字子桓武帝太子也爲五官中郎將嗣丞相爲魏太子太祖崩繼位爲丞相魏王延康元年受禪于漢爲帝初帝自許昌南征諸軍兵並進孫權臨江拒守帝幸廣陵收城臨江觀兵戎卒十餘萬旌旗數百里

江表傳曰魏文帝出廣陵欲伐吳臨大江歎曰吳據洪流且多糧穀魏雖武騎千隊無所用之乃還

吳錄曰魏文帝至廣陵臨江觀兵見波濤洶湧歎曰此固天之所以隔南北也遂歸

**詠**魏陳王曹植文帝誄曰天震地駭崩山隕霜陽精

薄景五緯錯行哀殊喪考思慕過唐擗躄郊野仰愬穹蒼考諸先紀尋之哲言生若浮寄德貴長傳朝聞夕逝死志所存皇雖殪没天祿永延何以述德表之素旃何以詠功宣之管絃乃作誄曰元光幽昧道究運遷乾迴曆數簡聖授賢乃眷大行屬以黎元龍飛踐祚含契上玄五行定紀改號革年明明赫赫授命自天風偃物化德以禮宣詳惟聖質岐嶷幼齡研幾六典學不過庭潛心無內抗志高明才秀藻朗如玉如瑩聽察無響視覩未形其剛如金其勁如瓊如水之潔如砥之平爵功無重戮違無輕心鏡萬機鑒照

下情宅土之中率民以漸道義是圖弗營厥險六合  
通同齊契共檢導下以純民由樸儉緇冕崇麗衡統  
惟新尊肅禮容瞻之若神方牧妙舉欽於恤民虎將  
荷節鎮彼四隣朱旗所勦九壤披震疇克不若孰敢  
不臣懸旌海表萬里無塵回回凱風祁祁甘雨稼惟  
歲豐登我稷黍家佩惠尹戶蒙慈父在位七載九功  
仍舉將承太和絕跡三五宜作物師長爲神王壽終  
金石等筭東父如何奄忽摧身后土俾我煢煢靡瞻  
靡顧嗟嗟皇穹胡寧忍予明鑒吉凶體達存亡深垂  
典制申之嗣皇聖上虔奉是順是將乃啓玄宇基于

首陽擬跡穀林追堯纂唐合山同阪不樹不疆塗車  
蒞靈珠玉靡藏百神警侍賓于幽堂於是侯大隊之  
致功陳元辰之淑禎潛華體於梓宮憑正殿於居靈  
悼晏駕之旣俟感容車之速征浮飛翬於輕霄就黃  
墟以藏形背三光之昭晰歸窀穸之冥冥嗟一往之  
不返痛闕闕之長局

**章**魏陳王曹植慶文帝受禪章曰陛下以聖德龍飛  
順天革命允荅神符誕作民主乃祖先后積德累仁  
世濟其美以暨于先王王勤恤民隱劬勞戮力以除  
其害經營四方不遑啓處是用隆茲福慶光啓于魏

陛下承統纘戎前緒克廣德音綏靜內外紹先周之舊跡襲文武之懿德保大定功海內爲一豈不休哉又慶文帝受禪上禮章曰陛下以明聖之德受天顯命良辰即祚以臨天下洪化宣流洋溢宇內是以溥天率土莫不承風欣慶執贄奔走奉賀闕下况臣親體至戚懷歡踴躍

表魏文帝讓授禪表曰臣聞堯禪重華舉其克諧之德舜受文命采其齊聖之美猶下咨四岳上觀璇璣今臣德非虞夏行非二后而承曆數之詔應選授之命內自揆撫無德以稱且許由疋夫猶拒帝位善卷

布衣而逆虞詔臣雖鄙蔽敢忘守節

魏辛毗等勸進表曰古先聖王所以授天命而不辭者誠急於答皇天之意副四海之望不得已也

魏桓階等勸進表曰臣等以爲天命不可稽神器不可贖昔周武中流有白魚之應不待濟而大號以建舜受禪大麓桑陰未移而已陟帝位所以祗承天命者若此之速也故無固讓之義不以守節爲貴必信於神靈而符合於天地也

吳大帝

吳志曰孫權字仲謀漢以孫策遠修貢職遣使者劉

琬加錫命琬語人曰吾觀孫氏兄弟雖各才秀明達然皆祿祚不終唯中弟孝廉形貌竒偉骨體不恆有大貴之表又最壽策薨以事授權

江表傳曰堅爲下邳丞時權生方頤大口目有精光堅異之以爲貴象及堅亡策起事江東權常隨從性度弘朗仁而多斷好俠養士

吳曆曰曹公出濡須權數挑戰乃自乘船從濡口而入公見舟船器仗徒伍整肅喟然歎曰生子當如孫權爲劉景升子若狔犬耳

吳志曰孫權屈身忍辱任才尚計有勾踐之英竒人

之傑矣故能自擅江表鼎峙之業性嫌忌果於殺戮既於末年彌以滋甚至於讒說殄行胤嗣廢斃豈所以貽厥孫謀以燕翼子者哉其後葉陵遲遂致覆國未必不由此也

誄晉陸機吳大帝誄曰我皇明明固天寔生體和二合以察三精濯暉育慶懷詳載榮率性而和因心則靈厥靈伊何克聖克仁茂對四象克配乾坤齊明日月考祥鬼神誕自幼冲獻哲宿照甄化無形探景絕曜巍巍聖姿文武既俊有覺德徽兆民欣順將熙景命經營九圍登跡岱宗班瑞舊圻上玄匪惠早零聖

暉神廬既考史臣獻貞龍輶啓殯霄載紫庭辰旒飛  
藻凶旗舉銘崇華熠爍翠蓋繁纓千乘結駟萬騎重  
營簫鼓振響和鑿流聲動軫聞闔永背承明顯步萬  
官幽驅百靈隨化太素即官杳冥億兆同慕泣血如  
零

### 晉武帝

王隱晉書曰世祖武皇帝文帝太子也文帝初開晉  
國立爲世子拜撫軍大將軍嗣相國文帝崩魏帝命  
上爲相國晉王十一月受禪於魏有獻雉頭裘者上  
曰異服竒伎典制所禁也宜於殿前燒裘上與羊祜

張華謀伐吳朝士莫知也潜乃籌量虛實爲戰備孫  
皓面縛輿襯降有司奏晉德隆茂光被四表吳會旣  
平六合爲一宜勒封岳以彰聖德詔曰此盛德之事  
所宜未議

帝譜曰世祖武皇帝諱炎字安世

誅晉潘岳世祖武皇帝誅曰粵若稽古帝皇誕受休  
命作我晉室赫赫文皇配天並日大行龍飛創制改  
物沉恩汪濊流澤洋溢上齊七政下綏萬邦四門穆  
穆五典克從惟清緝熙於變時雍愛盡事親教加百  
姓于喪過哀在祭餘敬后蠶冕服躬籍粢盛六伐畢

奏九功咸詠行敦醇樸思貫玄妙莅政端位臨朝光  
曜胄子入學辟雍宗禮國老恂恂貴遊濟濟莫孝匪  
子莫悌匪弟化自外明訓法以禮獷彼吳楚稱亂三  
代世歷五僞年幾百載邊垂虔劉王化阻闕羽檄星  
馳鉦鼓曰戒帝御羣師奉辭奪旅腹心庭爭爪牙疑  
沮天監獨照聖策乃舉朝服濟江止戈曜武野無交  
兵役不淹月僭號歸命稽顙晉闕邪界蠻流傍納百  
越表閭旌善德音爰發虞人獻箴周書垂誥酒懼其  
彝獸戒其冒于我大行縱心所好動不踰矩性與道  
與厭厭酣飲樂不辨顏桓桓振旅田無遊盤我德如

風民應如蘭靡不夙夜無敢宴安務農望歲時或不  
稔小心翼翼恤民以甚御坐不怡撤膳賑廩西流垂  
精南金抑拖永言孝思天經地義問誰贊事英彥髦  
士問誰翼侍博物君子潛明神鑒從衆屈已道濟羣  
生爲而不恃先天弗違後天降時萬物熙熙懷而慕  
思顛顛縉紳不謀同辭巖巖岱宗想望翠旗恭惟大  
行功成不居議寢封禪心栖冲虛策告不足太平有  
餘七十二君方之蔑如思樂天德等壽嵩華如何寢  
疾背世登遐遷幸梓宮孤我邦家龜筮旣襲吉日惟  
良永指太極寧神峻陽羣后擗踴長訣輶輦聖靈斯

顧豈伊不傷家無遠邇邦靡小大四海供職同軌畢  
會茫茫原野亭亭素蓋縞輅解駕白虎弭旆龍輅即  
定玄闕載局如天斯崩如地斯傾哀哀庶寮烝烝自  
愍彼蒼者天胡寧斯忍聖君不返我獨旋軫

哀策文晉張華武帝哀策文曰感大饗之無虧哀罇  
俎之虛設叩龍輅以長叫痛靈暉之潛逝其辭曰欽  
惟皇考體道之真德侔乾坤齊曜三辰應期登禪協  
于天人上虔郊祀下惠兆民憲章唐虞允得其津搜  
揚仄陋故老是賓百揆時序盛業日新恩從雲翔威  
猶霆震江海靜波岷岳無塵四夷率服莫不來臣肅

慎奉貢越裳効珍化此弊俗歸之至淳皆在上聖咸  
享百年哀哀皇考用不是臻遘厲彌侵景命殞顛舍  
此昭晰即彼幽玄仰瞻靡怙廓若無天終制尚儉率  
由典度華幕弗陳噐必陶素不封不樹所在惟固貽  
法來世是則是慕大隧既啓吉日將征鍾鼓雷震白  
虎抗旌龍螭驤首良駟悲鳴倡者振鐸挽夫齊聲背  
此崇殿將適下庭玄宮窈窕脩夜冥冥光燈永戢幽  
闕長扃仰訴皇穹零淚屏營云誰能忍寄之我情結  
心墳隴永憑聖靈

論晉于寶晉武革命論曰帝王之興必俟天命苟或



代謝非人事也支質異時興建不同故古之有天下者栢皇栗陸以前爲而不有應而不求執大象也義黃世及以一民也堯舜內禪體文德也漢魏外禪順大名也湯武革命應天人也高光爭伐定功業也各因其運而天下隨時隨時之義大矣哉古者敬其事則命以始今帝王受命而用其終豈人事乎其天意乎

晉元帝

晉中興書曰中宗元皇帝諱睿字景文世祖咸寧二年生于洛陽初誕有神光之異一室盡明所籍藁如

始刈及長白毫生日角之左眼有精曜惟侍中譙國嵇紹少而異之謂其友曰琅琊王毛骨非常殆非人臣之相惠帝幸臨漳中宗從駕是時中宗叔父東安王繇爲成都王穎所害懼禍及謀出奔其夜月明禁衛甚嚴不能得去有頃天暴風雨晦暝徼者四散中宗因得脫及遷鎮建業以顧榮爲軍司馬禮接名豪設官分職隱恤士庶百姓歸心焉初性好酒王導深以爲誡乃命左右進觴躬引覆之自是不復飲也愍帝爲胡賊劉粲所没中宗素服出次舉哀三日於是百僚稱上尊號帝固讓百僚又固請中宗慨然流涕

曰吾本琅琊王諸賢見逼不已乃呼私奴命駕將反  
國羣臣不敢復逼乃求依魏晉故事爲晉王許之愍  
帝崩于平陽百僚更上尊號是日即皇帝位  
晉陽秋曰太安中童謠曰五馬浮渡江一馬化爲龍  
永嘉大亂王室淪覆唯琅琊西陽汝南南頓彭城五  
王獲濟至是中宗登祚先是五鐸見于晉陵靈數玄  
感若合符契

策文晉郭璞元皇帝哀策文曰永惟殿宇之廓寂悲  
尋莫之莫歆感鸞輅之晏駕哀袞袞之委衿痛聖躬  
之遐往長淪景於太陰乃作策曰王之不極百六作

艱鴉集瓊林鯨躍神淵懷愍失據海覆岳巔蠢蠢六  
合罔不倒懸靈慶有底見龍在田誰其極哉我后先  
天大人承運重明繼作撫征淮海駿命再廓仁風宥  
靡神化潛鑠處冲思挹居簡行約聖敬日邁玄心逾  
漠用物與能總攬羣略林無滯才山無遺錯恩靡不  
懷化靡不被茫茫海域欵塞慕義萬里同塵罔匪王  
隸熙熙遺黎莫知其寄括終宇宙混同天地曰功永  
年曰德慶隆柰何氛厲奄集聖躬大業未恢皇齡未  
中天惜其景崑顏其崇煢煢小子藐藐孤冲靡天何  
戴靡地何憑恍惚極慕若存若終蔑焉無聞廓焉長

寂聆音靡晞瞻顏失覲窮號曷訴叩心誰告何悲之  
哀何痛之酷嗚呼我皇逢天之戚嗚呼哀哉眇然升  
遐即安玄室煌煌火龍赫赫朱鞞終焉永潛曷其有  
出明訓長絕小子何述望阜增欷臨崩慟慄哀兼陟  
方痛過遏密靈爽安之反真復質永合元漠終始得  
一

令晉元帝荅劉琨等令曰今方岳牧伯之任股肱腹  
心之臣萬邦之內九服之外咸見翼戴以隆天威是  
用辭不獲已而居王位尋覽所陳弘旨優遠孤方當  
匡復帝祚豈可猥居極位昔有夏克復賴靡艾之勲  
周宣中興由申邵之佐二公鎮御幽朔忠以衛上建  
功極難實憑遠略夷難雪耻於是乎在

表晉劉琨勸進元帝表曰否泰之運古今迭有宗子  
有明德曷常不由多難以隆中興故獫狁殘周以啓  
宣王巨猾竊漢乃發光武陛下天授至德聰明神武  
勞謙恭已早以自牧體伯禽經營之誠行公旦吐握  
之事上崇勤王之義下垂庇民之量收羅俊乂任賢  
以能綏爰陝東化流無外戎狄荒服請事率職重譯  
納貢不遠萬里功高德邵遐邇歸心况陛下道邁大  
宗勲莫與二且以親以賢義實兼之是以琨敢緣天

文人事徵祥之應昧死上事以奉尊號願陛下無常  
心以羣心爲心忘其身以萬物爲公則宗廟蒸嘗不  
替於今逆虜逋寇一討而滅無負於天下無愧於七  
后矣又表曰臣聞台宿在天實承辰極股肱雖卑同  
體元首臣負乘前朝過充三吏國之崇替有與憂喜  
臣聞德合兩儀者固以四海爲公智周萬物者不以  
一身爲私舜禹揖讓以陟帝位湯武征伐以濟時難  
彼四王者邁會不同登受有異至夫外已存物憂世  
遺躬其致一也期於愛民治國應變合道以爲天下  
利而已矣况宗廟是陛下之宗廟百姓是大晉之百

姓耶陛下若忽七廟之重拒天人之心絕而不繼困  
而不拯則宗廟不歆其禋祀羣生無所措其手足矣  
况臣班具臣之列荷累世之恩上懷國家之統俯絕  
烏鳥之情者哉昔伍員發怒手撻平王之墓灌夫慷  
慨身搴吳淠之旗皆能宣其臣節攄其私忿戮尸斬  
將存亡罔恨臣誠無若人之才實有此人之憤苟得  
上憑天威展其微効雖墮九泉猶以明白又表曰陛  
下之躬執謙光允恭克讓俛從吏議示總萬機布曠  
蕩之詔開自新之路海隅漸惠朔南暨聲有生之倫  
咸被嘉慶陛下量包宇宙明侔三辰靈祗稽應華戎

同戴加以王室中微邦基將絕遺民元元屬命陛下  
陛下以德則無所與讓言事固所負荷誠宜遺小禮  
存大務援據圖錄居正宸極上副祖宗之心下一兆  
庶之望臣聞必也正名前聖大之春秋傳曰名以出  
信名苟不正則事有不從信苟不立則禮義或愆乃  
載籍之明誠開塞之所由也又表曰臣聞天生蒸民  
樹之以君所以對越天地司牧黎元聖帝明王鑒其  
若此知天地不可以無饗故屈其身以奉之知黎元  
不可以無主故不得已而臨之社稷時難則戚藩定  
其傾郊廟或替則宗哲纂其祀所以弘振遐風式固

萬世自元康已來艱禍繁興永嘉之際氛厲彌昏宸  
極失御登遐醜裔國家之危有若綴旒天不悔禍大  
灾荐臻國未亡難寇害尋興逆胡劉曜縱逸西都王  
上幽劫復沉虜庭神器流離再辱荒逆臣每覽史籍  
觀之前載厄運之極古今未有在食土之毛含氣之  
類莫不叩心絕氣行號巷哭况臣荷寵二世位厠鼎  
司承問震惶精爽飛越臣聞昏明迭用否泰相濟天  
命無改曆數有歸或多難以固邦國或隱憂以啓聖  
明是以齊有無知之禍而小白爲五伯之長晉有驪  
姬之難而重耳以至諸侯陛下玄德通於神明聖姿

合於兩儀應命世之期紹千載之運符瑞之表天人  
有徵中興之肇圖讖垂典自京幾殞喪九服崩離陛  
下撫寧江左奄有舊吳柔服以德伐叛以刑抗明威  
以懾不類杖大順以肅宇內純化旣敷則率土宅心  
義風旣暢則遐方企踵昔少康之隆夏訓以爲美談  
宣王之興周詩以爲休詠况茂勲格于皇天清暉光  
于四海蒼生顛然莫不欣戴聲教所加願爲臣妾者  
哉且宣皇之胤唯有陛下億兆攸歸曾無與二天祚  
大晉必將有主主晉祀者非陛下而誰是以邇無異  
言遠無異望謳歌者無不吟詠徽猷獄訟者無不思

于聖德天地之際旣交華裔之情允洽一角之獸連  
理之木以爲休徵者蓋有百數冠帶之倫要荒之衆  
不謀而同辭者動以萬計是以臣等敢考天地之心  
因函夏之趣味死上尊號願陛下存舜禹至公之情  
狹巢由矯抗之節以社稷爲務不以小行爲先以黔  
首爲憂不以克讓爲事上以慰宗廟乃顧之懷下以  
釋普天傾首之望臣聞尊位不可久虛萬機不可久  
曠虛之一日則尊位以殆曠之浹辰則萬機以亂陛  
下雖欲逡巡其若宗廟何其若百姓何

晉成帝

晉中興書曰顯宗成皇帝諱衍字世根肅祖長子也  
即位後蘇峻及祖約阻兵作逆詔庾亮卞壺距之戰  
于青谿壺等敗績壺死之亮奔江州共陶侃溫嶠率  
衆下討峻臨陣斬之

策文晉成帝哀策文曰宸極寥廓聖靈遐之哀備物  
之虛在痛永往之無期乃命史官述德寄辭其辭曰  
五德代興素靈啓曜離光疊曜三辰重照明我皇  
含貞挺妙玄秀夙達履德罔違鳳棲遐邇神宇凝夷  
文明外潤仁簡內綏舉無遺中鑒無幽微韻隆汾陽  
道作垂拱靜恭清穆冥功日用疊疊神軌固天攸縱

爰在陽九皇綱中替姦豎肆逆牢羅失衛升降艱難  
協應神契靈祚旣保顯揚天命雰雰朝晞兩儀開鏡  
訓諮阿衡虛已納正九功潛流七德將表方振宏羅  
稜威電掃芟蕩神衢一我王道昊天不弔降茲大悔  
天傾其儀地覆其載大業未究神爽遷背哀貫三靈  
痛流萬代爰初不豫大漸在躬啓手歸全神氣夷冲  
凝哉達識體正履終袞龍旣襲玉容斯幽登醪虛設  
觴爵靡酬墳牘莫啓聖跡誰修冥冥我皇神焉何遊  
撫膺遐叫迸涕交流三筮告期將歸陵墟陞殞羽翼  
庭納龍輿玉輪動運錫鸞鳴衢錫旆徘徊六驥踟躕

輕雲蔭軌流風翼車哀哀同軌唯唯輓夫長號永慕  
泣涕漣洳大塊獨運終歸其始我后永往寧神千祀  
悠悠上天烝烝惟已眇然靡憑廓焉無恃目範令儀  
徽音在耳

晉康帝

晉中興書曰康皇帝諱岳字世同成皇帝崩上即位  
憂哀不忍言政一委中書監庾冰

策文晉康帝哀策文曰感廣廈之空寂悲俎奠之虛  
陳痛皇神之邈遠哀靈景之長泯仰瞻宸極俯憑鸞  
軒五情摧裂號慟煩寃遂命國史述德銘勲事以言

顯功以名存其辭曰招拒降靈篤生我皇岐嶷妙哲  
幼有珪璋含貞發曜蘭風載芳厥初肇建宗國是胤  
祇承師友執心淑慎徽猷愷悌金質玉潤固天所啓  
應茲靈運入繼皇祚龍騰鳳迅因假任物惟精委順  
穆穆我皇風流凝廣聰鑒遐照思心內朗應變無方  
從善如響矩儀可慮法物可象覆燾羣生靡物不養  
如何一旦神遊靈爽仰攀擗踴觸物咸想卜吉有期  
將即玄冥太常旣建千乘列庭皓皓輿服翩翩素旌  
笳簫寥唳輓夫齊聲六驥躊躇蕭蕭悲鳴是用增哀  
雨泣霑纓痛貫五內哀切三情道隆名貴德享彌光



灼灼皇猷終焉允臧垂美兆祀芳風休揚

### 晉穆帝

晉中興書曰孝宗穆皇帝諱聃字彭子康帝子也崩時年十九

策文晉穆帝哀策文曰欽明文思允恭克讓忽若布衣忘其矜尚體有示無德克神王冕旒兩楹委政元輔內倚公旦外仗尚父郁哉惟文赫斯惟武西廓岷河北清伊渚園陵聿修舊京式叙方振長慧風掃天宇休牛歸馬卷旗臥鼓俾我蒸民擊壤容與昊天不弔奄背率土哀同遏密痛方割鉅日月不居神道之

幽三辰吉良五謀同休祖載華庭晏駕崇丘俯執饋奠仰攀龍輶岌岌黼翬飄飄素旂感想平昔人懷崩抽號聲如震灑涕成流

### 晉簡文帝

晉中興書曰太宗簡文帝諱昱字道方中宗少

子也

晉陽秋曰桓溫始以雄盛入輔係以廢立帝雖登祚內不自安初熒惑入太微尋廢海西公至是熒惑猶在太微帝惡之謂郗超曰命之脩短大所不計故無復往日事耶超云大司馬溫方內固社稷外布經略非常之事臣以百口保之超假還東帝謂之曰致意

尊公家國之事遂至於此由吾不能以道匡樹思患  
豫防媿歎之深言何能喻又誦庾闡詩云士痛朝危  
臣哀主辱泣下沾衣漣如相續

續晉陽秋曰帝弱而惠異中宗深器焉及長美風姿  
好清言舉心端詳器服簡素與劉惔王蒙等爲布衣  
之遊

策文晉簡文帝哀策文曰同軌畢至內外成列素旗  
宿懸輶輅首轍執祖行於前殿奉靈輿而遷逝悲神  
宇之長違痛聖儀之幽翳攀龍輶以號慕撫素膺以  
泣血爰命史臣叙述聖德揚徽音於飛旌寫哀心于

翰墨乃作策曰淳曜發暉皇曆攸膺聖祖啓運哲王  
遐承蒸哉元后光我中興天基徙構朝陽再升皇矣  
聖考合一履中道心玄玄文明內融湛湛神儀穆穆  
靈風望之凝秀即之深冲爰在初齡至性自然水鏡  
一世堂室重玄悒悒素庭翳若丘園遂阿王室婉跡  
經綸時有汗隆道無屈伸如彼平流泯矣其津大過  
之時皇德不競天人革心謳歌徙詠時惟伊霍輔運  
以政欽若昊天祗此明命龍飛九五饗茲萬國居宗  
舉契允恭玄默綢繆哲輔虛已仗德天明方曜離暉  
翳朗玄化誰陶蒼生曷仰四運忽其遙邁日月飄以

飛沉將寧神於玄宇遷玉輅於中林背華殿之昭晰  
即幽隧之重深奉神襯以永訣邈終而莫尋神恍惚  
其若寄泣橫墜以流襟

### 晉孝武帝

晉中興書曰烈宗孝武皇帝諱昌明中宗第三子也  
策文晉王珣孝武帝哀策曰同軌畢至百司胥亞法  
物夕陳輶輓夙駕親執饋奠長號永夜懼鼓刻之遄  
盡哀良辰之莫借悲宮宇之寥廓痛聖儀之幽化夫  
至德無名固理絕稱謂然視史陳辭亦臣子所貴寄  
窮情於翰墨庶遺塵之髣髴其辭曰惟皇作極五德

迭胤康實復夏武亦隆晉疊疊太宗希夷其韻鏡之  
者玄撫之者順於穆皇考嗣徽絕軌前聖後哲契合  
一揆心去其伐行遺其美廢華任誠捨筌存旨惟深  
通志羣方咸秩惟幾成務能事斯畢未若我皇至則  
不疾恢恢天網䟽而莫失居有以虛宰多以少簡則  
可從易則不擾信及豚魚澤被億兆湛然司契坐一  
八表園陵既衛威靈赫赫子來既構寢廟奕奕武曰  
止戈戎不極役文教聿脩有耻且格跡有遠邇感無  
高深道之所被改色革音皓獸馴苑素羽棲林殊柯  
通理異蒂同根方融玄液陶鑄斯民雲韶候奏比屋

善之類聚 帝王音卷之十三  
思淳積祐莫應天罰奄臻太山顏構洪瀆竭津何殃  
之甚何酷之殷自罹旻凶二氣代變霜繁廣除風迴  
高殿帷幙空張肴俎虛薦極聽無聞詳視罔見人神  
道殊吉凶有禮龜筮叅謀埏隧告啓史臣考吉警者  
在陛攀援忪忪惟兄及弟龍輿肅以引邁前驪紛以  
抗旒城闕儼以整列馳道亘以通修感乎昔之所幸  
豈斯路之復由輓哀唱以翼衡駟悲鳴而顧輶違華  
宇之晰晰即永夜之悠悠奉靈櫬而長訣緬終天而  
莫收訴穹蒼以叫踊洞五內其若抽儻性命之可贖  
甘人百於山丘茫茫大運靡始不終哲王遺世貴在

道融昭哉我皇萬代流風良史式述德音永隆

宋武帝

徐爰宋書曰武皇帝彭城縣綏興里人夜生有神光  
之異室內盡明是夕甘露降于墓樹少嘗遊下邳遇  
一沙門于逆旅舍沙門言及中原多故曰云江表尋  
復喪亂能拯之者其惟君乎其意甚切至初高祖患  
手創積年未瘳沙門因出懷中黃散一裹留之沙門  
既去高祖追而望之倏忽不見以散治創一傳而愈  
餘散寶錄之每被金創輒用有驗高祖舉目瞻睞常  
見二龍在焉始尚微小及貴龍形漸長光色轉明左